


NKONKO NÈ MANDAMUNA

PA EBÈLÙ CITÙPÀ III

 ...bwà kwikala cyàkàbìdì kaaba aka dilòòlò edi mu tabernacle, bwà kwikala ne myoyi kuulukuulu mu bwobùmwe bulenga ebu ne dikuukwila dyà banyùngùlùkile Dìyì dyà Nzambì dìdì ditùpèèbwe cyanàànà edi. Nènku tudi . . . banangè kwikala baabanyanganyi bàà dibènesha edi.

⁵⁵⁴ Nènku ndi mèmè ànu mutwìshìibwe ne Nzambì neatùbènèshè dilòòlò edi mùvwàYe mwenzè mu dindà emu amu, ku diyiisha dyà mu dindà adi. Nènku mvwà ànu nyiikilangana ne mwena mutumba naanyi, Mándàmù Wood, katancì aka, ne tuvwa tuyiikilangana pa bwalu abu, ne Mukalenge Wood ne bakwàbò. Nènku ndi ngiitabuuja ne cìvwa ndiyiisha dyà Mwanèètù Neville dyà ditàmbe bwimpè ku a mimpè àkaadiye muyiishèyìishe, adi ndìvwà bwànyì mèmè dimpè kutàmba dyònsò dikaadiyèkù muyiishè too ne leelù. Ncyà bushùwà ne mvwa mukème ne mwanyishe diyiisha dilenga dilayà adi. Kàbìdì ndinkolèshèkù ku mwoyi, ne ndinsònze. Pa nàнку mèmè—mèmè ntu munangè kwitaba bulelèlà, nudi bamanyè's. Nènku, pa bìdì bitàngilà bukitù, nudi bamanyè's, bwà kwikala ne bukitù, ne mùshindù wà. . . Davidì ùvwa mwab'awu, ne mùshindù wùvwàye. . . Pàvwàye mu diteeta dikolè adi, pamutù pàà kwamba ne: “Èè, nènye kenza cikampànda, Mukalenge, Wèwè ùkwàcìshèkù,” yèyè wàkindila, wàkaya kakonka Mukalenge cyà dyenya. Wàkatwàla efòdà, nudi bamanyè's, ne wàkamba ne: “Mpindyewu tùjuukilàayi kuulu tùkonkè Nzambì ne: ‘Citùdì ne cyà kwenza ncinyi mu cikondo cyà lutàtu eci?’” Kaa, aci's cìvwa cibanjike ànu cyà bushùwà's. Aci cìvwa ne maavitàminè àbùngì kutàmba ne bisùmbishidì byà manga byònsò bitùdì naabì mu ditùnga edi abi. Èyowà's, mukalenge, aci's cìdì cikwenza bimpè byà menemene.

⁵⁵⁵ Mpindyewu, dilòòlò edi, katwèna—katwèna ne kiipàcìlà kàà kushàala ntàntà mule kupìcìsha mundankùlù to, twètù ne mùshindù, pa nkonko eyi. Pa nàнку netù—netùbwelemu buludì, dyàkàmwe. Ndijikija dyà nkonko eyi, kàdì musangu wònsò wùndì ànu nkàadi nyijikija. . . Mpindyewu, Mwanèètù wa bakàjì Hattie, ncìvwa ne meeji a kwenza nàнку to, udi mumanyè aci. Mvwa—mvwa ngamba ànu bwà kwamba cyanàànà, wamònu's; nènku, èyo. Kàdì ndi ne ndambù wa yà mikolè kaaba aka yà kùdì mwambi kampànda, ne mmikolè mipangè ne mwà kukola bwà kuyàndamuna. Nudi bamanyè's, bayiishi abu, bòbò bàtu bàcìkònyangaja mu Bible mwònsò ne bàteeta bwà kupeta dyandamuna dyàbò bòbò kumpàlà kwà kukwelabò lukonko,

nudi numòna's. Nènku díbà adi. . . ne ebi bìdi munkaci mwà kukwàciibwa pa mikàbà yà mèyi, neyiikalè mwà kuya mu Géorgie kùdi mulundà wanyì mwambi udi ne nkonko minène mwandamukùlù yà mu Bible kaaba aka miikàle mikolè yà menemene.

⁵⁵⁶ Nènku mpindyewu, lumingu lùlwalwà elu, kanùpu mwoyi to ne nwatùsambidilaayikù.

⁵⁵⁷ Ne mukàjàànyì ùkaadi muumvwè bímpè menemene; ùkaadi mujuukile kuulu patùdi twakulangana apa, ne mmwambùlwishe ne ku diipika, leelù ewu. Balundà bèètù bananga bàà ku Canada, Mwanèètù wa balùme, Mwanèètù wa bakàjì Sothmann, bàdi kaaba aka balwè kutwèndela, ne ncyà bushùwà ne tudi twanyisha ditùmwènekela dyàbò. Nènku mukàjàànyì, bu mùvwaye mumanyè ne bàvwa bàlwa, mòna's, ùvwa muswè kujuuka bwà wàmònakù mwà kupeta ndambù wa dicyònkomoka ne bwobùmwe bwà kùdi beena Kilistò bananga aba. Tudi ne disànkà dyà kwikalakù ne Mwanèètù Freddie pàmwè neetù dilòòlò edi, kàdi mwena kwèndè yèyè mmushààle ne. . . Ùvwa kaaba aka mu dindà emu, kàdi ndi ngeela meeji ne mmushààle ne. . . to, ncyà bushùwà, bàdi ne Meda, bwà ikalèku pàmwè nendè patùdi balwè kùneeku apa; bwalu ndi mumanyè ne díbà nedùikalè dipìte ndambù dilòòlò edi, kùdi mèèsà a Mukalenge ne dyoweshangana dyà màyi ku makàsà. Pa nànkù tudi ne disànkà dyà kwikalakù naabò ne beenyi bàdi neetù aba.

⁵⁵⁸ Mpindyewu, kumpàlà kwà twètù kubanga bwà kuteeta kùditwa mu dyandamuna dyà nkonko. . . Ne vùlukàayi ànu ne mèmè ndi—ndi mwà kutùpakana, nudi numòna's, ncyèna—ncyèna ndàka mukana ngamba mùndi mubingè mu byònsò bìndi ngenza nànsa. Ndi—ndi nteeta bwà kwikala mu bulelèlè, kàdi pàmwàpa ndi—ndi mu ntùpàkànyì. Nènku—nènku mèmè mu ntùpàkànyì, díbà adi nùmfwilaayikù ànu luse; ne ndi ndòmba bwà Nzambì wàmfwilakù Pèndè luse, bwalu ncyèna ne meeji a kwikala mu ntùpàkànyì to. Ncyèna nteeta bwà kuyàdamuna ànu bwal-. . . anyì mu mùshindù wùndi ànu. . . bwà kapangìshà to, ndi nyàdamuna ku dyànyì pàànyì dimanya, nwamònu's. Ne byòbì bikèngela bwà mèmè kushintulula mmwènu yànyì pa lukonko kampàndà lwà Bible, ngeela meeji ne ànu aci ki cintu cyà dyenza. Bivwa bikèngela bwà twètù kwikala tushintulula, díbà kanà dyònsò, pàdi Dìyì dyà Nzambì dyàkula; bwàlu n'Dìyì dyà Nzambì.

⁵⁵⁹ Nènku mpindyewu, ngeela meeji ne netwikalè mwà kusambidila cyàkàbìdi babèedi dilòòlò edi, bu pa ciibidilu. Ne mîngà misangu udi ànu udìkonka; udi wangata bu mùdi kasùmbù kakesè kàà bwena aka, ne búngi bushààdile kù, kaa, kaatabernacle aka, ne mîngà misangu kùyi umòna bipeta byúvwà ujinga kumòna abi to. Kàdi cidìku, cyùdi wenza, udi ànu ukòka kuumukila ku bantu batwè ku nkàmà yibìdi cyanààna.

Kàdi dimwè dyà ku masangisha a manène, pàmwàpa udi ukòka kuumukila ku binunu bisàtù too ne ku dikùmi, nudi numòna's, ne—ne pàmwàpa bapìte apu. Pa nàнку ki mùshindù ngwówò awu, wúdi ufika ku dimòna bàà batàmbe kwikala bààbúngì abu. Kàdi dilòòlò edi, ndi ànu ngandamuna . . . Mu bushùwà bwà bwalu tèlefonè wetù ùdi ànu wènza kudila pàdi ànu tusunsa tukesè tùpìta ditùkù dijimà ne citùpà cyà bufùku.

⁵⁶⁰ Ewu m'Màndàmù Reisert udi musòmbe apa, ùndi mutàngile ewu anyi? Bible webè, mwanèètù wa bakàji, Mwanèètù wa bakàji Wood ùdi nendè paanyimà pàapa. Ndi mukutwàdìleyè mu dindà emu, kàdi nci—ncìvwa mufikè ku dikupèeshayè to. Ne nci—ncìvwa mukumòne mu dindà emu to, nènku Màndàmù Wood ùdi nendè.

⁵⁶¹ Pa nàнку bwà kwandamuna ku tèlefonè ne kumanya bi—bintu binènè bìdi byenzèke. Inàbànzà kampànda ùvwa mumbiikile, wàmba ne: “Mwanèètù Branham, mvwa mu disangisha *kampànda* ne mvwa nsaama *cikampànda* kùkaavwa ntàntà bule *kampànda*. Kàdi, udi mumanyè's, wèwè udi mwenzè ànu wakula cyanààna kuntwaku, nènku ànu . . .” Kwambayè ne: “Nkààvwa mwambè kuuminyina's pààkapàtulàCi ànu maalu a mu nsòmbelu wanyì wa kale awu.” Ki yèyè ne: “Ncìtukù musaamè kàbìdi to kubangila ànu piinè apu.”

⁵⁶² Kàdi inàbànzà kampànda kubwelayè e kwambayè . . . Ngeela meeji ne yèyè awu ùdi kaaba aka dilòòlò edi, anyi ùvwa ne cyà kwendesha màshinyì ùmukila ku Bedford, ngeela meeji, anyi mwaba kampànda muntwamu. Mwanààbò mulela wa balùme ùvwa kaaba aka, ngeela meeji, uvwa ne disaamà dyà mwoyi awu, mu mùshindù mubì be. Nènku ùvwa musòmbe kaaba aka mu disangisha, ki—ki Mukalenge kubwela mu cyalu ne kulenga . . . kwambila nsongaàlùme awu disaamà dyèndè, ne yèyè ùvwa mwà kujuula dibòkò ànu ne lutàtù, ciinè aci disaamà dyà mwoyi, ne dibòkò dyèndè dyònsò dikwàte tukùlakàji, ne mwoyi wèndè mùshindù ewu. Ki dyàkàmwè kubwelayè buludì mu kàshinyì kèndè ne nyèyè udi walukila kumbèlù wàwa, kàciyikù mwà kutàcishiibwa naaci kabìdi to kubangila ànu apu. Inàbànzà wa ku Bedford awu mmufikè apa anyi? Udipù anyi, inàbànzà? Nyèyè wàwa, paanyimà pàapa. Èyowà, mmufùme ku dimbiikila ku tèlefonè, kwènji katanci.

⁵⁶³ Pashiishe kùdi inàbànzà uvwa mumbiikidile mu Evansville. Ne yèyè kàvwa ne mùshindù wà kufika apa to bwalu ùdi ùsanganyibwa kule be, kàyi mumanyè ne tuvwa mwà kwenza disangisha dyà dyondopa dilòòlò edi to. Ki yèyè ne: “Mwanèètù Branham, mvwa musòmbe mu disangisha dyà mu Evansville,” ki yèyè ne, “wèwè kutùma mèsù paanyimà pa musumbà awu ne kwamba . . . kungambila ne mvwa kampànda, ne bîmvwà mwenzè, ne ciine cîmvwà musaamè aci, ne bikwàbò mùshindù awu.” Ki kwambayè ne: “Mvwa ne disaamà dyà nkòlolo wa mfwènke adi, ne bìvwa bìnkèngela kwikala kwosha bwanga bwà

Asthmador ne bikwàbò mu cibambalu kubangila ànu pàncìvwà mwànà mutekète.” Yèyè ne: “Aci kùkaadi bidimu bibidi, kàdi ncitukù mupetè kantu kàà mfwènke nànsha kakesè to kubangila ànu piinè apu.” Nwamònu anyi?

⁵⁶⁴ Nènku ànu bwà aba bàdìpu mu dilòòlò emu abu, bàvwà kabàyi kaaba aka mu dindà emu bwà kusànkilakù bujaadiki abu to; mvwa muyè ku màkàjiinyi a bintu byà mishinga mipuutula, mukasùmbe ciipòpì, makèèlèlè awu. Mpindyewu, kacìvwà bwànyì mèmè mwinè to, nwamònu’s. Cìvwà mbwà mwanàànyì mukesè wa bakàjì, Rebekah, wàwa nàka. Kàdi—kàdi Sarah ùvwa yèyè ne cyà kuya ku mwaba kampànda, leelù ewu. Umwè wa ku balongi bààbò batekète ùvwa wènza kaacisangilu kakesè, kàà mufikilu wà dilediibwa anyi cintu kampànda, nènku ùvwa mumwambwile kaamàtálishi kakesè; nènku mvwa nsùmba kaaciipòpì kakesè, kùpacila bule *ebu*. Nènku kulwakù tàmakàtàmàkà inàbànza kampànda mwab’awu, kwambayè ne: “Udi mumvùlukè anyi?”

⁵⁶⁵ Ki mèmè ne: “Ncyèna ngeela meeji ne ndi mukuvùlùke to.”

⁵⁶⁶ Ki kulwabì kumanyika ne, ùvwa cilongo cyà Mwanèètù Neville ewu, uvwa bu. . .pàmvwà mu njila mutàngile ku Suède, bòbò. . . Yèyè wàkabwela mwab’ewu, mwikàle ne mwànà mukesè wa balùme mu kàkalù kàà balèmà, ànu mùdì Edith mukesè wàwa, ne mwànà mukesè awu ùvwa ne kànsèrè, cyùjà cyà kànsèrè kàà lufù, mu bwongò. Nènku katù kèndè kakesè aku kanyekamija, nènku yèyè. . .ne bangàngàbukà bàvwa bamupèèshe ànu mbingu yisàtù cyanààna yà kwikalayè ne mwoyi. Bàvwa bakàngàte ne bajandùle disaamà, ne bamòne ne cìvwà. . .cìvwàci aci, ne kumupèèshabò mbingu yisàtù cyanààna yà kwikalayè ne mwoyi. Nènku bìvwà bikèngela bwà kwikalabò bàmwendeshila mu dikalù dyà balèmà, ne kumutèeka mu kalààlù kàà dyambwila babèèdi pàvwàye ùya ku cibambalu aci bwà kumwenzabò mateeta, ne pashiishe kumwalujabò. Mèmè kuya kasambidila mwànà mukesè wa balùme awu, ne kulòmba Mukalenge bwà àmwondòpè. Ki ditùkù mene dyà pààkacyàbu adi, pààkayàbo nendè muntwamu, yèyè kwamba ne: “Ncyèna muswè kàkalù kàà balèmà aku to.”

⁵⁶⁷ Kubwelayè mu kàshinyi e kuyayè kuntwaku, ne ngàngàbukà kuvùngululayè kalààlù kàà dyambwila babèèdi aku, kwambayè ne: “Ncyèna muswè kalààlù kàà dyambwila babèèdi aku to.”

⁵⁶⁸ Kuyayè kwàka lubilu e kusòmbayè, ngàngàbukà kumwenzayè mateeta, kwambayè ne: “Èè,” yèyè ne, “pamutù pàà mbingu yisàtù, nènkupèèshe bidimu lukàmà ne mwandamukùlù byà diikala ne mwoyi.”

⁵⁶⁹ Nènku, makèèlèlè awu, mamwèndè mmutwilàngàne naanyi. Ne yèyè mwine ùdi mwà kwikala kaaba aka, bwà ku dyànyì dimanya dyònsò, dilòòlò edi. Ne kànà kàà balùme aku kàvwa pambèlu apu kànàya ndundu, nsongàalùmè wa citende patùdi

twakulangana apa. Cyùjà cyà kànsèrè kàà lufù, kànsèrè mu bwongò, nènku bìdì ànu bìleeja . . .

570 Kaa, binunu byà maalu's, nwamònu's. Nzambì kèna mwà kupangilakù to. Kê—Kèna ànu mwà kupangila to.

571 Mwanèètù John, dísù dyèbè dyũmvùku bímpè anyì, mwanèètù wa balùme? Ùvwa mupetàkàne ne njiwù, ùvwa ùpoopela musonso kàdi kumutuutawù mu dísù. Nènku tuvwa bònsò munkacì mwà kusambidila Mwanèètù John O'Bannon, mwanèètù wa ku Louisville uvwa mupetàkane ne njiwù yà musonso wùvwà mumutuutè mu dísù.

572 Mpindyewu, nkonko eyi yìdi nndòndò wa—wa mwoyi wa muntu kampànda; yà pàdìbo bàbala mu Mifundu ne bàpeta bintu ebi, kàdi kabàyi. . . pàmwàpa kabàyi mwà kudyumvwa bòbò biinè basànkishìibwe to, nènku bàdi bàyifila kaaba aka bwà twètù kuteeta bwà kwandamuna. Nènku's nudi numòna ne mmu lutàtù lukolè kaayi mùdici citùtèeka; bwalu, ciwamba aci, nebashààlè bakwàtekù. Pa nànu wèwè udi ne cyà kwikala mutwishìibwe ne udi mu bulelèlè, nènku mèmè. . . mutwishìibwe ne mwèbè mwònsò. Nènku díbà adi, cintu cyà kwikala batwishìibwe ne tudi mu bulelèlè, tulombàayi ànu bwà Nyuma Mwímpè mpindyewu àtũmvwìjilèku cyòci eci, patùdi twinyika mitù apa.

573 Mpindyewu, Taatù wa mu Dyulu, kaa, ndyèsè kaayi dyà kwambakù ne "Taatù" twambila Mufùki munène wa maulu ne buloba. Ne tudi tulòmba ànu bwà Wàngatèku nkonko eyi mu bukùbì Bwèbè Wèwè mwinè mpindyewu. Mmifidìbwe kaaba aka ne meeji matòokè matàmbe kwikala a ndòndò. Nzambì, enzàku bwà aci cìfuminè mu myoyi yètù, meeji matòokè matàmbe kwikala a ndòndò, bwà kuyàndamuna bilondèshile dyètù pètù dimanya; enzàku nànu.

574 Ne swàku bwà luse Lwèbè lwìkalè pambidi pàà muntu ne muntu. Ne swàku bwà cintu kampànda cyàmbiibwè mwab'ewu dilòòlò edi cìikalà ànu mwà kukwàcisha muntu ne muntu udi kaaba aka. Ne patùumukà, paanyimà pàà disambila dyà babèèdi ne didyà dyà méesà a Mukalenge ne bikwàbò apu, swàku bwà twàmbèku bu bàvwà bàfùminà ku Èmawùsè abu ne: "Myoyi yètù kayìvwakù yilàkuka kapyà munda mwètù pàvwàYe wàkula neetù mu njila apu anyì?" Bwalu tudi tulòmba nùku mu Dìna dyà Yesù. Amen.

575 Mpindyewu, múnkaadi mwambàmbe misangu ne misangu ne, ebi—ebi kaaba aka bìdi—bìdi nku wanyì pàanyi mmwèneni mutàmbe bwímpè pa byòbì, ne pashìishe míngà misangu bìtu bìjuula ndambù wa dikòkangana. Lwà kumpàla elu, ndi mmòna ne ncintu kampànda cínkaavwà mudyànjlile kwamba, mbacifilùlùle. Ncyàkwikala . . . ndi muswè kucibala mpindyewu, bu nwènù mwà kuswà.

65. Pàvwà Adàmà ne Evà bapetè bânà bààbò balela mu Edènà apu, kùvwakù bantu bakwàbò pa buloba musangu awu anyi? Mu Genèsè nshapità mwi5 ku mvensà wa 16, Kaayinà wàkasòmbela mu buloba bwà Nodà ne wàkamanyangana ne mukàjèndè.

⁵⁷⁶ Mpindyewu, alu's ndu—ndukonko lulenga lwà dikèma's. Mpindyewu, tutu bayiile mu Bible... Ne misangu yàbùngì ebi... mîngà misangu tutu twenza lulèngù... Mvwa ne ciibidilu cyà kufùnda pa kapese kakesè kàà dibèji, ngamba ne: "Konkà. Andàmùnà lukonko kanà lwònsò lwà Bible."

⁵⁷⁷ Ki muntu kampànda kwambayè ne: "Èè, mukàji wa Kaayinà ùvwa nganyi?"

⁵⁷⁸ Kaa, mvwa ngeelamù ndambù wa bilèlè anyi cintu kampànda, ngamba ne: "Kaa, ùvwa mmwànà wa bakàji wa màmwènèndè," anyi cintu bu nànkù, nudi bamanyè's, anyi—anyi ne "Ùvwa m'Màndàmù Kaayinà." Kàdi aci kacyèna cyàndamuna ku lukonko to. Kùdi. . .

⁵⁷⁹ Mwómò amu Kaayinà ùvwa ne mukàji, bwalu Bible mmwambè ne ùvwa nendè. Ne piikalàbi ne Kaayinà ùvwa ne mukàji, s'bvwa bikèngela ikalè mumupetè mwaba kampànda. Ne eci ncifwànyine kubwela buludì mwómò emu ne:

Kùvwakù bantu bakwàbò pa buloba pàvwà Adàmà ne Evà bapetè bânà bààbò balela abu mu budimi bwà Edènà apu anyi?

⁵⁸⁰ Mpindyewu, bu nwènù mwà kumòna, mu Bible mmu mpùùpùùkà menemene mùdibokù batèèle dilediibwa dyà muntu mukàji. Misangu yònsò ànu mwànà wa balùme ngudibò batèèla mu Bible, kí mmuntu mukàji to. Mmu mpùùkàpùùkà menemene mùkaadibò bambèku bwà dilediibwa dyà mwànà wa bakàji, mu Bible. Anyi, bwà kwamba menemene, ncyèna mumanyè ne ndikù mwà kuvùluka dyàkàmwè mpindyewu to, bwà mu meeji, mwàba wùdibò batèèle dilediibwa dyà mwànà; mbambè ne: "Bààkalèla bânà bàà balùme ne bàà bakàji."

⁵⁸¹ Mpindyewu, Bible ùdi ùtèèla ànu bwà bânà bàsàtù bààkalediibwà kùdi Adàmà ne Evà, ne bàvwa n'Kaayinà, Abèlè, ne Setè. Mpindyewu, piikalàbi ne bònsò bàsàtù abu bàvwa balùme, piikalàbi ne kakwàkalediibwa bakàji to, ne pashiishe pàakafwà mukàji umwèpelè awu (Evà), nùnkù bukwàbantu's mbulekèle kwikalakù ànu mwaba awu, bwalu kakùvwa kufwànyine kwikala mùshindù wà—wà kupetabò... bwà bukwàbantu kwikalabù butùngùnùke to, bwalu kakùvwa kufwànyine kwikala kushàale bantu bakàji to. Evà nguvwa mufwànyine kwikala umwèpelè awu. Kàdi, nudi numòna's, kabèèna batèèla bwà di—dilediibwa dyà bânà bàà bakàji to, mu Bible, ki bwà cinyi bàvwa ànu ne cyà kwikala bapetè bânà bàà bakàji byà mwomùmwè ne bàà balùme.

582 Mpindyewu, mufùndi wa kale, umwe wa ku bafùndi bàà kalekale batùdi naabò, Josèphe, ùdi wàmba ne bààkalela bânà makùmì mwandamutekète, Adàmà ne Evà; umwe wa ku bafùndi bàà kale menemene, “bânà makùmì mwandamutekète, ne bônso bàvwa bânà bàà balùme ne bàà bakàji.”

583 Mpindyewu, piikalàbi ne...Nènku dibà adi piikalàbi ne Kaayinà wàkayà ku buloba bwà Nodà...Mpindyewu, nwènù baswè kumòna, mufùndi awu ùvwa mufùndi wa meeji matwè bikolè, bikolè mwab'ewu. Nukààvwakù bamòne mwàkàcitéèlaye anyi?

Mu Edènà, pààkapetàbo bânà bààbò balela abu mu Edènà...Mpindyewu, kî mmu budimi bwà Edènà to, mufùndi awu ùvwa mumanyè aci. Yônso udi mufunde kabèji aka awu kaaba aka, mmwambè ne: Pàvwa Adàmà ne Evà bapetè bânà bààbò balela abu mu Edènà... .

584 Kamùvwa mu budimi bwà Edènà to, bwalu bàkaavwa bamanè kubìipata mu budimi bwà Edènà amu. Kàdi bàcìvwa ànu mu Edènà, ne budimi bwà Edènà bùvwa bùsanganyibwa ku esètè mu Edènà. Kàdi Edènà ùvwa mwenzè bu ditùnga anyi—anyì cìdì...anyì province, nènku Nodà mwikàle province anyì ditùnga ditwàngàne naadì.

585 Mpindyewu, muntu umwèpelè uvwakù Kaayinà mufwànyine kwikala nendè, anyì musèle, ùvwa mufwànyine kwikala ànu mwanààbò wa bakàji. Nànsha bìshi. Bwalu kùvwa ànu mulùme umwe ne mukàji umwe kùvwabò mwà kwikala bapàtùkile, nwamònu's, nènku bìvwa bìkèngela kusèlayè mwanààbò wa bakàji sungasunga. Mpindyewu, aci cìvwa cìkùmbanangana ne mikenji mu miinè matùkù awu.

586 Ne Izàkà wàkasèla mwànà sungasunga wa buludì wa mànsèbendè, Rebekah, mulongolola kùdì Nzambi. Sarah ùvwa mwanààbò wa bakàji ne Abraham, mwanààbò wa bakàji mukwàtatwèndè; kàyì mukwàmamwèndè to, mukwàtatwèndè. Nwamònu's, mwanààbò wa bakàji wa mashi àmwè uvwa—uvwa Abraham musèle awu; bashiilàngàne ku baamaamù, kàdi taatù umwe.

587 Pa nàнку, nudi numòna's, bwà kusèlangana mu bilongo musangu awu, kumpàlà kwà musùlù wà—wà mashi kulwawù mutekète mu bukwàbantu, bìvwa bìkùmbanangana ne mikenji ne bìmpè. Mpindyewu kabyèna nàнку to. Bu wèwè mwà kusèla mwanèènu wa bakàji leelù ewu, ne kulela bânà, pàmwàpa mbafwànyine kwikala...èè, mbafwànyine ànu kwikala bakònyàngàle ne bikwàbò byônso. Nànsha mene too ne cilongo cyà lukòngò lwibìdì kabìvwa ànu bìkèngela kusèlanganabò to, nwamònu's, mbwà musùlù wà mashi wùdi wènda wùlwa mutekète ne mashi ènda àteketa.

588 Kàdi cintu cimwèpelè cìvwa Kaayinà mwà kwikala mwenzè, cìvwa cyà ne, kusèla mwanààbò wa bakàji sungasunga.

Nènku aku nkùvwà bânà . . . Wakangata mukàjèndè, wàkaya ku buloba bwà Nodà ne wàkamanyangana nendè, nènku kwòkù nk>wàkafùmà bâ—bânà abu. Nwamònu's, kùdì . . .

⁵⁸⁹ Nènku bu nwênù mwà kumòna, mu ndelàngànyì yà Kaayinà amu mmwàkapàtukà bantu bàà meeji matwè. Mu ndelàngànyì yà Setè mmwàkapàtukà batèndeleeedi, ndi muswè kwamba, mwonji wà—wà mvinyò wà bwakàne. Ànu kwòkù aku, babidì abu, ki kwàkalediibwà ndelàngànyì yittùdì twètù biikàlemu ne mwoyi leelù ewu aku.

⁵⁹⁰ Bu nwênù mwà kumòna leelù ewu mpindyewu (ànu bwà kujikija lukonko elu): ndelàngànyì yà Kaayinà ayi yìcìcìdikù, ne ndelàngànyì yà Setè yìcìcìdikù. Yònsò yìbìdì mmitungùnùke ànu mùshindù wà mwomùm>wè. Bânà bàà Kaayinà bàdì mu Jeffersonville emu dilòòlò edì, ne bânà bàà Setè bàdì mu Jeffersonville emu dilòòlò edì. Pàdì musulù wà mashi wùteketa ne wùshèèpeketa apu, kàdì ndelàngànyì ayi yìcìdì ànu mitungùnùke.

⁵⁹¹ Mpindyewu, tàngilàayi. Bânà bàà Kaayinà bàvwa misangu yònsò ànu . . . ne kumpàlà kwà kabùtù kàà mvùla wa Noà, bòbò mbàvwà bantu bàà meeji matwè: beena maalu a mamanya, balongeshanganyì; ne batèndeleeedi bàà dikèma, kàdì bàvwa musumbà wùvwà mupiishìibwe. Nwamònu anyi? Tàngilaayàaku mpindyewu, bàvwa ànu mùvwà tatwàbò Kaayinà amu. Kaayinà, ùvwa mutèndeleeedi. Wàkaasa cyoshelu cilenga, ne kwenza èkèleeziyà mulenga, ne wàkateeta bwà kucìvwija cyà cìmwènèka citàmbe kaacitanda kàvwà naakù Setè kuntwaku ku bulenga. Nuvwakù bamanyè nànkù anyi? Cyà bushùwà ne yèyè. . . Wàkalengeja cyoshelu aci ne bilòngò, ne kucìlongolola bilenga, ne kucìvwija cilenga; ne kwenzayè èkèleeziyà munène, wa katankù, mwalàbàle, bwalu ùvwa ùdyàmbidila ne ùvwa mwà kulengeleela Nzambì mu kwenza kwà nànkù.

⁵⁹² Kàdì Abèlè wàkaya kangata mwànà mukèsè wa mukòòkò, ne kubangayè kukòkangana nendè too ne ku cyoshelu, ne kumulààdikayè pa lubwebwe ne kumushebeyayè.

⁵⁹³ Nènku mpindyewu, Nzambì mwikàle mwakàne, bu ne cyònsò cìvwàYe ùlòmba cìvwa ànu dikuukwila, Kaayinà's wàkakuukwila Nzambì ne meeji matòoke àbùngì ànu bu mwàkenzà Abèlè. Bònsò bàbìdì bàvwa ne meeji matòoke. Bònsò bàbìdì bàvwa bàteeta bwà kulengeleela Nzambì. Kabàvwa beena dyabùlù to nànsha umwe wa kùdìbo. Bùbìdì bwàbò, kakùyì mpatà to, bàvwa beena kwitabuuja mu Yèhowàh. Mpindyewu, mwaba awu, aci's cìdì cìtùpèèsha cintu kampàndà cyà dyelanganapù meeji.

⁵⁹⁴ Bàmwè bantu, mwab'ewu dilòòlò edì, kacya ncìtukù mwanji kubàmòna to; kacya ncìtukù mwanji kunùmòna kwònsò eku to. Kàdì nudi ne cyà kumanya eci, ne kulama cyòcì eci mu meeji ènù. Nwamònu anyi? Nànsha wèwè mwikàle mutèndeleeedi

wa bìshi, aci kacyèna ne dipetangana nànsha dikesè ne cyôci aci to. Udi mufwànyine kwikala musòmbèle mu èkèleeziyà, udi mufwànyine kwikala ne meeji matòòke a menemene, kàdi ucìdi ànu mujimine! Nwamònu anyi?

⁵⁹⁵ Kàdi wêwè udi wamba ne: “Èè,” mùdi wamba, “bèètù bampaasàtàs mbàdi batàmbe kwikala bàà meeji matwè, mbapicile mu maasèminèrè bwà kupeta dilonga dyà ditàmbe bwimpè. Mbeena tèlòlòjì, mbamanyè tèlòlòjì yònsò—yònsò ne bikwàbò. Ne mbàà meeji matwè, balongèshìibwe, bàà menemene...basungula bàà batàmbe bwimpè batùdiku bamanyè.” Kàdi’s mbafwànyine ànu kwikala bajimine! Nwamònu anyi?

⁵⁹⁶ Mpindyewu Kaayinà, mu yèndè ndelàngànyì: bàvwa, muntu ne muntu, batèndeledi bàà dikèma; cisàmbà cyà cyèndè luumù cyà dikèma; ne bàvwa beena maalu a mamanya, ne bangàngàbukà, ne biibaki, ne benji bàà mudimu, ne bantu bàà meeji matwè. Kàdi bònsò bà ndelàngànyì ayi bààkabèngiibwa, kuumukila ànu ku Kaayinà too ne ku ndekeelu.

⁵⁹⁷ Kàdi ku luseke lwà Abèlè: bòbò kabàvwa biibaki anyi balongeshi bàà tulaasa anyi bantu bàà meeji matwè to; bòbò bàvwa, mu mùshindù kampànda, bàà mùshindù wà bamunyi bàà mikòòkò, badìpwekèshi, ne baabidimè, bàvwa bènda ànu mu Nyumà.

⁵⁹⁸ Mpindyewu, Bible mmwambè ne: “Kakwèna dipiilà nànsha dikesè to bwà aba bàdi mu Kilistò Yesù, bàdi kabàyi bènda bilondèshile mubidi to kàdi bilondèshile Nyumà.” Muntu wà nyumà awu ùdi ne musùukà wa nyumà wùdi kawùyìkù mwà kufwà nànsha. Kàdi muntu wa musunya ùdi ne cyuyüyà cyà butèndeledi cimunyungùlùkile (ne mmuswè kukuukwila ne bikwàbò) kadi ngwa musunya; kàyi mwena bupidyà to, kàdi mwena kwitabuujà wa musunya; nènku ki mùshindù wùvwà mubèngiibwe ngwòwò awu.

⁵⁹⁹ Mpindyewu, kuumukila apu, Kaayinà kuya kasèla mukàjèndè mu buloba bwà Nodà. Mpindyewu, kî mbambè ne Setè wàkasèla nganyi, anyi bakwàbò bààkasèla banganyi to. Kàdi cintu ciinè cilenga mu bwalu abu ncyà kumanya ne—ne, bwà kusèlangana kwà Kaayinà, twàmanyi kupeta dyandamuna ku bwalu abu. Bwalu bìvwa bikèngela bwà kusèlayè mwanààbò wa bakàjì, cyanààna yéyè...cyanààna kùvwa kufwànyine kwikala...

⁶⁰⁰ Kakùvwakù bakàjì bakwàbò pa buloba to, kàdi ànu bàvwa ne cyà kufùmina kùdi Evà. Yéyè nguvwa mamwèndè wa bònsò bàvwa ne mwoyi. Mbwena kwamba ne, bantu bònsò bàvwa ne mwoyi abu, yéyè nguvwa mamwàbò. Ki bwà cinyì yéyè ùvwa... Mwakù *Eva* wùdi wùmvwiya ne “mamwèndè wa bàdi ne mwoyi.” Ki kulwayè kulela mwànà ewu. Ki Kaayinà kusèlayè mwanààbò sungasunga wa bakàjì, civwà cifwànyine kwikala mùshindù

wùmwèpelè wùndiku mèmè mwà kumòna mwômù amu. Nènku kùvwà bantu ne mwoyi mu ditùkù adi, bulelèlè. Nwamònu anyi? Èè, ne . . .

Pàvwà Adàmà ne Evà bapetè bânà bààbò balela mu Edènà apu . . .Mpindyewu tângilàayi, ki lukonko ndwòlù alù: **Pàvwàbò bapetè bânà bààbò balela mu Edènà apu, kùvwakù bakwàbò bantu pa buloba mu ciine cikondo aci anyi? To! Pashiishe mu Genèsè 5.16, wamònu's, Kaayinà wàkasòmbela mu buloba bwà Nodà ne wàkamanyangana ne mukàjèndè.** Bushùwà. Nwamònu anyi?

⁶⁰¹ Awu n'Genèsè 1, mwàkafùkàYe muntu mu cimfwànyì Cyèndè Sungasunga, uvwà mu tèòfàní awu. Nènku mu Genèsè 2, kwenzela Yè muntu ku lupwishi lwà buloba, uvwa muntu wetù utùdì nendè mpindyewu ewu. Ki pahiishe, mu 3 mmwàkalwà cibùlà, ki kwipaciibwayè mu budimi bwà Edènà; ki pashiishe bânà kulelabò bânà. Ki Kaayinà kwangatayè mukàjèndè ne kusòmbayè nendè mu buloba bwà Nodà, pambèlu, bwalu Nzambì wàkamukòsolola ku bwobùmwe ne mwanààbò wa balùme (bwà bwalu bwà lufù lwà—lwà Abèlè). Nènku ki yèyè awu uvwayè nendè, mwanààbò sungasunga wa bakàji, ne kumusèlayè; ki mùshindù wùmwèpelè wùndiku, mèmè mwinè, mwà kumòna mwà—mwàkasèlanganàye.

⁶⁰² Mpindyewu, mbambè . . .Kàdi ndi ntèkemena ne balundà bàànyì bàà bafiike bàdi kaaba aka nebàmfwilàkù luse bwà dīyì edī, bwalu kakūyī mpatà to kī mbulelèlè to. Musàngu wà nzànzànzà wùngààkatwilàngànàku ne muntu kampànda kacya bàndela, paanyimà pàà mèmè mumanè kukùdimuna mucìma . . .Mvwa . . .mutwilàngàne ne Mwanèètù George DeArk ne bakwàbò abu. Nènku mvwa ngenda ngenda, ki Mukalenge kundombola ku kaaba kampànda kàà kakesè. Nènku bàvwà bàkokangana bwà kùvwà muntu mufiike mufùmìne. Ne bàvwà bàteeta bwà kwamba ne muntu mufiike . . .Ne Kaayinà wàkaselè nyama kampànda mufwànàngàne ne nsòkòmuntù, ne kwòkù aku ki kwàkafùminà cisà cyà bafiike. Mpindyewu, aci ncyà mafi! Kakūyī mpatà to, aci ncyà mafi! Nènku kanùtukù cyòcì aci nyama ku mikòlò to. Bwalu kakùvwà nī mmufiike nī mmutòke, anyi nī mmukwàbò mushiilàngàne to, cìwà cisà ànu cimwèpelè cyà bantu too ne ku mvùla wa Noà. Pashiishe paanyimà pàà mvùla wa Noà ne kaleyì kàà Baabèlè, pàakabàngàbo kutàngalaka, ki pàakabàngàbo kupeta meekala àbò awu ne bikwàbò. Bònsò mbafùmìne ku mucì wùmwèpelè wà mwomùmwe. Ncyà bushùwà menemene. Adàmà ne Evà mbàvwà taatù ne maamù, bàà pa buloba, bàà cifùkiibwà cyònsò cidì ne mwoyi cyà bantu bàkaadiku pa buloba. Ncyà bushùwà. Bafiike, batòoke, batòokòlòke, bafiikùlùke, bàà kàlaabi, diikala dyònsò dyùdì mufwànyine kwikala naadì adi, aci kakūyī mpatà to mmwàba wùdì musòmbèle, ne mùshindì wùdì—wùdì . . .Ànu mùdì . . .

603 Ndi ngeela meeji ne ndi mufwànyine kwamba patòòke eci pàncìdipu apa. Bantu bàdì muneemu emu mpindyewu mu masungulujiangana ne mikenji ne bikwàbò bidìbo bàfila ebi aba, mèmè ndi ngeela meeji ne mbyà macimbu. Ncyà bushùwà ne ki mùndì ngeela meeji. Tèelejàayi, lekèlaayi ànu bantu abu cyanààna, mbamanyè cìdìbo bàkèba. Nzambi wàkenza muntu mwikàle muntu mufiike, ne yèyè ùdi ne disànkà bwà cyôci aci. Kakùyì mpatà to! Bu Nzambi mungenzè muntu mufiike, mvwa mufwànyine kwikala ne disànkà bwà cyôci aci; bu Yèyè mungenzè muntu mufikùlùke, mvwa mufwànyine kwikala ne disànkà; pìikalà Ye mungenzè muntu mutòòke, ndi ne disànkà; bu Yèyè mungenzè muntu wa kàlaabi, mvwa mufwànyine kwikala ne disànkà. Nzambi mmutwènzè mu meekala ètù, ne Yèyè mmutwènzè mùvwàYe muswè bwètù twètù, ne tudi bônso bânà Bèndè. Kakùyì mpatà to! Ne kabìvwa bikèngela kukòkanganabò ne kwenzabò maalu a lukutukutu mùshindù awu nànsha. Mbìbì bwà kwenza nànkù. Kabìvwa bikèngela kucyènzabò to. Nzambi mmutwènzè . . . mùshindù wutùdì twètù bacìswe.

604 Nènku muntu mufiike, kî mmuswè kupàtuka kwàka bwà kunyangakaja lukòngò lwèndè—lwèndè anyì diikala dyèndè, bwà kudìsopakaja ne dyà batòòke ne byònsò byà mùshindù awu to. Mèmè ncyèna mmudiyula to. To. Muntu mufiike ùdi ne bintu bidì mutòòke kàyì nànsha naabì to. Kakùyì mpatà to! Ncyà bushùwà menemene. Ne Nzambi kàvwakù ne meeji a kwikalabò mùshindù awu to.

605 Èè, tàngilàayi. Muntu mufiike ùdi . . . ùdi—ùdi . . . ùdi ne—ùdi ne cilunji cyèndè yèyè cidi mutòòke kacya kàyikù naaci to. Yèyè nkàcyùki myandà, “wèyemena Nzambi, ne ùlekela bikwàbò byònsò mwàyàbi mwinè amu”; ìkalè naaci anyì kùkadi naaci, nànsha nànkù yèyè ùdi ne disànkà. Mèmè ndi muswè kwikala ne byà nànkù búngì cyanààna, dilòòlò edi, cyà bushùwà nànkù. Èè, yèyè ùdi naabì, ne abi mbyèndè; kî mmuswè kucìsopakaja ne cisà kàmpànda cìkwàbò bwà kucinyangakaja to. Ncyà bushùwà menemene.

606 Ngeela meeji ne inàbànzà udi ku Shreveport kwàka awu wàkamba àmwè a ku mèyi matàmbè—matàmbè bwìmpè a dyela dyà nsèke ànkaadìku muumvwè mu nsòmbelu wanyì. Kwambayè dīyì dyà dyela nsèke, ne kudìfundabò mu cibèjibeji. Kusemenayè mwab'awu, kwambayè ne: “Mùshindù wùdì maalu aa ènda àya muneemu emu, mu disungulujiangana edi, mèmè ncyèna muswè bwà bàanyi bânà kuyabò mu cilongelu cyà batòòke aci to.” Yèyè ne: “Kabààkubàcyùkakù mùvwàbi bifwànyine kwikala bòbò ne mulongeshi wa bafike to.” Mukàjì awu mmukàjì wa meeji matwè. Úvwa mumanyè cìvwàye wàmba aci, bàdì ne dilonga dyà kàlaasà ditàmbe bwìmpè. Ncyà bushùwà menemene. Pa nànkù ndi ngeela meeji ne bantu bàdì bènza bibì pa kwenza nànkù.

607 Nènku dîbà adi bàdi bàmba ne: “Kaayinà ne Abèlè. . .” ne bikwàbò byà mùshindù awu. To, mukalenge! Dikòbà kadivwa ne dipetangana ne abi to. Nyumà udi munda amu ngudi ne bwalu. Ncyà bushùwà menemene.

608 Pa nàнку Kaayinà wàkamanyangana ne mukàjèndè, ne yêyè awu ùvwa mmwanààbò wa bakàji. Nènku bôbò. . . wàkaya nendè ku buloba bwà Nodà, nènku ki kwàkapàtùkilà bisàmbà binènè byà pa buloba: balongi bàà maalu a ntèndeleeleu ne bakuukwidì.

609 Kàdi anjì elàbi meeji leelù ewu, wèwè mulundà wanyì, anjì imàná wèlanganèku ànu meeji bwà katanci. Bwà ne kùdi binunu makùmi misangu binunu makùmi ne binunu byà binunu byà binunu, byà bayi bàà mu maèkèleeziyà bàà kabàyi dyela mpatà to, biikàle ànu ne meeji matòòke ne badilàmbùle kùdi èkèleeziyà awu ne mwàbò mwònsò, biikàle bajimine kule ànu mùvwà Kaayinà amu. Nwamònu anyi? Nzambì Yèyè ngudi usungula! Nzambì Yèyè ngudi usungula! Nwamònu anyi? Nzambì ngUdi ufla luse! Diima kadyèna ne cyà dyambila mufwìmbi to, mmufwìmbi udi kumutù kwà diima. Ncyà bushùwà.

610 Mpindyewu lwà lulenga ndwòlù elu, lùdi lùlondà elu:

Mu Peetèlò Mwibîdì 2.4—2.4. . .

611 Muntu udi ne Bible, yêyè muswè àbuululèku mu mifundu eyi lùkàsàlùkàsà pàncìdì nyibala apa, pawikalà muswè. Ne ànkwàcishèku ndambù kaaba aka, patùdì twangata lukonko elu apa.

612 Mpindyewu, pa Kaayinà ewu ne—ne bikwàbò, cyòci kaciyi cisànkisha mpindyewu to, nwatùmanyishaayi. Netwikalè ne disànka. . .

613 Mpindyewu Peetèlò Mwibîdì 2.4. Èyo, mukalenge, mpòpò apa:

66. Peetèlò Mwibîdì 2.4: “Bwalu pùikalàbi ne Nzambì kî. . . Bwalu pùikalàbi ne Nzambì kàakalaminyina banjèlò bààkenzà mpèkaatù abu, kàdi wàkabàkùpa panshi mu ifèrnò,” dîbà adi bwà cinyi Kilistò wàkayiisha nyumà yà mu bùlokò ayi, mu Peetèlò wa Kumpàlà 3.19?

614 Mpindyewu, twâpeci Peetèlò 2.4, dyàmbedi. Èyo:

Bwalu pùikalàbi ne Nzambì kàakalaminyina banjèlò bààkenzà mpèkaatù abu, kàdi wàkabàkùpa panshi—panshi mu ifèrnò, ne—ne wàkabèèla mu nkànu yà mîdimà, bwà kulamiibwabò bwà cilumbulwidì;

615 Mpindyewu, mpindyewu tùjandulàayi mu Peetèlò wa Kumpàla (awu m’Peetèlò Mwibîdì), Peetèlò wa Kumpàla 3.19, tèelejàayi eci. Mpòpò apa, mwab’ewu mene. Eyi mmifume ku dimvwila, kabingilà kàdi kenzè ne ncìikadi muyifunde.

. . .kàbìdì. . . muyè kayiisha kùdi nyumà yà mu bùlokò ayi;

616 Kaa, èyowà's, s'ki bwalu mbwòbù ebu. Tùbangilààyikù ndambù kumpàlà kwà cyôci aci, mvensà wa 18:

Bwalu Kilistò kàbidì. . . wàkakènga musangu wùmwe bwà mpèkaatù, mwakàne bwà babì, bwà wàmòna mwà kutùfikisha kùdì Nzambì, mushipùbwe mu mubidì, kàdì muvwijùbwe ne mwoyi ku Nyumà:

KwàkayàYe kàbidì kayiisha nyumà yà mu bùlokò;

Yìwà mu cikondo kampànda ne cishikù, . . .

617 Mulundà wanyì munanga, bu wèwè ànu mubalè mvensà udi ulonda awu, mwômù amu mmùdìCi cicyùmwiye. Nwamònu anyì?

Yìwà mu cikondo kampànda ne cishikù, yìwà musangu kampànda wùwà lutùùlù lwà Nzambì lwindìle mu matùkù a Noà, pàvwà bwàtù munkaci mwà kulongolodiibwa, mùvwà bakesè menemene, mbwena kwamba ne, misùùkà mwandamukùlu misungidùbwe ku màyi. (Nwamònu anyì?)

618 Mpindyewu, bu nwènù mwà kumòna mwômò emu, ngeela meeji ne muyiishi ewu ùdi ne lukwàbò pa . . . cintu kampànda mu meeji àmweàmwe awu, lwikalà mwà kwandamunyiibwa pashìshe ndambù.

619 Peetèlò wa Kumpàla 4 . . . anyì 2.4, bu nwènù mwà kumòna, “bwalu pùikalàbi ne Nzambi kàakalaminyina banjèlò,” *mwanjèlò* awu ùdi wàmbiibwa ku dileetà ku dileetà munyi? Dileetà dyà “m” dikesè. Nwamònu anyì? Mpindyewu, apa nùku, “nyumà yìwà mu bùlokò yìwà kayìyi minyingàlale mu lutùùlù lwà mu matùkù a Noà ayi,” banjèlò bàmwèbàmwe abu's. Bàvwa mbantu: baamisànjeelà, bayiishi; “kàakalaminyina banjèlò to.” Nuvwakù bamanyè ne . . . mwakù *mwanjèlò* wùdi wùfuma ku mwakù “mùsànjeelà” anyì? Mbanganyì bàdì bamanyè ne *mwanjèlò* m“mùsànjeelà”? Kakùyi mpatà to, *mwanjèlò* mmùsànjeelà, “ne Yèyè kàakalaminyina banjèlò to.” Nwamònu anyì?

620 Ne mu Ebèlù emu, nudi bavùlùke ne tudi bacikenkète kùkaadi ndambù wa mbingu ne, “banjèlò” anyì?

621 Ne mu E- . . . mu Bwàkabuulwibwà amu ne: “Fùndilà mwanjèlò wa èkèleeziyà wa Saadì bintu ebi. Fùndilà mwanjèlò wa èkèleeziyà wa Efèsò bintu ebi. Fùndilà mwanjèlò wa èkèleeziyà . . .” Nudi bavùlùke aci anyì? Ki twètù kutàngila mwakù awu *mwanjèlò*, ne mu nkòngamyakù, ne kusangana ne wùdi wùmvwija “mùsànjeelà.” Ncifwànyine kwikala “mùsànjeelà pa buloba, mùsànjeelà mutàmbe mfùkilu,” mwakù awu *mwanjèlò*.

622 Nènku mu mùshindù awu, bu twètù mwà kwangata nkòngamyakù ne kuwùtàngila, nenùsanganè ne mmujuukile ku “baamisànjeelà, baamisànjeelà bàà kumpàla.” Nwamònu's:

“Pìikalàbi ne...Pìikalàbi ne kàakalaminyina...Bwalu pìikalàbi ne Nzambi kàakalaminyina banjèlò bààkenzá mpèkaatù,” (Nwamònu anyi?) “ne baakampànda bàà batàmbe-mfùkilu,” (Nwamònu anyi?) “paanyimà pàà dindila . . .”

Mpindyewu tàngilàayi, mmwambè ne:

. . .pìikalàbi ne . . .kàakalaminyina banjèlò bààkenzá mpèkaatù abu, kàdi wàkabàkùpa panshi mu ifernò, ne mubèlè mu nkànù yà mîdimà, bwà kulamiibwabò bwà cilumbulwidi;

623 Pashìshe tàngilàayi kàbìdì mu Peetèlò wa Kumpàla emu, 3.19, tàngilàayi mpindyewu mùdì cyôci eci cibadiibwa:

Bwalu mwàkayàye kàbìdì kayiisha kùdì nyumà yà mu bùlokò ayi;

Yìwà mu cikondo kampànda ne cishikù, yìwà musangu kampànda wùwà lutùulù lwà Nzambi lwindìle mu matùkù a Noà, (nwamònu's, bàwà mbaamisànjeelà bàà mu ditùkù adi, baamisànjeelà) . . .pàvwà bwàtù munkaci mwà kulongolodiibwa, mùwà . . .mbwena kwamba ne, misùukà mwandamukùlu misùngidìibwe ku màyi.

624 Mpindyewu bu nwènù mwà kumòna pàvwà bakampànda abu mu Dyulu. Mpindyewu, mu Bwàkabuulwibwà 11 . . . anyi nshapitá wa 7, ngeela meeji . . . anyi to, to, nshapitá wa 12. Ùdì ùfila cimfwànyì cyà mukàjì mwimàne; ngondo kumutù kwèndè ne dîbà . . . anyi, dîbà kumutù kwèndè ne ngondo mwinshì mwà makàsà èndè. Ki dragon mukùnze awu kwimanayè bwà kudyàye Mwànà awu pàvwàYe anu ne wàlediibù apu, ne kwangatayè mukilà wèndè e kukòkayè cyàbisàtù cimwè cyà mìtootò yà mu Dyulu ne kuyìkùpayè pa buloba. Nuvwakù bamòne aci anyi? Mpindyewu, aci kî mbwena kwamba ne Sàtaanà ùdì ne—ne mukilà mule wùwàye mukònye mujìngìle bantu to, kàdi “mmuyiikì wàkalondelanganàye,” e kukòka cyàbisàtù cimwè cyà mìtootò ayi. Mìtootò ayi yìwà ndimiinu dyà Abraham.

625 Abraham wàkamba ne: “Kaa . . .”

626 Nzambi wàkambila Abraham ne: “Tangilà mu maulu, ne balàbi bùngì bwà mìtootò ní udi mwà kuyìbala.”

627 Yèyè ne: “Ncyèna mwà kuyìbala to.”

628 KwambaYè ne: “Nànsha dimiinu dyèbè kwakwikalakù mwà kudìbala to,” mìtootò ayi.

629 Mùtootò Wùdì wùkenkà wà mu Dìndà awu Nganyì? Yesù wa ku Nazàlètà, mutàmbe kubàlakana ukààvwakù musòmbèle mu mubidi wà buntu. Yèyè ki Mùtootò Wùdì wùkenkà ne wà mu Dìndà awu. Ne Yèyè ki Dimiinu dyà Abraham, dipàtùkile mu Izàkà. Nènku twètù, biikàle bafwè mu Kilistò, tudì tuvwàla Dimiinu dyà Abraham ne tudì bapyànyì bilondèshìle mulayi.

630 Pa nàнку mìtootò yà mu dyulu yìwwa yìleeja nyumà yà bantu pànwapa. Nènku dragon mukùnze (Loomò, mu cikondo cyà dikèngeshangana dyèndè) pàkeelàye kàpa byàbisàtù bibìdì byà . . . anyi cyàbisàtù cimwè cyà mìtootò, ne kuyìkùpayè panshì apu, pàvwa mpà dipoopediibwa dyà pa nkùrusè dya Mukalenge wetù Yesù pààkaMubèngàbo ne Yèyè mwikàle. . . ne baMwelè pambèlu ne kabàyi Nendè bwalu nànsha bùmwè to; ki cyàbisàtù cimwè cyà mìtootò yà banjèlo, banjèlo abu ncyòci aci.

631 Nwamònu's, mu mubidi wèbè, munda mwèbè amu. . . (tudi ne lukonko lukwàbò pa bwalu abu, buludì, bwà kulwàndamuna byà bitàmbe bwìmpè). Pa nàнку pàvwà. . . Munda mwèbè amu mùdi nyumà, muntu mukwàbò. Pambèlu pèèbè udi muntu umwèpelè, munda mwèbè mùdi muntu mukwàbò. Pa nàнку munda mwèbè ncyà citàmbe-mfùkìlu, pambèlu pèèbè ncyà mubidi. Nwamònu anyi? Nènku muntu ewu, wèwè mulombola kùdi Nyuma, kùdi Nzambì, wàkalwa mùsànjeelà wà Nzambì, anyi mwanjèlo. *Mùsànjeelà* wa Nzambì, *mwanjèlo* wa Nzambì, mmwakù wùmwèwùmwè awu; kwèna mwà kuwùtápulula to: mùsànjeelà wa Nzambì, anyi, mwanjèlo wa Nzambì.

632 Nènku udi ne bukòokeshi butàmbe bunène nganyi? Mmwanjèlo wa mu Dyulu anyi mmwanjèlo wa ku cyambilu? Ngwèpì udi naabù? S'mmwanjèlo wa ku cyambilu! Pòlò wàkamba ne: "Mwànjèlo wa mu Dyulu yèyè mulwè munùyiishè èvànjeeliyò mukwàbò nànsha wa bishi mushiilàngàne ne ùnkaadi mèmè muyiishè, mulawu wùmulandàle." Pa nàнку mwanjèlo mulaaba kùdi Nyumà Mwìmpè ne kùdi Dìyi ùdi wìmana ku luseke lwà Nzambì. Ncyà bushwà. Mu Dyulu, bukòokeshi bwèndè. . .

633 "Makolè ónsò mu Dyulu ne pa buloba mmafidiibwe mu cyanza Cyànyi. Ndàayi, ne Mèmè nénye neenù. Cyònsò cinùdi nwènù nuswika pa buloba aci, Mèmè nènciswikè mu Dyulu. Cinùdi nwènù nusùlula pa buloba aci, Mèmè nèncisùlulè mu Dyulu."

634 Kaa, Èkèleeziyà munène wa cijila wìkalapù mujingùlùle bukòokeshi bwèndè bwà kwenza bintu ebi's wè. Kàdi kùdi mpatà ne bwòwà ne dizakala bùngì cyanààna, bàdikonka ní byènzeka: "Mbifwànyine kwenzeka anyi?" Pàdìbi ànu ne aci cidikù, Èkèleeziyà kèna mwà kwimanakù kuulu to. Ne pàdi muyiiki wònsò wà bwòwà wùjìmina ne Nyumà Mwìmpè wàngata bukòntononyi bwònsò nkòong pa Èkèleeziyà, dìbà adi bwòwà bwònsò bwàyi, ne Èkèleeziyà awu ùdi ne bukolè. Nwamònu anyi? Mòna's, bàdi paanyimà pààbò ne byònsò bìdì naabi Dyulu abi. Bàdi mìlòpò yà ku Nkwasa wa butùmbi. Kakùyì mpatà to! Mùlòpò wà Kilistò ùdi ne bukòokeshi, ne byònsò bìdì naabi Kilistò mbyà mùlòpò awu. Ne Yèyè wàkamba ne: "Ndàayi pa buloba bujìma, nudi bantèmù Bàanyi paanyimà pàà Nyuma Mwìmpè mumanè kulwa pambidi pèenù." Ne ntèmù nganyi? Mmùlòpò; bùdiye naabù mbwà kulwa ne kufila bujaadiki bwà

cintu kampànda. Makòlè ònsò a mu Dyulu àdi ànu mu byanza byèbè mene amu! Kaa, citùdi tushàadila kacya twasòmba ncinyi? Ne èkèleeziyà ùkaadi mwatùke, ne twètù basòmba katùyi ne citùdi twenza to. Mbwalu katwèna tujingulula bintu ebi to.

⁶³⁵ Mpindyewu, misùùkà yìvwà mu bùlokò (yìvwà kayiyi minyingàlale ayi), kayìvwà Banjèlo bàvwà—bàvwà beediibwe panshi mu mmwènelu wa Banjèlo to, kàdi yìvwà nnyumà yà banjèlo bàvwà badishinde kumpàlà kwà difukà dyà dyulu ne buloba ayi, kale wàwa pàvwà mvità minunkè mu Dyulu apu. Nènku Sàtaanà ne—ne dragon bàakalwangana mvità, ki pashishe. . . anyi Mikàlèlè ne—ne—ne dragon bàakalwangana mvità (ne Lusifèrè). Nènku Lusifèrè wàkiipaciibwa pàmwè ne bânà bèndè bònsò (banjèlò bònsò bàvwayè museeswishe abu), ne banjèlo abu kulwabò pa buloba ne kulwabò díbà adi ne bukòdkeshi bwà kulwabò bantu. Nènku pààkenzàbo nànu, apu ki “pààkamònà bânà bàà balùmè bàà Nzambì ne bânà bàà bakàjì bàà bantu bàvwà balenga, ne kubàngatabò bu bakàjì bàà nzùbu.”

⁶³⁶ Mbânà bàà balùmè bàà Nzambì. Mulùmè yònsò udi mulediibwe pa buloba apa mmwànà wa balùmè wa Nzambì. Nànsha yéyè ngènzàmpèkààtù anyi cidìye aci, yéyè mmwànà wa balùmè wa Nzambì. Mufùkiibwe mu cimfwànyì cyà Nzambì bwà butùmbì bwà Nzambì, mmufùkiibwe mùshindù awu. Kàdi Nzambì ku cibangidilu ùvwa mumanyè ne nganyì uvwa mwà kuMwakidila ne nganyì uvwa kàyi mwà kuMwakidila. Ki bwà cinyi Ùvwa mwà kudyànjila kulongolola, anyi, kakùyi kudyànjila kulongolola to, kàdi ku didyànjila-kumanya Yéyè ùvwa mwà kwamba ne nganyì uvwa usungidiibwa ne nganyì uvwa kàyi ùsungidiibwa, bwalu Ùvwa mumanyè ne mmuntu kaayi uvwa mwà kwangata nyumà kaayi.

⁶³⁷ Kàdi nyumà yàkafùmà ku Nkwasa wa butùmbi wa Nzambì, ne yìdi miimàne ku Nkwasa wa butùmbi wa Nzambì ayi, ne misòmbèlè. . . miliyaalà ne miliyaalà ne mikùngulù mileemile yà cikondo kumpàlà mene kwà dyulu ne buloba kubangabi, mu Bwikadi bwà Nzambì, nudi nwela meeji ne kî mmimanyè cintu nànsha cimwè pa bìdi bitàngilà dikuukwila anyi? Nènku yìdi yilwa pa buloba ne yibwela buludi munda mwà bantu, ne yikuukwila Nzambì! Kakùyi mpatà to, yìdi yikuukwila Nzambì; ne yìdi ne dimanya dyà Nzambì, ne yìdi ne meeji matwè, ne budimù, ne dilonga dyà tulaasà, misangu yònsò. Kàdi Nzambì wàkayibenga kacya ànu ku cibangidilu!

⁶³⁸ Ki bwà cinyi, mulundà wanyi, buumambàlà bwà èkèleeziyà, anyi—anyì dimanya dyà tèlòlòjì kampànda anyi cintu kampànda, kabyèna ne dipetangana naaCì to. Bìkèngela ciikalè Mashi a Yesù Kilistò ne dilediibwa dipyadìpyà didì dikuswikakaja Nendè bu muntu umwèpèlè. Ki bwalu mbwòbù abu's.

639 Nzambi, ku cibangidilu pàvwàYe mumanyè ne... Balùme ne bakàji bààkenjiibwa umwe, kabàyi bàbidi to, bààkenjiibwa umwe. Bààkatàpuludiibwa, ewu mutèèka mu mubidi ne ewu mu tèòfànî. Ûwva mumanyè nàнку. Pa nàнку bwà kunùjaadikila cyòci aci: pààkenzà Nzambi mukàji, Yèyè kààkangatakù lupwishi kampànda ne kumwenza mwàkenzàYe mulùme amu to; Yèyè wakapàtula lubadi mu luseke lwà Adàmà, ne mukàji wàkalwa cintu cyangata ku mulùme (bwalu yèyè udi citùpà cyà mulùme). NwaCyùmvù mpindyewu anyi? Nwamònu anyi? Ki bwalu mbwòbù abu's.

640 Ki banjèlò mbòbò abu. Ne Nzambi ne nyumà udi muswikàkàne ne Nzambi bàdi Nyumà umwe. Ncyà bushùwà. Mpindyewu, Nyumà wa Nzambi udi musòmbèle mu Èkèleeziyà awu, n'Nyumà udi mufùmìne mu Dyulu, uvwa Nzambi mumanyè kumpàlà kwà difùkà dyà dyulu ne buloba, wàkabènga mashimi a dyabùlù awu. Ne kukèngelabi bwà nyumà awu kwangatayè mubidi wà musunya bwà kwikala...bwà kwangatayè mateeciibwa èndè. Bìwva bikèngela bwà kulwayè mubidi mùvwa mikwàbò eyi milwè amu, ne yònsò ayi yàkatèekiibwa pa cikòkedi cyà mwomùmwe. Nèнку Nzambi, ku cibangidilu, ùwva mumanyè nyumà yìvwà mwà, ne yìvwà kayiyi mwà. Ki bwalu mbwabù's. Démon awu ùdi ne lungènyì lwàbùngì mu mùshindù wà ne ùwva ànu mufwànyine kuseeswisha ne basungula mene, bu ne bìwva mwà kwenzeka.

641 Pa nàнку nyumà eyi, banjèlò bààkayiishà, bàvwà mu bùlokò; *banjèlo*, bu nwènù mwà kucimòna kaaba aka, cidi dileetà dyà “b” mukesè udi umvwija ne m’“muntu”; banjèlo, baamisanjèlèlè pa buloba apa. Bààkenza mpèkaatù, ne mùshindù wùmwèpelè wùvwàkwabò bafwànyine kwenza mpèkaatù wùvwà ngwà kubènga kwitabuujà! Ne mùshindù...Bàvwa ne yàbò ntèndeleele yà sungunga, ne kabààkiitabuujà mukenji wà Noà to. Kabààkiitabuujà mukenji wà Henòkà to. Nèнку bààkabènga Mukenji wàbò awu, “ne bààkapiishiibwa,” Bible mmwambè ne bààkapiishiibwa.

642 Henòkà wàkabàmbila cipròfeta, wàmba ne: “Mukalenge ùlwalwa ne binunu dikùmì byà bansantu Bèndè.”

643 Nèнку bààkamba bipròfeta. Nèнку Noà wàkiibaka bwàtù, kàdi bòbò bààkamba ne: “Yèyè's mmunsantu mubùnguluki wa mu malaba! Mmukoleshi wa maalù! Cintu pààci ne mmvùla kacyèna cilwa to.” Ki bidimu lukàmà ne makùmì àbidi kupitabi, ne yèyè nguvwa ne ntèndeleele uvwa ne lupàndù mu yèyè, kùvwà njila wa dipàndukila mwenjiibwe, kadi bòbò bàvwa basànkishiibwe mu ngiikàdilù wabò awu.

644 Ki mùshindù wùdibi leelù ewu ne, bantu mbasànkishiibwe mu ngiikàdilù wabò. Kàdi kùdi njila wa dipàndukila, ne njila awu mmu Yesù Kilistò. Amen. Ki bwalu mbwòbù abu's: cisàmbà cimwècimwè aci, nyumà yimwèyimwè ayi.

645 Ne kakùyì mpatà to bàvwa batèndeledi, batèndeledi bàà dikèma, kàdi bààkapangila mucipù wà cipungidi.

646 Ki mùdìbi kàbìdi leelù ewu. Bantu bàyaaya mu èkèleeziyà, ne bàkashàala bàà mu èkèleeziyà minene, ne bàteeta kwikalà muntu mutàmbe kumanyika mu cimenga. Bòbò baswè kukashàala bàà mu èkèleeziyà, bàdi bàsungula udi mutàmbe bunène mu cimenga amu, udi mutàmbe bwimpè ne udibò bèelela meeji bimpè mu cimenga awu. Mùshindù mwinè wùdìbo bàpangila dibìikila kule ne kule's wè! Mùshindù mwinè wùdìbo bàCipangila's wè!

647 Mùshindù wùmwèpelè wuwikalàku mwà kumanya Yesù Kilistò nku dibuulula dyà nyumà, kakùyì ku tèlòlòjì anyi ku bungi bwà dilonga dyà Bible dyùdi wenza to. Nànsha wèwè mwikalè mwena Science Chrétienne, Méthodiste, Ntèmù wa Yèhowàh, anyi cyònsò cyùdi aci; nànsha wèwè mwikalè cinyi, kwàdyàkuCimanyinakù ku Dìyì to, Nyumà wa Nzambì ngudi ukubuulwila Yè. Ndibuulula dyà nyumà!

648 Pàvwà Adàmà, mu budimi bwà Edènà, ne Evà, pààkiipaciwbà bânà abu, ki Kaayinà ulwàlwa ne tèlòlòjì mwimpè ewu. Kwambayè ne: "S'bivwa bikèngela bwà Nzambì àmanyè ne tudi twenza eci nku—nku wànyì pàanyì mwoyi wònsò. Nèngiibakè cyoshelu cilenga, nèntèekèpu bilòngò, nèntèekèpu bimuma, nèncivwijè cilenga. Mbushùwà ne ndikù mwà kutuuyisha cilunji cyà Nzambì ku cyòci eci ne kuMuleeja ne ndi ne meeji matòoke mu mwoyi wànyì." Yèyè ùvwa mubingè pa bìdi bitàngila mùvwà Dìyì dyàmba amu; Nzambì ùvwa muswè dikuukudiibwa, ki kuyayè bwà kakuukwila. Kwenzayè mwaba mulenga wà dikuukwila, munène, kàtèdralè kalenga (mùdìbo bàkàbìikila leelù ewu amu). Ki yèyè kucyènza cimpè, kuciibakayè cimpè ne kutèekayèmu cyoshelu; yèyè kàvwa mwena dyabùlù to.

649 Kàdi Abèlè, pa Dìyì dyà Nzambì . . . Kakùvwa Bible mufùnda piinè apu to, kàdi Nzambì wàkamubuulwila ne kacivwa ncimuma cyàkatùpàtulà mu budimi bwà Edènà to, kacivwa mbimuma byà pommes bìvwà Adàmà ne Evà badyè to, kakùyì mpatà to civwa mbintu byà bulùme ne bukàjì bìvwà bibàtàpùlùle ne bibàkòsòlòle. Nèku mumanyè ne bààkalwa bàà cifwàkà, ne ku mashi a Adàmà, ne ku mashi a nyòka nk>wàkabangà cyòci eci, Abèlè, ku dibuulula dyà kùdi Nzambì, wàkaya kangata mwànà wa mùkòòkò ne wàkamulàmbula. Ki Nzambì kwamba Yè ne: "Ki Cyòci aci!" Bushùwà's.

650 Pààkatùulukàbo ku Mukùnà wà Dikùdimuka dyà mpàla, Yesu wàkambà ne: "Bantu bàdi bàmba ne Mémè Mwànà wa muntu Ndi Nganyi?"

651 "Bàmwè bàdi bàmba ne Wèwè udi 'Mòsà,' ne bàmwè bàdi bàmba ne Wèwè udi 'Eliyà,' ne bàmwè bàdi bàmba ne

Wêwè udi ‘Yelèmiyà,’ ne bàmwè bàdi bàmba ne Wêwè udi ‘Mupròfeta awu.’”

652 Yèyè ne: “Kàdi nwênù nudi nwamba ne Ndi Nganyi?”

653 Peetèlò kwambayè ne: “Wêwè udi Kilstò, Mwànà wa Nzambì udi ne mwoyi.”

654 Yèyè kwamba ne: “Udi mubènèshìibwe, Simonà Bààyona, bwalu kí munyìinyi ne mashi bìdì bikubuulwile eci to.” (Tàngilààyi!) “Kí nnànsha ku dileetà, kí nnànsha ku kàlaasà kalonga to; kùtu mucìlongè mu sèminèrè kampànda, anyì muntu kampànda mukwambileci to. Kí mmunyìinyi ne mashi bìdì bikubuulwile eci to, kàdi Taatù Wanyi udi mu Dyulu ngudi mukubuulwileci. Nènku pa lubwebwe elu mpâNgìbakilà Èkèleeziyà Wanyi, ne biibi bya ifernò kabyèna mwà kuMutàmba bukolè to.” Kí bwalu mbwòbù abu’s. Kí Èkèleeziyà wa Nzambì udi ne mwoyi nyawù. Kí cyòci aci. Pa èkèleeziyà awu... Pa *dibuulula* adi, mpàdi Èkèleeziyà ewu mwibakila. Ndibuulula dyà kùdi Nzambì didi Nzambì mubuulùle, dyà ne Yesù Kilstò ùdi Mwànà wa Nzambì, ne wêwè wâMwitabi bu Musùngidi webè sungasunga, wumùkù ku lufù wâyi ku Mwoyi.

655 Ne Nyumà Mwîmpè ùdi munkaci mwà kutwà eku ne eku ne ùkwàta mudimu mu bidimba byà Mubidi ewu. Kí Èkèleeziyà nyawu! Nànsha mwikàle mupèlè, ne mu kaacitanda, ne nwênù biimànyine pambèlu mwinshì mwà mucì wà pin mu mwaba kampànda, nànsha piikàle penyi, nànsha cyòci ciikàle mu nzùbu wa muntu kampànda mu disangisha dyà mu musokoko, nànsha difwànyine kwikala penyi. Bulenga ne bikwàbò abi kí mbìdì bikwàta lungènyì lwà Nzambì nànsha. Mmeeji matòoke a mu mwoyi ku dibuulula dyà ne Yesù Kilstò mmuleejiibwe bu Mwànà wa Nzambì, Musùngidi wetù sungasunga. Amen!

656 Èkèlekèlè, tudi...kwenàku ulenga mikwàbo eyi to, bwà mutùyaaya emu, kí mmwòmò anyi?

657 Kí bôbò abu bàdi...bààkayiilàYe abu; banjèlo abu: baamisànjeelà, bayiishi abu, beena mamanya a mu mitù abu, baamisànjeelà bàvwà kabàyi biitàbùùje pàakayà Noà kabàyiisha ne kubàmbila ne: “Mona’s, bwelààyi mu bwàtù ebu.”

658 Kwambabò ne: “Anji tèèlejààyi ànu munsantu mubùnguluki wa mu malaba ewu. Anji tèèlejààyi ànu mukoleshi wa maalu wàwa. Mòna’s, kakwènà mvula to. Nganyi ukààdikù muumvwè cintu bu nànkù? Mòna’s, èkèlekèlè, twètù aba katùtukù ne maèkèleeziyà anyi? Katwènakù batèndeledi anyi?” Mòna’s, bôbò’s bàvwà batèndeledi’s!

659 Yesù wàkamba ne civwa ne cyà kwikala lukòngò lwàkapità ànu díbà adi alu, lùvwa ne cyà kwikala lwólò lukòngò alu lùvwà ne cyà kumwènèka cyàkàbìdì pabwìpì menemene ne Dilwa Dyèndè: “Ànu mwàkadìbì mu matùkù a Noà, kí mwikalàbì kàbìdì ku dilwa dyà Mwànà wa muntu. Bwalu bàvwà bàdya,

bànwà, bàsèlangana, bàsèleshangana.” Bàvwa ne Reno, Nevada kampànda musangu awu, mu mwaba kampànda. Bàvwa ne maalu a lukutukutu a mìshindù yònsò àdìbo naawù leelù ewu aa; bàndalala, bànyà mu masànka, bèelulwilangana, baseki ne bikwàbò; biikàle ne cimwènekèlu cyà difwànà dyà Nzambi, kàdi bàvila Bulelèlèlè bwètù bwà cyà bushùwà ebu: cipungidi, Mukenji wà ngàsà. Nzambi munkaci mwà kusebela njila Wendè, ne ùpèèsha bantu cipungidi Cyèndè—Cyèndè, mùvwàbo mwà kupànduka; Cìvwa ne lupàndù munda mwàci, lupàndù ki lùvwa mwaba wà kupàndukila.

⁶⁶⁰ “Cìtùdì tukèbela lupàndù ciinè ncinyi?” Leelù ewu bantu bàdi bàmba ne: “Twètù katwènakù ne mwoyi mu mùshindù mwímpè wà bukalenge bwà mungàlààtà anyi? Cidi cìtùkèngelà ki cinyi?”

⁶⁶¹ Nànsha twètù ne mwoyi mu bukalenge bwà mungàlààtà bwà mùshindù kaayi, tudi dijinga ne Mashì a Yesù Kilistò. Cyà bushùwà! Tudi dijinga ne Kilistò. Mèmè ndi ngaanyisha mùshindù wà bukalenge bwà mungàlààtà; aci kacýèna ne bwalu nànsha bùmwe, bwà dýenza ne lupàndù lwà musùukà to. Kakùyì mpatà to! Makalenge miinè awu’s neàpitè, ne ditùnga dyònsò nedipitè. Ne mèmè nkààdikù mwimanè ku luseke lwà. . . mwaba wàkiimanà baaPàlò, kàdi bikaadi bìkèngela bwà kuumbula mu ntàntà wa mètres àsambòmbò mwinshì mwà buloba bwà kupeta nkwasà yàbò yà bukalenge mwaba wùvwàyi yìsanganyiiibwa. Baapàlò bònsò ne makalenge àbò a pa buloba ebu awu, ne bintu byàwù byònsò byà kabíyi nshìndameenu abi nebìpangilè ne nebiye mwamwamwa, kàdi Yèhowàh neàkookeshè kashìdi, bwalu Yèyè ki Nzambi udi kàyi ufwa awu. Twètù tudi biimàne bashìndàme pa Kilistò Yesù Lubwebwe, bwalu myaba mikwàbò yònsò nduntekà.

⁶⁶² Nànsha byòbì ne . . . makalenge neàjuukè ne neàpangilè, kàdi kaa, kakwèna cintu nànsha cimwè. . . nànsha byòbì ne . . . ncintu kaayi; kakwèna cintu nànsha cimwè cìdiku mpindyewu, cintu nànsha cimwè cicilwalwà, cintu nànsha cimwè (nzala anyi njìwù mikolè anyi nì ncinyi) cidi mwà kutùtàpululakù ne dinanga dyà Nzambi didi mu Kilistò to. Pàdi muntu mulediibwe kùdì Nyumà wa Nzambi, kacýèna kàbidì cifùkiibwà cyà cikondo to, kàdi yèyè ncfifùkiibwà cyà Cyèndèlèlè. Amen. Ùkaadi muumùke ku lufù muyè ku Mwoyi. Ùkaadi muumùke ku . . . Ùkaadi mupicìle mu cintu pààci ne ncikondo, mubwelè mu Cyèndèlèlèlè. Kèna mwà kubùtukakù to! Ne Nzambi wàkadìcipa ne Yèyè neàmubiishe ku lufù mu matùkù a ndekeelu.

⁶⁶³ Pa nànkù bóbò bàdi mwà kwikala ne èkèleeziyà yènú minène yònsò ayi, ne bikondo byènú byònsò byà dicyònkómoka abi, ne byònsò binùdì nujinga kwenza abi, ne kwenza minèkù yènú yà bundù ne manàyi ènu a Mubèlè awu, ne byàkudyà byà nsupù ne bikwàbò byònsò binùdì baswè kwenza abi; ne kwimanyika muiyiishi kampànda wa mulongè tulaasà mwaba

awu. Pàmwápa yéyè ùdi mwà kwenza mudimu mutàmbe bwimpè mu cintu aci kutàmba tunsongààlùmè kukesè twà kale tùdi katùyi nànsha tumanyè ABC etu. Kàdi mèmè ndi nkwàmbila bulelèlè ne, mbipìciibwe ne mèmè mwikàle ne nsongààlùmè udi kàyì mumanyè ABC ùnyiisha (mwikàle mumanyè Kilistò) pamutù pàà beena tèlòlòjì banène bònsò bàdi ne malonga ènù ònsò àdìbo mwà kudyèlela meeji awu. Kakùyì mpatà to!

⁶⁶⁴ Mu Kentucky emu, ànu àbìdì àdi panshi aa, nsongààlùmè kampànda mukesè wa kale uvwa kàyì nànsha mumanyè kubala dìnà dyèndè sungasunga, kwambayè ne Mukalenge mmumubiikile bwà kuyiisha nènku mwikàle ùkèba nzùbu wa tùlaasà. Mòna's, bakòòkeshi bàà cimenga kabààkaswàku bwà àmwangàtè to. Muiyishi munène kampànda kupìcilayè mwaba awu ne dìnà bu njila wa ku màyi mòna bule, docteur kampànda munène mu tèlòlòjì, mòna's, kumushiilabò yéyè bwà àngatè cilongelu aci. Bushùwà's. Kwenzayè ditàbuluja dyà mbingu yìbìdì, musùkà nànsha wùmwè. Kàdi tatwèndè kwalukilayè, kwambayè ne: "Mpindyewu mushiilaayi àcyàngatè, mèmè ntu mfuta bitàdi, ndi ne bukenji bwà mwanàanyi kucyàngatayè. Nènku bìvwa bìkèngela bwà mwanàanyi wa balùme àcyàngatè pèndè."

⁶⁶⁵ Pa nànkù kwalukilayè bwà kusangana, ne kubàlòmba, bòbò kwamba ne: "Èè, netùmushiilè àcyàngatè bwà malòlò òwò makesè ngàbìdì." Kwenzabò nànkù ne kumushiilabò ùcyàngata bwà malòlò àbìdì.

⁶⁶⁶ Ki dilòlò adi nsongààlùmè wa kale mukesè awu kujuuka mwaba awu ne wa bwalu kàyì nànsha mumanyè kubala Bible to, kwambilayè muntu kampànda bwà àmubadilè mifùndu. Kàdi dyà ùseemena pa cibùmbà cyà ku cyambilu, kulaabiibwayè ne Nyumà Mwimpè. Nènku pàakayiishayè, bantu batwè ku makùmi àbìdì kulwabò ku cyoshelu; ne muiyishi muditu wa mènà awu kuyayè too ne ku Kàlvaryò wènda ùdila mwadi, ku cyoshelu.

⁶⁶⁷ Bushùwà's, mwanèètù, cìdì ne mushinga kî—kî mbyùdì mumanyè to, ng'Ewu ùdì mumanyè. Ki mmwènenù nyéyè awu, kì cìdì cikèngediibwà, bìdì bìkèngela kumanya Kilistò. KuMumanya Yéyè, kì Mwoyi; kuMubènga, ndufù.

⁶⁶⁸ Tùyaayi lùkàsà ku nkonko yètù mikwàbò ayi, ku nkonko mpindyewu yìyaaya ku Géorgie ayi:

67. Mabwe adi mu. . . àleeja cinyi mu Bwàkabuulwibwà 21.19 ne 20?

⁶⁶⁹ Panwikalà baswè kwangata dìbà bwà kubuulula Bibles yènù, byà bwalu katwèna ne dìbà dyàbúngì mpindyewu to, kàdi nènてete bwà kuyàndamuna lùkàsàlùkàsà. Bwàkabuulwibwà makùmi àbìdì ne. . . Ngeela meeji ne m'21.19 ne 20. Èyowà.

⁶⁷⁰ Èyo, mwómò amu nenùjandulè ne yéyè ùvwa wàkula bwà mabwe àvwa miibakila mu nzùbu awu. Ne mabwe awu àvwa mbishìmikidi. Bu nwènù mwà kumòna. . . Ndi ngiitabuuya cyà

bushùwà ne udi naaci mwaba awu, Mwanèètù Neville. Ne dibwe dyònsò òwva cishimikidi. Kaciyi dibwe òmwè diikàle cishimikidi, ne makwàbò. . . Kàdi dibwe ne dibwe dyònsò òwva cishimikidi. Dibwe ne dibwe dyònsò òwva cishimikidi cyà dibà dyònsò. Ne kùvwa mabwe dikùmi ne àbìdì. Ne bu nwènú mwà kumòna mabwe dikùmi ne àbìdì awu, kupèèsha dibwe ne dibwe. . . Dyàmbedi kubanga ne yaspà, ne sardoine, ne bikwàbò mùshindù awu, bileeja dibwe ne dibwe.

⁶⁷¹ Mu Bible amu nenùsanganè ne àvwa àbìikidibwa ne mmabwe kampànda. Àmwè a ku òwò ne dishiilangana ndambù, kacya kanùyikù banji kudyùmvwa to. Nwènú baalùje mèsù mu nkòngamyakù nenùsanganè ne ndibwè òmwè òmwè adi, cibì ànu ne òna dishiilàngàne; dishintùlùke.

⁶⁷² Kàdi bìdì bìbanga ne—ne yaspà. Yaspà òwva ndibwe dyà—dyà Benyàmìnà, anyi, dibwe dyà. . . kaa, mwànà a balùmè wa kumpàla awu, Luubènà. Dibwe dyà kumpàlà òwva n’Luubènà, òwva diikàle yaspà. Dibwe dyà ndekeelu òwva m’Benyàmìnà, dibwe dyà ndekeelu kumutù.

⁶⁷³ Mpindyewu, mabwe dikùmi ne àbìdì pàvwa paashila bishimikidi awu, mabwe awu—awu dikùmi ne àbìdì àvwa malembeleja pa cibwikilu cyà pa cyàdi cyà Aalònà. Ne àvwa—àvwa àleeja ne, yèyè nguvwa mwakwidi munène wa—wa bisàmbà ebi. Dyònsò dyà ku mabwe àbò a cileledi awu mwòmò emu, mu citaata eci—eci. Ne pàvwa bantu bàmona citaata eci, bàvwa bàjingulula ne Aalònà òwva mwakwidi munène wa cisàmbà cijimà aci, pàvwa bò bàmona dibwe dyà cileledi adi mu citaata eci.

⁶⁷⁴ Mpindyewu, patwàbwedì mu dinda emu mu diyiiisha dyà Mwanèètù Neville. Ne misangu yàbùngi bàvwa bàlwa ne Ulimà-Tuumimà. Nudi nucimòna cifundibwe mu Bible bu mùshindù wà bàmanya ne mukenji wàbò wùvwa Bulelèlè anyi to. Mabwe awu, pàvwa bò bàbanga kwamba cìvwa muntu awu mwambè, mupròfètà òwva wàmba cipròfètà, ne mabwe awu àvwa àfila bukènkè ònsò pàmwè. Àvwa ènza cisumbù cyà makènkè àvwa àngacila ku dibwe dyà saafilà, ne dyà yaspà, ne dyà escarboucle, ne mabwe makwàbò ònsò awu àfila bukènkè bwàwù, cìvwa cyènza diikala ònène dilenga dyà mwanzankòngòlò òwva disambakajà cintu cyònsò aci pàmwè.

⁶⁷⁵ Mpindyewu, mpindyewu, leelù ewu, pàakuumushiibwà Ulimà-Tuumimà awu pàmwè ne bwakwidi abu, mpindyewu Bible ewu ngudi Ulimà-Tuumimà wa Nzambì leelù. Ne pàdi muiishi òyiisha, kacýèna ne cyà kwikala ànu kaaba kakesè kàmwèpelè apa, ne ki pòpò apu pàdiye òtèekela dyèndè òtèkemena nànsha; cidi ne cyà kwikala Bible mujimà mwikàle òleeja mukenji wùdi muntu awu òyiisha. Ki cintu ncyòci aci. Kaciyi ànu kaaba kàmwèpelè to, wàmba ne: “Èè, Bible òdi wàmba cikampànda.” Kaa, bushùwà, òdi wàmba bintu

byàbúngì. Kàdi wêwè udi ne cyà kwenza bwà bíteekiibwè byònsò pàmwè. Nènku pàdi Nyumà wa Nzambi ùlwa ùbwela mu—mu Dîyì, Ùdi ùbitèèka byònsò pàmwè ne ùfla Bukênkè bunène menemene bùmwèpelè, ne Bukênkè abu bùdi Yesù Kìlistò. Amen.

⁶⁷⁶ Mpindiewu, mabwe dikùmi ne àbìdi aa àvwa mbishimikidi dikùmi ne bibìdi byàkabangà ne Luubènà, ne Gaadà, ànu nànkú too ne ku Benyàminà; bisàmbà dikùmi ne bibìdi, mabwe dikùmi ne àbìdi. Ne mabwe a mu Ntempèlù awu, mu Yèlusàlèmà mupyamùpyà wa mu Dyulu, cishìmikidi cyònsò necíteekiibwe pa umwe wa ku bankambwà.

⁶⁷⁷ Mpindyewu tàngilàayi, nudi bamòne mabwe awu, mpindyewu nenùtangilè bankambwà abu baleejìibwe mu cintu kampàndà cikwàbò, ànu mu lukwàbò lukonko's.

68. Umvwijàku—Umvwijàku mwinàyi. . . nyama yinaayi ya mu Bwàkabuulwibwà 5 ayi.

⁶⁷⁸ Mwanèètù Neville, wèwè ne cyôci aci pabwìpì, anyi umwe wa ku nwènù aku, cyà Bwàkabuulwibwà 5, netùcibalè bwà katanci kakesè cyanàànà. Nci—ncimfwànyì cilenga mwaba ewu cyà. . . Ncyôci eci, ndi naaci mèmè mwinè, Bwàkabuulwibwà nshapità mwi5:

Ne nàkamòna mu cyanza cyà dyàbalùmè cyà yéyè uvwa musòmbe pa—pa nkwasà wa butùmbe awu mukàndà mufùnda munda ne pambèlu ne—ne—ne paanyimà, mutwà bitampì mwandamutekète.

Nènku ndi. . .

⁶⁷⁹ Mpindyewu, awu kì mmwaba mwinè to. Ndi njinga kuya ànu kumpàla ndambù, nyama yinaayi ayi. Tùmonèbi, mvensà wa 14. Èyo, mukalenge. Mpindyewu mpòpò apa, ncyà bushùwà. Mpindyewu tùbangilàayi ku—ku mvensà wa 12 eku, to, ngeela meeji. . . “Ne nyama yinaayi ayi yàkamba ne: ‘Amen.’” To, kùdi kaaba kakesè paanyimà pàa cyôci aci, Mwanèètù Neville. “Mònaayi, ngàkumvwa dîyì. . .”

⁶⁸⁰ Twánjibi kumòna, katanci kakesè cyanàànà, s'vwawa mpàbala ànu katanci aka's. Kaa, mpòpò apa, tùbangilàayi ku mvensà mwi6. Mvensà mwi5:

Ne umwe wa ku bakùlù abu wàkangambila ne: Kùdidi to: mòna, Ntambwe wa cisàmbà cyà Yudà, Muji wà Davidì, wàcimunu bwà kubuulula mukàndà, ne bwà kutùula. . . bitampì byàwù.

Ne ngàkatàngila, nènku, . . . munkaci mwà nkwasà wa butùmbe ne. . . nyama yinaayi ayi, ne, munkaci mwà bakùlù, mùvwa mwimàne Mwànà wa mùkòkò, bu uvwa mushebeya, mwikàle ne mitù mwandamutekète ne mèsù mwandamutekète, àdi Nyumà mwandamutekète. . . mitùma kùdi. . . pa buloba.

681 Ndi muswè nùlamè lukonko alu, ne mèmè nciyi mulùmvwijè kwinsihì eku mu katanci kakesè emu to, Ndi muswè bwà nwalùmvwùlwijakù, ndi muswè kwakulapù, “Nyumà mwandamutekètè yà mèsù mwandamutekètè àvwà pa Mwànà wa mùkòkò awu” awu. Kaa, aci’s ncintu cilenga cyà dikèma’s. (Ee, tudi baswè mpindyewu kwangata lukonko lwà mwanèètu wa balumè ewu elu.) Èyo, mpindyewu kanùpu aci mwoyi to.

Nènku yéyè wàkalwa ne wàkangata mukàndà mu cyanza cyà dyàbalùmè cyà yéyè uvwa musòmbe pa nkwasà wa butùmbi awu.

Ne pàakamanàye kuwàngata, nyama yìnaayi ayi ne bakùlù makùmi àbìdì ne bànaayi abu bààkapòna panshì kumpàlà kwà mwànà wa mùkòòkò, . . . yònsò wa kùdìbo mwikàle ne nkòmbè, . . .

682 Mpindyewu, ayi ki—nyama yìnaayi—yìnaayi ayi kaaba aka, bu nwènù mwà kumòna. Mpindyewu tùtungunukàayi ne tùbalèku ànu too ne kwinsihì ndambù:

. . .nkòmbè yà ngòlò, . . .myùle tètè ne mpànza ne mapembu . . .ne masambila a bansantu.

Ne bàvwa bìmba musambu mupyamùpyà, . . . Wèwè udi mwakànyine . . .(ne kutùngunukabò ne kwenzabò . . .dikuukwila dyàbò dyònsò kùdì Mukalenge)

683 Mpindyewu, nyama yìnaayi ya mu Bwàkabuulwibwà eyi, bu nwènù mwà kuyimòna, mwaba wònsò . . .(Nwènù babadi bàà Bible, ne muntu wìkala mwà kutèèleja mukàbà wà mèyi ewu awu). Nyama yìnaayi ayi, yìvwa ne mpàla yìnaayi: umwe úvwa ne kwìsù bu kwà muntu, mukwàbò úvwa ne kwìsù bu kwà ngombe, ne mukwàbò ne kwìsù bu kwà nyuunyi wa mukankù, ne mukwàbò ne kwìsù bu kwà nyama wa ntambwe. Ne kayìvwakù yìya mitàngile paanyimà to, kayìvwakù mwà kuya mitàngile paanyimà to.

684 Mbanganyi bàdiku bavùlùke mukàndà wà kale wà Bwàkabuulwibwà awu pàakacìlongeshàbo kùkaadi bidimu, pàngàakangatà bidimu bitwè ku bìbìdì kaaba aka pa Mukàndà wà Bwàkabuulwibà awu? Bààbùngì bàà bikondo byà kale mbavùlùke.

685 Tàngilàayi, kayìvwakù mwà kuya cyànyimanyìma to, bwalu mùshindù wònsò wùvwàyi yìya awu yìvwa yìya kumpàla. Yòyi yìya mu *nùнку*, yìvwa yìya bu muntu; yòyi yìya mu *nùнку*, yìvwa yìya bu nyama wa ntambwe; yòyi yìya mu *nùнку*, yìvwa yìya bu nyuunyi wa mukankù; yòyi yìya mu *nùнку*, yìvwa yìya bu ngombe. Nwamònu’s, kayìvwakù mwà kuya cyànyimanyìma to, yìvwa yìya mitàngile kumpàla dìbà dyònsò.

686 Mpindyewu nyama yìnaayi ayi. Mpindyewu bwà kwangata cyòcì eci lùkàsàlùkàsà, bwalu ncyèna muswè kushàala ntàntà

mupitèpite bule pa cyôci eci to. Kàdi nyama yinaayi ayi... *Nyama*, mu Bible, ùdi ùleeja “bukole.” Nènku nudi numòna ne nyama eyi kuntwaku kayìwwa yipàtukila mu dijiba anyi mu mbú mwaba kampànda yipàtukamù to, kadi yìwwa ku Nkwasa wa butùmbi wa Nzambi, ne yìwwa yikuukwila Nzambi. Nyama yinaayi ayi yidi yùmvwija makolè ànaayi àdi àpàtuka mu buloba, ne makolè ànaayi awu àwwa ng’Èvànjeeliyò yinaayi: Maatàayi, Maakò, Luukà, ne Yone; umwe kèna wamba bibèngangana ne mukwabò to.

⁶⁸⁷ Ne umwe wa ku yôyi, wa... Pàdi Èvànjeeliyò ùpàtuka bu nyama wa ntambwe, mmumishe mu dísu, ùdi ne bukitù; Èvànjeeliyò ùtu ne dikima bu dyà nyama wa ntambwe, ne ùdi mfùmù bu mùdi nyama wa ntambwe. Yèyè ùya ne mpalà wa muntu, mmudimùke ne ne budimù mùdi muntu. Yèyè ùya bu nyuunyi wa mukankù, ùdi ne mapwàpà a lubilu ne mu mau lu matùmbùke. Ùdi... Nudi bamòne cindì muswè kwamba aci anyi? Yèyè ùya bu ngombe, nkabalù kàà mudimu kàdi mwà kukòka, ngombe wa mudimu udi ukòka bu—bu—bujitu bwà Èvànjeeliyò. Nyama yinaayi ayi yìwwa mmakolè ànaayi, àwà: Maatàayi, Maakò, Luukà, ne Yone; Èvànjeeliyò yinaayi yidi yikòbola mu Bwikadi bwà Nzambi. Cìwva... .

⁶⁸⁸ Nwènù bamòne, yìwwa ne mèsù kumpàla ne paanyimà. Yìwwa—yìwva... Kwònsò kùvwàci ciya, cìwva cìleeja. Yìwva yimòna kwònsò kùvwàyi yìya. Ne aci ki bukolè bwà Èvànjeeliyò pàdìbu bupàtuka, bùdi mwà... Ùdi ne budimù bwà muntu; ùdi ne lubilu lwà nyuunyi wa mukankù; ùdi ne—ne—ne—ne bukolè, bukolè bwà dikòka, bwambudi bwà bujitu mùdi ngombe; ùdi ne—ne dísù dyumisha ne bukitù bwà nyama wa ntambwe. Nwamònu’s, ng’Èvànjeeliyò yinaayi ayi, yidi makolè ànaayi a Bwàkabuulwibwà, nshapità mwi4.

Èyo, mpindyewu lùdi lùlondà:

69. Bakùlù makùmi àbìdì ne bànaayi abu mbanganyi? Èyo,
ngeela meeji ne alu ndufwànyine kwikala pa—pa... **Bakùlù**
makùmi àbìdì ne bànaayi abu mbanganyi?

⁶⁸⁹ Mpindyewu alu lùdi ànu lupeepèle, tudi bafwànyine kuyakù. Bakùlù makùmi àbìdì ne bànaayi abu bàwva basòmbe kumpàlà kwà Nkwasa wa butùmbi. Aci mmu... Ngeela meeji ne mmu mvensà mwi4, mmùdici cìsanganyiibwa. “Ne kwàkapàtuka mukwabò...” Ndi muyè ku... Twànjibi kumòna, ndi ne... 4.10.

⁶⁹⁰ Èyo, Bwàkabuulwibwà, nshapità mwi4, ku mvensà wa 10. Ncyà bushùwà. Netùfikèku.

Ne bakùlù makùmi àbìdì ne bànaayi abu bààkapòna pànshì kumpàlà kwà yèyè uwva musòmbe pa nkwasa wa butùmbi awu, ne bààkakuukwila yèyè uwva ne mwoyi kashidi ne kashidi awu, ne bààkeela bifulu byàbò byà

butumbi kumpàlà kwà nkwaswa wa butumbi aku bàmba ne,

Wèwè udi mwakànyine, Èyì Mukalenge, bwà kupeta butumbi ne luumu ne bukolè; bwalu wèwè ngudi mufuke bintu byònsò, ne bwà disànkà dyèbè byôbi bidikù ne byàkafùkiibwa.

⁶⁹¹ Mpindyewu bakùlù makùmi àbìdì ne bànaayi. Mukùlù mmutàngidi. Mpindyewu mōnaayi, bàvwa mbankambwà dikùmi ne bàbìdì ne bàpostòlò dikùmi ne bàbìdì. Ne bōbō bàvwa basōmbe, dikùmi ne bàbìdì ku luseke lùmwè ne dikùmi ne bàbìdì ku luseke lukwàbò. Ki bakùlù makùmi àbìdì ne bànaayi bàvwa mwaba awu abu, bàvwa biikàle bankambwà dikùmi ne bàbìdì ku luseke lùmwè, Dipungila Dikùlukulu; bàpostòlò dikùmi ne bàbìdì luseke lukwàbò, bàà Dipungila Dipyadìpyà. Yesù kààkambakù ne: “Nwènu nenwikalè basōmbe pa nkwaswa ya butumbi dikùmi ne yìbìdì, nulumbulwisha bisàmbà dikùmi ne bibìdì bya Izalèlèlè” anyì?

⁶⁹² Mpindyewu, bishimikidi abi. Tàngilàayi, mùdi mene ne mucì muntwamu. Ne mucì ku luseke ne ku luseke wùdi wùkwàma bimuma mìshindù dikùmi ne yìbìdì. Ne yìdi yìkwàma bimuma byàyi musangu wùmwè ku ngondo, cìdi ciikàle ngondo dikùmi ne yìbìdì ku cidimu. Yìdi yìfila bimuma mìshindù dikùmi ne yìbìdì ku cidimu cyònsò pàdici cipita apu. *Dikùmi ne ibìdì*, mu nombà wa “dikuukwila,” nudi numòna’s. Ne kùdi makùmi àbìdì ne kùdi bànaayi, bafwànyine kwikala makùmi àbìdì ne bànaayi, bàpostòlò dikùmi ne bàbìdì ne bankambwà dikùmi ne bàbìdì. Mbasōmbe ku Nkwaswa wa butumbi.

⁶⁹³ Èyo, mpindyewu mvensà mwi4, anyì, lukonko lwinàyi:

70. Mwonjì mukùnze wùvwa wùleeja cinyi mu Genèsè 38?

⁶⁹⁴ Mwonjì mukùnze awu, bu nwènu mwà kumòna, wùvwa n’Yudà. Ne yèyè ùvwa ne bânà bàà balùmè, ne umwe wa ku bânà bèndè bàà balùme abu wàkasèla mukàji wa beena Kaanààna. Ne mukàji wa beena Kaanààna ewu kàvwakù ne bânà to, kàdi mwanèndè wa balùme awu kufwà. Musangu awu, mikenji musangu awu bìvwa bikèngela kwangata. . . bikèngela bwà mwànà wa balùme uvwa ulonda kwangatayè mukàji wa mwanààbò awu, bwà kujuudilayè mufwè awu dimiinu. Kàdi muntu mukwàbò awu kààkatwà ku ciinè aci bwà kwenza cìvwa cìkèngelà kwenzayè to, ki Mukalenge kumushebeya. Pashiishe ùvwa ne mwànà wa balùme mutekète; ki Yudà kwambayè ne: “Indilà too ne pààfikà mwànà wa balùme ewu. . . mukolè mu mùshindù wà usèdiibwa kùdiye.”

⁶⁹⁵ Kàdi pààkakilaye mu mùshindù wà ne ùvwa ne cyà kusèla mukàji uvwa wa bakùlù bèndè bàbìdì awu, èè, bìvwa bìmanya ne yèyè nguvwa wàngata mukàji awu díbà adi, bwà kujuudilayè bânà bààbò bàà balùme bàbìdì bàvwa. . . bàvwa bafwè kumpàlà kwèndè abu dimiinu. Yudà kààkapèesha mukàji awu (mukàji

wa beena Kaanàànà awu) mwanèndè wa balùme to, mwànà wa balùme awu, kàdi wàkamulekela wèndela yèndè. Ki mùkàji awu kumònayè ne ùvwa wènza bibi, ki kupàtuka e kudìbwikilayè cibwikilu kwìsù, ne kusòmbayè mu mwaba wà bantu bònsò mùdi ndumbà mufwànyine kusòmba amu.

696 Yudà wàkalwa mwaba awu e kwangatayè mukàji awu bu mukàjèndè, ne yèyè ùvwa ndumbà, ne wàkalaàla nendè. Ne kwambayè, mukàji awu kwambayè ne: “Èè, ncinyi ciwàngeyekà bu cyeyà?” Ki yèyè. . . mukàji awu ne. . .

697 Yèyè ne: “Ndi mmupèèsha kâ—kânà kàà mbùji.” Yèyè ne: “Èè, mpèèshè cimanyinu cyà ne neucyènzè.” Ki mukàji awu kwangatayè mulangala wèndè awu ne citampì cyèndè ne bikwàbò, ne kubilamayè.

698 Nènku pàakatwàlâbo kânà kàà mbùji aku, kabàcivwa mwà kupeta ndumbà awu to, bwalu yèyè kàvwa ndumbà to.

699 Paanyimà pàà cikondo, yèyè kumwènka ne ùvwa ne difù. Ne pàakalwàye kumwènka ne ùvwa ne difù, kulwàbò kwambila Yudà ne: “Mukàj’ a mwanèèbè awu mmwendè bundumbà.” Bòbò ne: “Bwalu yèyè ùdi—ùdi ne difù, ne bânà bèèbè bàà balùme bònsò babidi mbafwè.”

700 Yèyè ne: “Èè, nebàmubiikilè àpatukè, ne bàmwoshè.”

701 Ki kutùmayè mukenji kùdi Yudà, kwambayè ne: “Muntu udi mwenzè bwalu ebu awu, ki mwena mulangala ewu ne citampì eci.” Eyo, s’ùvwa ntatwèndè—mwenu.

702 Ki kwambayè ne: “Mukàji awu mmwakàne kuntàmba mèmè.”

703 Mpindyewu, pàakamanyà mukàji awu ne bìvwa bikèngela bwà bânà bèndè kulediibwabò, bàvwa bàà mapàsà. Nènku pàvwà dipàsà adi. . . Mwànà wa kumpàla uvwa ne cyà kulediibwa, mu cilèlè cyà kale cyà beena Yudà, mwànà wa kumpàla ngudi ne bwanààbutè, mwànà wa kumpàla ku dipàtuka awu. Nènku yèyè awu, vùlukaàyi ne, ki uvwa mwanèndè wa kumpàla. Nànsha umwe wa ku bakwàbò bânà bàà balùme abu kàvwaku mulelè bânà ne mukàji awu to. Kacya yèyè kàvwakù mwanji kulela mwànà to too ne pa diine dibà adi.

704 Kàdi pàakapàtukà mwanèndè wa kumpàlâ awu, cìvwa ànu cyanza. Ki mukàji muleleshi kukùswikayè mukùsù mukùnze, bwalu mukùsù mukùnze wùvwa wàmba bwà bupikudi bìvwa mwànà wa balùme wa kumpàla wa virgò Màriyà mwà kwikala. . . kwikala ne mukùsù mukùnze wà bupikudi.

705 Kàdi pàakakòkàye cyanza ne kucìpingaja munda, mukwàbò awu kupàtukayè yèyè kumpàla. Nènku pàakenzàye nànkù, muleleshi kwambayè ne: “Wenjì nùnkù bwà cinyi? Mukwàbò awu’s ngudi ne bwanààbutè.”

706 Nènku aci ki cìdì Genèsè 38 ùmvwija, nudi numòna’s. Mbwena kwamba ne mwànà wa kumpàla ùvwa ùshààla too ne

ku dilwa dyà Mukalenge Yesu Kilistò. Mbwená kwamba ne wa kumpàla awu ùvwa mwinshì mwà mukenji wà bupikudi.

⁷⁰⁷ Nudi bamanyè ne ntu mwambè. . .kampundu kakesè aku, nudi bamanyè's, kängämbi aku ne, mùvwa twísù twàkù. . . ne bikwàbò byònsò, tuumaci twàkù ùvwa tunyekàmija, kàdi, pìikalàbi ne nkalediibwe ne bwanààbutè, mwànà wa mùkòòkò udi kàyì mwenzè bwalu ne mupwàngàne awu, ùvwa ùfwa pa mwaba wàkù. Ki cyòci aci.

⁷⁰⁸ Pa nàнку aci cívwa mbwà bwanààbutè. Mwànà wa kumpàla wàkapàtuka munda mwà maamù awu, nènku bàakamòna cyanza aci (ki kumanyabò ne cívwa cifwànyine kwalukila cyàkàbìdi). Nènku pàakatùmàye cyanza bwà kuleeja ne yèyè nguvwa naabù, yèyè nguvwa wa kumpàla, muleleshi wàkaswikakù mwonjì mukünze awu kàdi yèyè kukòka cyanza e kucyàluja. Nwamònu anyi? Kàdi, kakùyì mpatà to, yèyè nguvwa wa kumpàla. Ki cívwa mwonjì mukünze ncyòci aci, mwonjì mukünze wùdi ne. . . mu Bible mujimà, cívwa cyùmvwija bupikudi; ciikàle cifunkuna kumpàla ku mwànà wa kumpàla uvwa ulwa awu.

⁷⁰⁹ Kabalù kàà kumpàla kàvwa kàlediibwà, ngombe wa kumpàla ùvwa ùlediibwa, cyònsò cívwaaku aci, cintu cyònsò cívwa cilediibwa cyà kumpàla aci (cívwa cìlwa kumpàla aci) cívwa mwinshì mwà bupikudi, bìvwa bikèngela cìpikudiibwè; bìvwa bikèngela bwà cintu cyònsò cìpikudiibwè! Àlèluuyàh! Kaa, aci's cidi cìntùpisha ne disànkà be. Nudi nucyùmwa anyi? Bìvwa bikèngela bwà *wa kumpàla* àpikudiibwè. Cívwa mmukenji. Dìnà dyà Mukalenge dìbeneshiibwè!

⁷¹⁰ Nènku pàakalediibwà Yesù Kilistò, Yèyè wàkapikula buloba bujimà. Cyà bushùwà, ncyàkenzàYe. Yèyè ùvwa Mupikudi wa cìfùkiibwà cyònsò cikaadiku cìfùkiibwe pa buloba. Yèyè nguvwa Mupikudi. Nènku ku. . . bupikudi bwònsò bùdi bùsanganyiibwa mu Yèyè, kakwènakù mùshindù mukwàbò wùdibukù mwà kulwila ku byenzedi bìmpè, ku diya kashàala wa mu èkèleeziyà, ànyì nì ncinyì cyònsò to; wèwè udi ne cyà kulwila ku mwonjì mukünze awu, Mupikudi awu, Cìlongo cìpikudi aci.

Èyo, mpindyewu lùdi lùlondà lùdi ne:

71. Mpenyì pàdi màtàpishì. . .Mmàtàpishì kaayì àdi àkèngela kutùma pa lufù lwà bantèmù bàbìdi bàà mu Bwàkabuulwibwà 11 abu?

Kaa, Mwanèètù Palmer, pawikalàku kùyì mwà kwela nkonko kampàndà's wè!

⁷¹¹ Mpindyewu, bupikudi, myonjì eyi kaaba aka, mwonjì mukünze ewu, tudì tumòna ne wùvwa wùmvwija bupikudi.

⁷¹² Mpindyewu lukonko lùdi lùlondà ndwòlù elu:

Mmàtàpishì kaayì mu Bwàkabuulwibwà 11?

713 Kùlwalwa cikondo...Mpindyewu apa nekwikalè dyandamuna ku lukonko lùvwà lwandàmùnyiiibwe dilòlò adi, lùvwà mulundà wanyì muyiishi mufùnde pa bìdi bitàngilà beena Yudà, mùvwàbi mwà kwikala.

714 Mpindyewu beena Yudà aba bàdi ne bidimu bisàtù ne citùpà bibàlaya. Mbanganyì bàdi bamanyè nànkù? Mbingu makùmi mwandamutekète nyààkalayiiibwà. Bambè ne: “Maasiyà neàlwe ne neùmushiibwè munkàcinkaci amu.” Bidimu bisàtù ne citùpà ki byàkayiishà Kilistò, wàkashebeyiiibwa menemene ànu mu bidimu bisàtù ne citùpà, bidimu bisàtù ne ngondo yisambòmbò mbyàkayiishàYe.

715 Ne pashiishe cinyangu cidi cifila kabùtù, mùské wà—wà baamùzùlùmányì wà Omar wàkaashiibwa pa Buloba bwà Cijila; mwàkambà Nzambi, bidimu binunu bibidi ne nkàmà yitaanu kumpàla kwà kwenzekaci ne, necimanè mu mwaba awu. Mupròfetà wàkacimòna, ne pààkacimònàye, wàkamba ne: “Bàvwa mwà...Bàà Bisàmbà byà bendè bàvwa mwà kubwàngata bu bwàbò bóbò too ne mùvwà cipungu cyà bàà Bisàmbà byà bendè mwà kujika.”

716 Mpindyewu kucidi bidimu bisàtù ne citùpà bilaya. Nwènu bamòne, bantèmù bàà mu Bwàkabuulwibwà 11 aba bàdi bàmba cipròfetà, munda mwà matùkù cinunu ne nkàmà yibidi ne makùmi àsambòmbò; ànu bidimu bisàtù ne citùpà menemene. Mpindyewu...ne bàvwa bavwàle mifuku. Mpindyewu, tàngilàayi nùmònè mudimu wàbò wà bwambi awu, cidiibo. Mpindyewu, bantèmù bàbidi aba mbashiipiibwe.

717 Mpindyewu, kùdi...Bààkaalukila kùdi beena Yudà paanyimà pàà Dyambwibwa dyà Èkéleziyà wa bàà Bisàmbà byà bendè. Èkéleziyà wa bàà Bisàmbà byà bendè ùdi wàlukila Kumbèlu bwà Didyà dyà Dibanji, ne ànu mwàkabwejiibwà Leebèkà mu nzùbù wa Abraham pàmwè ne Izàkà ne kusèlanganabò. Nènku Leebèkà ne Izàkà bààkapàtuka biikàle beena byònsò bìvwà Abraham naabì, byònsò byàkaya kùdi Izàkà. Kakùyì mpatà to! Ne kabìvwa mwà kulwa kùdi Izàkà pàvwà Izàkà kàyì mwanji kusèlangana dyàmbedi to. Kaa Àlèluuyàh! Ki bwalu mbwòbù abu's.

718 Ne Kilistò ùdi ushàala... Nzambi ùdi usòmbela mu mubidi mupwàngàne, wàkanyangukà awu mu kaabujimà kashidi ne Cyendèlèlè. Pààsèlanganà Mwànà wa mùkòòkò ne Mukàji-musèla mu Dyulu, ùdi ùpàtuka mwikàle mwena bintu byònsò. Kakùyì mpatà to! Izàkà ne Leebèkà bààkapàtuka biikàle beena bintu byònsò.

719 Ne pàcidi mushingà ewu wènzeka mu Dyulu apu, wà Mukàji-musèla awu, Mukàji-musèla wa bàà Bisàmbà byà bendè biikàle bàsèlangana ne Mfùmù (Mwànà wa Nzambi), mu Butumbi; pàcidiibo bàsèlangana apu, kùdi bidimu bisàtù ne citùpà bìdi byènzekà pàdi... Mòsà ne Eliyà...

720 Byòbì biine, kí nnè Mòsà kacya ùvwakù kàyipù to... to, mubidi wèndè bàakawàmbula e kuya naawù. Banjèlò bàakamwangata, yèyè kààkateketangana to, kààkabola to. Yèyè ùwva cifwànyikijilu cipwàngànè cyà Kilistò. Wàkafwà ne Banjèlò bàakamwambula e kuya nendè, ne nànsha dyabùlù kí mmumanyè mene kwàkajiikiibwàye to, ne wàkateeta bwà kukòkangana ne Mikàèlè Mwàrkanjèlò awu bwà dijiikiibwa dyèndè. Aci ncidi Bible mwambè. Nzambì wàkamubàndisha mu Dyambwibwa.

721 Ne Eliyà, pàvwàye wènda wènda mwaba awu, mupròfetà wa Nzambì, kupwekayè ku Yadènè, kukòpolayè cinkutu cyèndè ne kucituutayè pa màyi, ne màyi àkakòsololoka ku dyàbalumè ne ku dyàbakàjì. Yèyè kubànda ku mukùnà. Elishà kwambayè... Wàkamba ne: “Udi wenda undonda bwà cinyi?”

722 Yèyè ne: “Ndi muswè bitùpà bìbidi byà Nyumà webe.”

723 Yèyè ne: “Walòmbu cintu cikolè, kàdi wèwè mummòne pàndì nya apu.” Kushààlayè kacya ànu wàmutwishila mèsù.

724 Ki paanyimà pàà katanci, mu Dyulu kufùmamù dikalù dyà mvità dyà kapyà ne Banjèlò bàà kapyà, tubalù twà kapyà, ki Eliyà kutùpikilayèmu e kubwelayè mu Butumbi. Kààkalabulakù lufù to, wàkatentemunyiibwa, bikèngela afwè!

725 Nènku bu nwènù mwà kutàngila bapròfetà bàbidi bàà mu Bwàkabuulwibwà 11 aba, bàdi bènza cintu ànu cyòci cìmwècimwè cyàkenzà Mòsà ne Eliyà aci. Wèwè udi wamba ne: “Mwanèètù Branham, udi muswè kungambila ne Eliyà ne Mòsà bàcidi ne mwoyi anyi?” Kakùyì mpatà to!

726 Mòna's, kumpàlà kwà Mukùnà wà Dishintuluka dyà mpàla... Pa Mukùnà wa Dishintuluka dyà mpàla, kumpàlà kwà Yesù kuyaYè ku Kàlvariyò, s' ki Mòsà ne Eliyà bònso bàbidi bàvwà biimàne mwaba awu bàyiikilangana Nendè abu. Cyà bushùwà, bàvwà mbòbò, kí mbafwè to. Ne bòbò kacya kabààkafwàku to; mbàà cifwàkà, bikèngela bàfwè. Pa nànkù bàdi ànu mu mùshindù wà mutùmbìshìibwe bindile cikondo aci.

727 Ne pashìishe pààpinganàbo ne kuyiishabò munda ànu mwà bidimu bisàtù ne citùpà menemene mu dilaabiibwa dyà Dibàtiiza dyà Nyumà Mwìmpè, pìikalà mabènesha muumùshìibwe ku bàà Bisàmbà byà bendè (ne Èkèleeziyà mwambwibwe); ne èkèleeziyà wa mukwàte mashika, wa maalu a kwìsùkwìsù ùkaadi wa bènda bàkèbangana nendè bu mbwa, kùdi ba-communistes ne kasùmbù kàà cìdidi kàà beena Loomò, ne pìikalàbo bènda bàkèbangana naabò ne bàshipiibwa. Bòbò—bòbò nebàshipiibwè díbà adi; bapròfetà aba bàdi bàyiisha munda mwà bidimu bisàtù ne citùpà, ne Bible mmwambè ne bààkashiipibwa mu munène... mu mùsèèsù, wùdìbo bàbìikila mu nyumà ne, Sodomà ne Èjiipitù, mùvwà Mukalenge wetù mupoopèdiibwe pa nkùrusè amu. Amu mùvwà mmu Yelusàlèrà;

nwamònu's, mu Yelusàlè mà mwàmwa, mùdìmu mùbìikidiibwa mu nyumà.

728 Ki bôbò kushààlabò balààle mu mùsèèsù munda mwà matùkù àsàtù a muunya ne a bufùku. Ki pashiishe ku ndekeelu kwà matùkù àsàtù ne citùpà awu, nyumà wa mwoyi wàkabwela munda mwàbò ne bàakabiika ku lufù. Bivwa bikèngela bwà kufwàbo bu bakwàbò bàà cifwàkà, bivwa bikèngela bwà kufwàbo. Nènku pàakashebeyàbo bayiishi bàbìdì aba . . .

729 Bàvwa bàyiisha bàlwishangana ne bubì, ne bàakapàtula kapyà mu dyulu. Wàkenzakù aci nganyì? Nwamònu anyì? Bàakapàtula bipùpù mu dyulu, ne bàakatutu naabi buloba ne lùkàsà lwònsò . . . ne dibà kanà dyònsò dìvwàbo bôbò baswè adi. Ne bàakapàtula kapyà mu dyulu. Ne bàakiimanyika mvùla bwà kayìlòku to, ntàntà yònsò uvwàbò bôbò baswè awu. Abu bàvwa mbanganyì? Ànu Mòsà ne Eliyà menemene's. Ne s'ki bôbò bantèmù babìdì abu.

730 Ne pàakakèngeshàbo èkèleeziyà, anyì bàà pa buloba, ku diyiisha dyàbò adi; ne dipetulula dyà beena Yudà, ne dibààluja ku kanyinganyinga, bàbààluja ku kwitabuuja . . . Pààmònàbo Yesù ùlwila Mukàjì-musèla, nebàmbè ne: "Mònaayi, ewu's ki Nzambì wetù Utùvwà bindìle awu. N'Yèyè awu!" Kàdì Yèyè kèna ùbàlwila bôbò to; Yèyè mmulwilè Mukàj'Èndè-musèla. Ne Mukàj'Èndè-musèla . . .

731 Pàakabwelà Yòzefù mu Èjipitù, kàakangata bânà bààbò kuya naabò to, kàdì wàkapeta mukàj'èndè-musèla muntwamu. Kakùyi mpatà to! Kàdì pàakadimanyishàye kùdì bânà bààbò, kapàvwa muntu nànsha umwe mwaba awu to. Aci ncyà bushùwà menemene. Ne pàaDimanyishàYe kùdì beena Yudà aba, kakwàkwikala muntu nànsha umwe to ànu beena Yudà. Ki bôbò abu bàakashebeyà Yòzefù, biimàne mwaba awu; ne yèyè kwamba ne: "Èè, mmémè Yòzefù, mwanèènù awu." Ki kwasayè mwadi.

732 Ki bôbò ne: "Mpindyewu tudi bamanyè ne twàbwelàkànyì, bwalu twètù mbàakamushebeyà."

733 Cintu cìmwècìmwè aci's, beena Yudà nebìikalè ne cikondo cyà lutàtù aci ànu pabwìpi menemene ne dilwa mpindyewu, dyà dikèngeshiibwa dyàbàsàkà ne kubààluja mu buloba bwàbò adi. Cìdì cibìipata ksh ksh byenzè mùdì cisumbù cyà mìkòòkò yàlukila ku Mukùnà wà Kaamèlè kwàka.

734 Pààlwà Mukalenge Yesù bwà Mukàj'Èndè-musèla, ne bôbò bàMumòna, nebàmbè ne: "Ki Yèyè utùvwà bindìle wàwa, n'Yèyè wàwa!" Yèyè neàjuukè ne dyondopa mu mapwàpwà Èndè. Ncyà bushùwà.

735 Ne èkèleeziyà, bàshààdìlè bàà beena Yudà abu, ndekeelu wa byònsò pàashebeyàbo bapròfetà bàbìdì aba, ne pàashààlàbo balààle mu mùsèèsù wùdì wùbìikidiibwa mu nyumà ne n'Sodomà ne Èjiipitù, mwàkapòòpelàbo Mukalenge wetù

pa nkùrusè amu, bàdi bàtùminangana màtâpishì muntu ne mukwèndè (bàà pa buloba bènza nànkù's).

⁷³⁶ Mpindyewu, Mwanèètù Palmer, s'ki bwalu mbwòbù ebu. Alùjaayi mèsù mu bwalu-bulonda bwà Loomò nènku nenùsanganè ne kùdi ditùngà ànu òm̀wèpelè pa buloba bujimà dikaadiku ditùminàngàne màtâpishì paanyimà pàà mvità, m'Bukalenge bwalàbàlè bwà Loomò.

⁷³⁷ Ki bwà cinyì ndi ngamba ne mufwilakanyi ne Kilistò ùdi ùpàtukila mu Loomò. Nyama wa lwonji ùdi ùpàtukila mu Loomò, kèna mwà kupàtukila mu Moscou to. Ùdi ùfùmina ku Loomò, dragon mukùnze uvwa mwimàne kumpàlà kwà mukàji bwà kudyàye Mwanèndè pàdiYe ànu ne wàlediiibù apu awu. Démon awu, démon awu ùvwa penyì? Ùvwa nganyi? César Auguste wàkatùma bantu bwà kushebeyabò bânà bònso kuumukila ku bidimu bibidì too ne kwìnshì awu. Dragon mukùnze awu, dragon awu, *nyama* ùdi ùm̀vwija ne “bukolè.” Bukòokeshi bwà Loomò mbwàkakèngeshanganà ne kuteeta bwà kupeta Mwànà Kilistò awu.

⁷³⁸ Nènku cintu cimwècimwè aci's! Musangu wònsò wùvwà beena Loomò, beena Loomò wa cimpàngaanù awu ne ciibidilu cyà kupeta bucimunyi bunène, bàvwa bàtùminangana mabwe matòòke munkaci mwàbò, bu màtâpishì mùshindù awu, bu bivùlukilu. Pa nànkù mabwe awu àvwà... Cìvwàwu, tùvwa ntuumàtâpishì tutùminangana munkaci mwà èkèleeziyà wa cyena Loomò. Kakùyì mpatà to! Menemene. Bìdi ne cyà kwikala nànkù.

⁷³⁹ Ngàkiimana ànu mwaba awu mene mu Cimenga cyà Vatican mwàmwa ne kucikenketa ne Bible. Paapà muvwàle cifulu cyà butùmbi cyà ntòndo yisàtù, *Vicarius Filii Dei*, bintu byònsò bínkaavwà muumvùumvwe abi ne bikwàbò, s'mbulelèlà ànu bwà kabùyì dyela mpatà ebu; cisùmbù cyà ntèndeleelu cidi cìlombolà ditùngà ne ditùngà dyònsò didì mwinshì mwà Dyulu, ne ncyòci cidi cìlombolà. Ki bwalu mbwòbù abu's, ki mùdibi.

⁷⁴⁰ Ncyèna cilumbù ne beena Kàtòlikè to (bwàl'à's, mukalenge), bóbò mbìmpè ànu mùdi muntu mukwàbò kanà yònsò ewu amu, kàdi ntèndeleelu wabò ngudi wa mashimi bilondèshile Bible ewu. Pìikalàbi ne Bible ewu mmubingè, bóbò mbàdi bapùile. Bóbò bàdi bàmba ne kabèèna... “Cìdì Bible wàmba nànsha ciikàle cinyì, ànu cidi èkèleeziyà wàmba aci.” Twètù tudi twitabuuja ne Bible ngudi wakula ne bukòokeshi bùdi kumutù kwà byònsò! Kakùyì mpatà to, n'Diyì dyà Nzambi.

⁷⁴¹ Nènku nudi numòna mwaba awu, mabwe àvwà matùminangana musangu awu awu, a mu Bwàkabuulwibwà emu awu, mma—mmabwe àvwà màtâpishì àvwà matùminangana munkaci mwàbò. Ncidi ànu cìleeja... Bible mmwambè, mu Bwàkabuulwibwà mwaba ewu, mmwambè ne: “Ewu udi ne lungènyi ènzè makùmi a nombà wa nyama

wa lwonji. Ewu udi ne lungènyi énzè *cikampànda*. Ewu udi ne nyumà wa mapà kampànda awu énzè *cikampànda*.” Nudi numòna mùdi èkèleeziyà mupangìle anyi?

⁷⁴² Nsongààlùmè kampànda mmungeelè lukonko mu dindà emu pa bidì bitàngilà mapà a Nyumà, pa bidì bitàngilà dyakula dyà mu myakulu. Nsongààlùmè wa citende’s, wa meeji matòkè a dikèma, ngeela meeji ne ùdi ne cyà kwikala mwambi òmwè dyà ku matùkù àdi panshì aa. Nènku pa bidì bitàngilà èkèleeziyà, mèmè kwamba ne: “Kùdi byàbúngì bidì ànu byà musunya. Twètù katwèna baswè abi to, kàdi tudi tukèba cintu cilelèlà. Ki citùdi tujinga.”

⁷⁴³ Kwèna mwà kudítwa mu dicilongesha mu èkèleeziyà to; mu katanci, udi upeta, umwe ùdi ne mwakulu, umwe ùdi ne musambu, pashiishe cikaadi mvità bwà kubyùmusha. Kadi pàdi Nzambi mufile dipà mu budishikaminyi, nedidimwènèshè dyòdi nkààyaadi. Ncyà bushùwà. Nwamònu’s, ki mapà a Nzambi ngòwò awu, ki àdiYe ùtùmina Èkèleeziyà bwà bucìmunyi.

⁷⁴⁴ Mpindyewu, mufwilakanyi ne Kilistò ùtu ne cintu kampànda cyenzè bu byà wítaba ne byà ùbènga, ùdi ne—ne—ne mùshindù munyangakaja wà kucyènza. Nènku abu mbukalenge bwalàbàlè bwà Loomò bùdi bùtùminanganà mapà munkaci mwàbò, mapà a mu mubidi. Nzambi ùtu ùtùmina bacìmunyi mapà a Nyumà; beena Loomò bàdi bàtùminangana mapà a mu mubidi.

⁷⁴⁵ Tudi twitabuuja ne Nyumà Mwímpè n’Nyumà, tudi tuMupeta ku dibàtiiza didì difùminà ku Dyulu.

⁷⁴⁶ Èkèleeziyà wa Kàtòlikè ùdi ùlongesha ne: “Ukàristiyà munsantu ùdi mmubidi wà Kilistò; mu mùshindù wà ne paùdi wangata dyàmpà edi ne kòsher ewu, *didi* Spiritù Munsantu, Nyumà Mwímpè, ukàristiyà munsantu.” Nwamònu anyi?

⁷⁴⁷ Twètù tudi twitabuuja ne nkapesè kàà dyàmpà, katwèna twitabuuja ne mmubidi wà Kilistò to, (tudi tudìlongolola bwà kucyàngata mu tusunsa tukesè emu). Tudi twitabuuja ne kàdi kàleeja mubidi wa Kilistò. Kadi kakèèna . . .

⁷⁴⁸ Ki dishiilangana didì pankaci pàà dilongesha dyà Kàtòlikè ne dyà Mishònyì ndyòdi adi. Nwamònu anyi? Èkèleeziyà wa Kàtòlikè ùdi wàmba ne: “Mubidi awu ùdi . . . Dyàmpà adi *didi* mmubidi mwena diìnà. Èkèleeziyà ùdi ne bukolè bwà kushintulula cyòci eci.” Nukààdikù bamòne mwena Kàtòlikè pàdiye ùpìcila ku èkèleeziyà, winamija mutù, ùfùnda nkùrusè apu anyi? Nènku mbwalu kaabukènkè kakesè aku kàdi kàteema mu èkèleeziyà amu mwinshì mwà kaatàbèrnaclè kakesè aku. Kàdi ne kaabukènkè kakesè mundà amu, ne kaadyàmpà kàà kòsher aku kàdi kàsanganyibwa mwòmù amu. “Nènku aci mmubidi wà Kilistò. Ne paùdi wangata aci, kakùyì mpatà to udi munkaci mwà kwangata mubidi mwena diìnà wà Kilistò dìbà dyà kòomunyo webè wa kumpàla ne kòmfeesiyo webè adi ne

bikwàbò. Udi munkaci mwà kwangata, mu bushùwà, mubidi wà Kilistò.”

⁷⁴⁹ Twètù tudi twamba ne kàdi *kàleeja* mubidi wà Kilistò, nwamònu’s, bwà ne kakèènakù cingà cintu to ànu kapese kàà dyâmpà kèètù aka. Ne nànsha bu ne kakàvwa mene kaadyâmpà to, bu ne kàvwa kantu kàà cyanààna, kàvwa ne cyà kuleeja ànu cintu cìmwècìmwè aci. Ànu—ànu menemene. Nànsha byôbi ne bàdi . . .

⁷⁵⁰ Mùdì bantu aba bàdi bàmba ne: “Mémè ncyèna muswè kubàtìijibwa mu ciina cya màyi to, ndi muswè kubatìijibwa mu musùlù.”

⁷⁵¹ Mbishìilàngàne ku cinyi’s, pàdibi ne udi mubàtìijibwe? Byôbi ne mmu ciina cya màyi, ne . . . Mòna’s, Filipò wàkabàtìijibwa mu ciina . . . pàakabàtìijibwà mutungu awu apu. Pàakabàtìizà Filipò mutungu awu mu ciina cya màyi apu, Nyumà Mwîmpè’s wàkamwambula mu mùshindù wà ne Wàkangata Filipò kuya nendè, kabàyikù mwà kumumòna to mu ntàntà wa kilòmèètà nkàmà yisàtù ne makùmi àbìdì. KuMwambula mu Nyumà, kumupèèsha dì—dikalù dyà mvità difùmìne buludì mu Dyulu bwà ntàntà wa kilòmèètà nkàmà yisàtù ne makùmi àbìdì. Amen. Bilenga be!

Mpindyewu:

Bansantu nebìikalè penyì paanyimà pàà bukalenge bwà bidimu cinunu? Ne mmubidi wà mùshindù kaayi wikalàbo naawù? Nèngààlukilè ku alu nàнку mu katanci emu. [Mwanèètù Branham ùdi wàndamuna ku lukonko elu kubangila ku kasaka kàà 820, bu lukonko lwà 74—Muf.] Nebìikalè ne Yesù.

⁷⁵² Èyo, lukonko lwà—lwà mwandamutekète:

72. Mmunyi mutwàlumbulwishà banjèlo?

⁷⁵³ Aci cìdi cisanganyibwa mu . . . Mmunyi mutwàlumbulwishà banjèlo? Mu diikala bânà bàà balùme ne bàà bakàji bàà Nzambi. Banjèlo mbasadidi; twètù tudi bânà bàà balùme ne bàà bakàji bàà Nzambi. Ne Bible mmwambè ne twètù netùlumbulwishè banjèlo. Ncyà bushùwà. Mpindyewu, mpindyewu bu nwènu mwà . . .

Lukonko lwà 8:

73. Bwà cinyi nsukì bwà bwalu bwà banjèlo yà mu Kolintò wa Kumpàlà?

⁷⁵⁴ Mpindyewu muntu àmpetèlèku Kolintò wa Kumpàla, nshapità wa—wa 11, nènku netùmonè mwòmò amu, bwà nwènu kujandula ne—ne . . . Mu Kolintò wa Kumpàla, ku—ku wa 11, tudi tusangana ne Pòlò ngudi wakula. Ngànji nyekù bwà katanci kakesè cyanààna, nènku pashìishe netùcibalè lùkàsàlùkàsà ne pashìishe netù—netùcyàngàtè.

⁷⁵⁵ Ndi ne cintu cyà kwamba pa mvensà mukwàbò ewu kaaba aka, cìndi ntèkemenà ne Mukalenge neàtùpèeshèci mùshindù wùdì wùkèngela bwà twètù kwikala naaci. Muntu yéyè mumupetè. . . Ngeela meeji ne nnshapità wa 11, èyowà's, èyo. Mpindyewu tèelejàayi ne ntèmà, ne ntèmà yònsò mpindyewu, bwà nwènù kuumvwa. Mpindyewu angàtà kondò kèèbè kàà mwoyi ùkèlè mu mpaayà wa kàzaku kèèbè amu too ne pângàabalà cyòci eci, udi umòna's, kwelaPù nsèke. Tèelejàayi ne ntèmà yà yònsò, eci ng'EMU MMÙDÌ MUKALENGE WAMBA:

Ikàlaayi bandondi bàanyi, ànu mündi mémè. . . wa Kilistò amu. (Pòlò mmwambè ne: "Nùndondaayi mémè, ànu mündi mémè ndonda Kilistò amu.")

Mpindyewu ndi nnütumbisha, bânà bèètù, munùdi nwènù numvùluka mu maalu ónsò, ne nulama mikenji, muntù mémè muyifile. . . kunùdi nwènù.

Kàdi ndi muswè bwà nùmanyè ne, mutù wà mulùme yònsò n'Kilistò; ne mutù wà mukàji mmulùme; ne mutù wa Kilistò n'Nzambi.

⁷⁵⁶ Nudi numòna mùdìbi amu anyi? Nzambi, Kilistò, mulùme, mukàji. Mpindyewu:

Mulùme yònsò udi usambila anyi wàmba cipròfetà, mwikàle ne mutù mubwikila, ùdi ùfwisha Kilistò bundù.

Kàdi mukàji yònsò udi usambila anyi wàmba cipròfetà mwikàle ne mutù kawüyi mubwikila ùdi ùfwisha mutù wèndè bundù: . . .

⁷⁵⁷ Mpindyewu tudi twangata ànu katanci kakesè cyanààna, bwà kunùleeja ne nsuki bwà mukàji ki cibwikilu cyèndè:

. . . bwà cyòci aci. . . mbyenzè ànu bu ne ùvwa mukungula. (Aci cìdi cyùmvwija ne bu—bu yéyè mwà kujinga kukòsa nsuki yèndè, dîbà adi àyikungulè yònsò.)

Bwalu mukàji yéyè kàyi mubwikila to, àdikòsèshe kàbìdi nsuki yònsò: (mudikòsèshe nsuki yònsò mbwena kwamba ne mudikungwishe nsuki, nwamònu's). . . kàdi byòbì byènza bundù bwà mukàji kudikòseshayè nsuki yònsò anyi kudikungwishayè nsuki, ìkalè mubwikila.

⁷⁵⁸ Mpindyewu tudi tupweka buludì ku lukonko lùdì wela elu. Nwamònu anyi? Èyo, mpindyewu mbibì bwà—bwà inábànzà kukòsayè nsuki yèndè, bilondèshile Bible. Mpindyewu tèelejàayi mwab'ewu mene bwà nùmonè Bible ní kèna ùpèèsha mulùme bukenji bilondèshile mikenji bwà kwipata mukàjèndè yéyè mukòse nsuki yèndè, nùmonàayi eci ní ncyà bushùwà anyi ní ncyà mafi.

Bu mulùme. . . Bwalu cyà bushùwà kabivwa bikèngela bwà mulùme kubwikilayè mutù wèndè nànsa (mbwena

kwamba ne, kwikala ne nsukì mile), bwalu *bu mudìye* mu *cimfwànyi ne* mu *butumbi bwà Nzambi: kàdi mukàji yêyè ùdi* mu *butumbi bwà mulùme*. (Nukààvwakù beelè meeji ku ciinè aci anyi?)

759 Mpindyewu ndi muswè kwimana kaaba aka, bwalu ndi muswè bwà eci cibwelè bîmpè menemene, nwamònu's. Nènku mpindyewu vùlukàayi ne, nkààdikù mumòne binunu makumi byà bakàji balenga kwisù (bàndi mumanyè mpindyewu mene, ne bààbûngì bàà kùdìbo mbasòmbe mu èkèleeziyà emu) bàdi ne nsukì mîpì, biikàle beena Kilstò. Kàdi bàndi ngòmekela bujitu ebu kî nwnènù to, mmùshindù wunùdi balongeshibwe. Nwamònu anyi? Kì cyôci aci. Muiyishi wenù ngutu kàyiku munwãmbile cyôci eci kacya to. Kàdi bônso bàà ku bakàji bàà mu nyungulukilu wa tabernacle bôbò biikàle mùshindù awu, díbà adi mbapiile. Nwamònu's, bwalu ncyà bushùwà ne tutu tubàmbilaci.

760 Mpindyewu, mpindyewu tàngilàayaaku eci:

...mulùme...Bwalu... (mvensà wa 7)...Bwalu mulùme...

761 Mpindyewu, udi wakula apa ewu nganyi? Mpindyewu, misangu mikwàbò inábànzà kampàndà ùdi mwà kwamba ne: "Kaa, Pòlò's ùvwa mukìnyi wa bàna bakàji kwónso eku."

762 Èè, mpindyewu patùcidi pa cyôci aci apa, tùbuululàayi ànu mu Ngalàtiyà 1.8 emu, bwà tùmonè cidi Pòlò wamba bwà cyôci eci, nwamònu's, mu Ngalàtiyà 1.8. Nenùsanganè ne Pòlò mmwambè mu Ngalàtiyà 1.8 emu ne:

...nànsha twètù, anyi mwanjèlo wa mu dyulu, muiyishè èvànjeeliyò mukwàbò nànsha bàmba ne ngwa bishì mushiilàngàne ne unùkaadi bumvwè ewu, èdiibwè mulawu.

763 Mpindyewu kanùndyulùku mêmè to, nùMudyulàayi Yêyè, nwamònu's.

Bwalu cyà bushùwà kabìvwa bikèngela bwà mulùme kubwikilayè mutù wèndè nànsha, bwalu bu mudìye mu cimfwànyi ne mu butumbi bwà Nzambi: kàdi mukàji yêyè udi mu butumbi ne cimfwànyi cyà mulùme.

764 Mpindyewu tàngilàayi mvensà udi ulonda awu:

Bwalu mulùme kî mmufùme ku mukàji to; kàdi mukàji ngudi mufùme ku mulùme.

Anyi mulùme kàakafùkiibwa bwà mukàji to, kàdi mukàji ngwàkafùkiibwa bwà mulùme.

765 Mpindyewu, ndi muswè kwamba eci mpindyewu ne dinanga dilelèlè ne kalolo, ne ndi ntèkemena ne nudi nucyùmvwà mu mùshindù wùmfwèwùmfwè wùndi ngamba cyôci eci ewu. Kàdi Àmèrikè...Mêmè bu mwenji wa ngendu yà buloba bujimà,

Àmèrikè ùdi ne bìmwè byà ku bilèlè byà bitàmbe kwikala byà ciipanshì, bipwekè milongo bwà bakàjì bààbò ku byà ditùnga kanà dyònsò dyà pa buloba. Paris mu France, mmufwànyine kwikala nzùbu wa kàntùmbw'a dyùlù ku luseke lwà Àmèrikè mu mùshindù wùdiye ùlekela bakàjì bààbò bènza. S'mbundù's!

⁷⁶⁶ Nukààdikù bamanyè ne nzambì wa Àmèrikè mmukàjì anyì? Mémè ndi mwà kunùjaadikila aci ku Bible ewu. Ncyà bushùwà. Nudikù nufika ku dyumvwa ne bìdi bikèngela bilwe mùshindù awu bwà èkèleeziyà wa Kàtòlikè àbwejè dilongesha dyàbò dyà virgò Màriyà adi anyì?

⁷⁶⁷ Mpindyewu, bu ne mukàjì kààkenjiibwa bwà mulùme, kabiyi...Piikalàbi ne mulùme kààkenjiibwa bwà mukàjì, kàdi mukàjì ngwàkenjiibwa bwà mulùme, dìbà adi mmunyi munwikalà mwà kukuukwila mukàjì's? Nwamònu anyì? Mpindyewu, cìdi cicyènzè, ncibangile mu Paris kàdi kwobeka mu Hollywood. Mpindyewu bikaadi bikèngela bwà Paris kulwabò mu Hollywood bwà kupetabò myòdelè yàbò ne bikwàbò byònsò, s'ndipwekesha dyà milongo dyà bakàjì bèètù bàà beena Àmèrikè adi.

⁷⁶⁸ Ncinyi aci? Dyètù ditùnga ndilwè dikesèè mu mùshindù wà ne bányèngi mene ne bantu balùme midimu yà dikwàta, kàdi batèèke bakàjì mu yòyi myaba eyi, mu mùshindù wà ne makùmi citèemà a bakàjì pa lukàmà, pabwìpì ne cyòci aci, mbandumbà. Kàdi nwamba mùdi balùme kwàbò kujikè, bushùwà, s'mbwalu mbangàte bakàjì kàdi kubatèèka mu myaba ayi mu midimu yà balùme. Ne mbalwè kushàala bàà ciipanshì mu mùshindù wà ne mbatèèke bakàjì bu bampùlùshi mu mùsèèsù. Aci's mbundù's bwà ditùnga kanà dyònsò! Èyowà's, mukalenge. Ciwènzà pèèbè ncinyi pa bwalu abu?

⁷⁶⁹ “Udi wèwè wenza cinyi pa bwalu abu, Mwanèètù Branham?” S'bikèngela ncineemèkè, mémè's ndi mwena-mwàbò wa Àmèrikè, s'ndi ngenza cìdi mfùmù munène wàmba bwà kwenza aci. Bu ne mvwakù. . . Dìkù dyòdi—dyòdi ànu dididìnge dijimije kaneemu kààdi bwà dīkù adi (bànà bajimije kaneemu bwà mwèdi), adi dīkù's ndipandùlùke ànu tupese tupese. Èkèleeziyà yèyè—yèyè ànu mudidìnge mujimije kaneemu bwà mpaasàtà wendè, mòna's, awu èkèleeziyà mbwendè's mbutùlùke. Ne ditùnga dyòdi ànu dididìnge dijimije kaneemu kààbò bwà tubàdi tutùmbùke ne bwà dipàngadika dyàtù, adi ditùnga ndipandùlùke tupese-tupese. Aci ncyà bushùwà menemene. Bìdi bikèngela bwà twètù kuneemeka bintu abi bwalu bóbò ki bàdi mfùmù munène, nwamònu's. Kàdi kabyèna bimpè to twamb'eku twamb'eku. Kakùyì mpatà to!

⁷⁷⁰ Nuvwakù bamanyè ne mulùme mu Bible. . . wa mu Genèsè, nshapità 1 awu, pàakafukà Nzambì mukàjì ne—ne mulùme apu, ne kwenza mulùme ne bakàjì, ne Nzambì kwambila Evà ne “bàyeebè neàkukòokèshè, neikalè mukòokeshi webè” apu anyì?

Ùdìdingè ànu wǎmbè aci mu Àmèrikè kàdi ùmonè kuwàya kafika! Balùmyàna, kí ng'aci to, mukàjì's ngudi ukòòkesha mulùme; bikèngela bènze nànkù's, myaba yà pambèlu apa mmilongolola . . .

⁷⁷¹ Ndi mufwànyine kulwa ne bakàjì, bu ne bìvwa bikèngela, bàà ku bàvwà mu cibambalu cyànyì mwàmwa, makùmi, a bakàjì bàà kaneemu . . . Ncyèna ngamba ne bìvwa bikèngela bwà bakàjì bònso kabènji mudimu to; pàmwápa ùdi ne bàyendè ùsaama anyi cintu kampànda, nènku bikèngela ènze mudimu. Kàdi byòbì kabiyi bikèngela bwà kwenzabò to, kabìvwa bikèngela bwà kwenzabò to. Mwaba wàbò nkumbèlu, kaashàtò kààbò kakesè aku, ki mwaba wùvwà wùkèngelà kwikalabò ngwòwò awu menemene.

⁷⁷² Ne bakàjì bèètù bàà beena Àmèrikè bàkaadi ne kadyòmbò kàà kuyabò kadikèbela. Nànsha mene mu nyama yònsò ne bikwàbò, pàdì ànu cintu aci ne bwenzeji, cìdi cyàngata kaaba ne cipwekesha cisà cijimà milongo.

⁷⁷³ Kùdi kanyuunyi kakesè mu Àfrikè mwàmwa, nkanyuunyi kakesè kàà cikòtākòtā.

⁷⁷⁴ Mpindyewu, pa ciibidilu, kakàjì misangu yònsò nkàtù ànu kabì ku twònsò túbìdì atu. Kalùme misangu yònsò nkàtù katàmbe bulenga, kashà kalùme, mbudi mulùme, nzòòlò wa diitu mulùme, nzòòlò wa—wa citààlā, ne misangu yònsò ki udi mutàmbe . . . Bwalu, cikuka aci citu nnyuunyi wa dīkù. Cìdi cìsòmba mu ciswa, cìkolesha twànà twàcì. Cìkaadi cidyalùle kàciyi cyà bàmòna kùdì kabemba, kùdì nyòka, kùdì mubwàbwà, ne bikwàbò byònsò to, nwamònu's, bwà kukoleshaci twànà twàcì atu.

⁷⁷⁵ Kàdi mu cisà mùdì . . . anyi mu bulùme ne bukàjì bùdì—bùdì—bùdì mukàjì awu, anyi cikàjì, citàmba mu bulenga, cìdi misangu yònsò ànu mùshindù wà dipwekeshangana dyà milongo. Mu Àfrikè, udi wangata kanyuunyi . . . Kùdi kanyuunyi kakesè kuntwaku, ne kàmwèpelè kàndiku mumanyè mu bipaapu byònsò byà buloba, kàdi kakàjì kiikàle kalenga kutàmba kalùme. Ne pàdìku nànkù . . . Kayuunyi aku—aku nkandumbà kàà kashèndèdè. Kàdi kànyeemakana eku ne eku kàpetè kalùme, ne kàpatukè lubilu kàye kwela mushiki wà mayi paanyimà pàà kamanè kupetangana ne kalùme aku, ne kàshìya kalùme aku kalààdìle pa mayi awu pàdìku kènda kàkèbangana ne kalùme kakwàbò apu. Ncyà bushùwà menemene. Nwamònu anyi? Nudi bumvwè cìndi muswè kwamba aci anyi?

⁷⁷⁶ Mu, mpindyewu tàngilàayi, mu Àmèrikè leelù ewu, bwà bakàjì bèètù. Nsongàalùmè kampànda wa mu Kentucky mmungambile, kùkaadi ndambù wa matùkù ne, kùvwà bakàjì nkàmà mwandamukùlù bàkwàta mudimu ku cyapù kampànda mu Kentucky emu. Ki yèyè ne: “Ndi mufwànyine kwamba ncìpa ncìyi ntùpakana to ne nkàmà yìnaayi yà kùdìbo kakùyi mpata

to nndumbà ànu yètù yà mu misèèsù eyi, biinè abu bakàji basèla biikàle ne bânà.” Mulùmýànà kampànda kuumushayè mukàjèndè kuntwaku ne kumupàye mutuutu ne dibaya, ne pashiishe kwambayè kumushebeya. Ne mukwàbò yèyè wàkaya too ne ku dyasa dyà muntu mulùme cingoma. Ne mukwàbò kutàpangana keelè ne kulwangana mvità. Kabivwa bikèngela kwikalabi nànkù to. Abi kî mbimpè to.

⁷⁷⁷ Alùjaayi mukàji mu cikukù mùdì mumukùmbànyine, díbà adi byònsò nebyèndè bîmpè. Kàdi panùdì nukamutèèka mu midimu yà bantu bònsò, bwèndè's mbutùùke. Kakùyi mpat- . . . Ncyèna ngama ne . . .

⁷⁷⁸ Bakàji bàà beena Àmèrikè bàdi bàtádika dyùlù muulu bamba ne: “Aci kaCyèna ne bwà nsongo to.” Kàbidì ne: “Ndeejányi.” Cyà bushùwà, bìdì bikèngela ànu nùcyènzè, bwalu Bible mmudyànjile kwamba ne nuvwa mwà kucyèenza. Bìdì bikèngela nùcyènzè.

⁷⁷⁹ Ne mwaba ewu pàvwà . . . Kale wàwa, kùkaadi ntàntà mule, mu èkèleeziyà wa ba-Méthodistes, muntu mukàji yèyè mukòse nsukì yèndè, ùvwa wípaciibwa mu èkèleeziyà. Cyà bushùwà's, mmùvwàbò bàcyèenza. Èyowà's, bushùwà. Ba-Nazaréens, ba-Pèlerinins de la Sainteté, beena Mpenta, bònsò abu bàvwa ne ciibidilu cyà kucyèenza. Cidì cyènzèke ncinyi?

⁷⁸⁰ Nudi bamanyè ne mbwà cinyi? Nukàadi ne bilùmaabikàji mu cyambilu. Ncyà bushùwà menemene. Muntu kampànda ùciina ne nkwèpi kwàlwà kwèndè kùdiye ùdiila . . . ùciina ne nudi bafwànyine kumwipata, kumwipata mu èkèleeziyà. Kabàvwa ne dikima diinè dyà kwimana, kwimana pa Díyi dyà Nzambi nànsha Dyòdì ditàpa anyi kaDiyi ditàpa to. Ncyà bushùwà menemene.

⁷⁸¹ Wèwè tèèlejà kùneeku, mulùme ngudi mukòòkeshi. Kwèdikù meeji ne wèwè ngwakòòkesha nzùbu nànsha. Wèwè kî ngudi mukòòkeshi wa nzùbu to. Kakùyi mpatà to wèwè udi . . . Kwèna mupika to nànsha nànkù, kàdi udi mukwàcishi. Nènku Adàmà . . . Mulùme ngudi ne bukòòkeshi pa mukàjèndè, ne yèyè ngumwèpelè udi ne bujitu bwà mukàjèndè. Nzambi ùdi ùlumbulwisha mulùme bwà mukàjèndè. Mpindyewu, balàayi nùmonè ní ncyòci aci cidì Nzambi wàmba mpindyewu.

Bwalu cyà bushùwà kabivwa bikèngela bwà mulùme kubwikilayè mutù wèndè nànsha, bwalu bu mudiyè mu cimfwànyì ne mu butùmbi bwà Nzambi: . . .

⁷⁸² Nzambi kî mmuntu mukàji to, Nzambi m'Muntu mulùme. Nudi bamanyè ne pàdìbo bàvwija virgò Màriyà ne byònsò abi, ne wàkwilangan- . . . anyi dyakwilangana ne bikwàbò byònsò mùshindù awu, ne bàtùma masambila kùdì virgò Màriyà, nudi bamanyè cidìci cimvùlwija anyi? Nzambi-mukàji munène Dianà awu, uvwa Pòlò mutàndishe ne mwipàte awu. Ncyà bushùwà's. Yèyè ne: “Mona's, Nzambi kî mmuntu mukàji to!”

783 Dibwe òwà dimacile mu budimi, ki kwambabò ne nzambì-mukàjì awu ngùwà mutùme cimfwànyì cyèndè, ki bwà cinyì mukàjì mu Kolintò, ne too ne mwònsò amu, ba...bàvwà bàkuukwilà Dianà abu, bàwà baswè kulwa bayiishi.

784 Bàmba ne: “Mona’s, nyumà mmutwàmbìle ne tudi bafwànyìne kuyiisha.”

785 Yèyè ne: “Cinyì? Dìyì dyà Nzambì ndipàtùkìle kunùdì nwènù anyì, ne ndifùmìne ànu kunùdì nwènù nkààyeenù? Muntu nànsha yèyè nganyì wèla meeji mùdiye yèyè mwinè wa nyumà anyì mupròfeta, àjingululè ne cìndì mèmè ngamba mmèyì matùma a Mukalenge: mukàjì àshaalè mupùwe ne mwinshì mwà bukòokeshi mu èkèleeziyà, kàyì ùyiisha anyì kùkadi ne bukòokeshi kampànda nànsha.” Ncyà bushùwà menemene! Aci ki cìdì Mifundu myambè. Nwamònu anyì? Ne Nzambi neikalè mwà kwenza ne musumbà wa bayiishi bàlumbululè bwà cyòci aci ku Ditùkù dyà Cilumbulwidi.

786 Èè, tèelejàayi! Wèwè udi wamba ne: “Èè, nyawù nkwambila’s, s’ki citùbo bandongèshe.” Mpindyewu wèwè’s wàmanyì cidi cimpè! Ncyà bushùwà. Wèwè anyì muntu kampànda ùkèba kunwà bwanga bùngì kampànda, kàdi muntu kukwambila ne mbwanga bwà mulùngù mukolè, kàdi wèwè—kàdi wèwè kunwà ànu mwinè nànsha nànkù, aci cilèma’s ncyèbè wèwè mwinè paanyimà pàà cyòci aci. Wamònu anyì?

787 Mpindyewu tèelejàayi eci:

Bwalu mulùme kì mmufùme ku mukàjì to; kàdi mukàjì ngudi mufùme ku mulùme.

Bwà bwalu ebù bìwà bikèngela bwà dìnà mukàjì ikalè ne bukòokeshi ku mutù kwèndè bwà banjèlo.

788 Kùdikù muntu wa kunùdì aku udi ucibala anyì? Kolintò wa Kumpàla, nshapità wa 11, ku mvensà wa 10. Nwènù baswè kumòna, “bukòokeshi,” (Bwà cinyì?) “bwà banjèlo,” Kolintò wa Kumpàla, bwalu banjèlo mmuntu mulùme, mùsànjeelà. Tàngilàayi, cidi cyàkàbìdì “b” mukese. Mwaba wùdì bwalu bùtàngìla Banjèlo, Banjèlò bàà mu Dyulu, cidi “B” munène, “B” munène. Mwaba wùdì “b” mukese, mbanjèlo-bantu.

Nànsha nànkù kakwèna nì mmulùme... anyì mukàjì, ...anyì kakwèna mukàjì kakùyì mulùme—mulùme to, mu Mukalenge.

Bwalu bu mùdì mukàjì mufùmìne ku mulùme, bya mwomùmwe kàbìdì mulùme ku mukàjì; ...bintu byònsò mbyà kùdì Nzambì.

Anjì lumbùlwishaayi...nwènù biinè: mbikùmbàne bwà mukàjì kusambilayè Nzambì (ne nsuki mípì) kàyì mubwikìla anyì? (elàyaaku meeji pa bwalu abu mpindyewu)

789 Mpindyewu tàngilàayi:

*Nànsha bufùki bwinè, kabwèna bìnùlongeshakù ne,
muntu mulùme yêyè ne nsuki mile, . . .*

⁷⁹⁰ Wêwè udi wamba ne: “Cìvwa cìtàngila cinganyi?” Nsuki. Kwèna umòna cìdì Pòlò wàmba aci anyi? Nsuki, nsuki mile! Bu . . . Bìvwa bikèngela bwà muntu mukàji kwikalayè yêyè ne nsuki mile. Mvensà wa 14 mpindyewu:

*Nànsha bufùki bwinè, kabwèna bìnùlongeshakù ne,
muntu mulùme yêyè ne nsuki mile, bìdi bundù kùdiye
yêyè anyi?*

⁷⁹¹ Nwacyùmvù anyi? Bìdi bundù bwà muntu mulùme kwikalayè ne nsuki mile, kàdi muntu mukàj-. . . awu mwaba ngwà muntu mukàji. Nzambì ùtu mwenzè muntu mulùme mushiilàngàne ne muntu mukàji, ku byà bulùme ne bukàji ne ku mmwènekelu, ne ku bintu bikwàbò byònsò. Kabìvwa bikèngela bwà kuvwàlayè civwàlù. . . Bible mmwambè ne “Muntu mukàji yêyè muvwàle mùpanù anyi civwàlù kanà cyònsò cìdì cikùmbànyine muntu mulùme, ncintu ncyà mmwènekelu wa cinyangu ne cyà manyaanù ne cyà bukooyà kumpàlà kwà Nzambì.” Ne Nzambì neenzè ne muntu mukàji awu àyoobè bwà bwalu abu. Uwikalà wêwè mwà kutèeleja nganyi? Kàdi eci’s m’ Bible!

⁷⁹² Kàdi wêwè udi unyeemakana eku ne eku wamba ne: “Mòna’s, mèmè ndi ngeela meeji ne mbilenga bwà. . . pàndì mmòna bantu bakàji bavwàle mìpanù.” Kàdi Nzambì’s mmubènzè bashiilàngàne, Yèyè’s mmuswè bwà kwikalabò bàvwàla bishiilàngàne.

⁷⁹³ Ne Bible mmwambè ne: “Muntu mukàji yêyè ànu mene muvwàle civwàlù cìdì cikùmbànyine muntu mulùme, ncinyangu.” Nudi bamanyè ne *cinyangu* ncinganyi anyi? N’ “cintu kampàndà cyà bukooyà ku mèsù kwà Nzambì.” Nènku Yèhowàh Munène Udi upwekesha mèsù ùkumòna mwikàle cintu cikooyike awu. . . Ne Bible mmwambè. . .

⁷⁹⁴ Ne bwènù bàdi bàmba. . . Bàmwè bàà kunùdi nwènù bainàbànza mpindyewu, kùdi bàna bèenù balela bàà bakàji batekète bàà bitende, bàà bidimu dikùmi ne mwandamukùlù, makùmi àbìdì abu, nubàlekela bàpàtuka kaaba aka bavwàle mùshindù awu!

⁷⁹⁵ Ne wêwè pèèbè, maman! Nwamònu anyi? Paùdi upàtuka muvwàle mupanù awu apu ne bikwàbò ne mwikàle ne nsòmbelu. . . ne uya mu mùsèèsù, ne—ne mwikàle ne bilàmbà byà kale bidìbo bènza leelù ewu, ne bikupèèsha mmwènekelu wa cintu cyùdi kùyì abi. Nwamònu anyi? Nènku upàtuka mu mùsèèsù mwàmwa ne mmwènekelu wa masandi ànu wetù ewu, udi mufwànyine kwikala ànu kùyì mwenzè bubì kumpàlà kwà bàyèbè to ne bikwàbò byònsò, kàdi wêwè upàtuka mu mùsèèsù ne muntu mulùme ùkutàngila bu mùdì mudizànjike mùshindù awu, wêwè’s ngudi mupìile, ne wêwè ngwàlumbulula ku Dìtùkù

dyà Cilumbulwidi bwà dyenda dyà masandi ne muntu mulùme yònsò uvwa mukùtàngile mùshindù awu awu. Aci ncidi Bible mwambè.

⁷⁹⁶ Bible mmwambè ne: “Ewu yònsò ukàtàngidi muntu mukàji bwà kumwalakana, wàmanyi kwenda nendè masandi munda mwà mwoyi wèndè,” ne wêwè ngudi mupùile ne ngwìkala mwà . . .

⁷⁹⁷ Neùlwe ku cilumbulwidi wambè ne: “Mukalenge, Wêwè’s udi mumanyè mwoyi wànyì; kacya ncitukù mwendè masandi to, mvwa ne nsòmbelu wa lulamatu kùdì bàyaanyi.”

⁷⁹⁸ Kàdi ki muntu mulùme wapàtuka ewu, ki mukwàbò nyéye ewu, ki mukwàbò ewu, mukwàbò, mukwàbò, dikùmi ne bàtaanu, makùmi àbìdì, makùmi àsàtù, makùmi ànaayi a balùme biimàne mwaba awu bàmba ne: “Bapùile bwà dyenda dyà masandi!” Bwà cinyi? Muntu mulùme kampànda wàkakutàngila.

⁷⁹⁹ “Èè, mèmè ncìvwa naaci bwalu to.” Èè, cyùvwa mudizànjikile mùshindù awu aci ncinyi? Pààbi Nzambi mukwambile bwà kùbìvwadi to, ne civwa ncinyangu bwà dibìvwàla, kàdi wêwè uya katèèleja *Nganyi Udi Munangè Susie*? Anyi ncinyi cidi . . .

⁸⁰⁰ Nukààvwakù bajandùle cyàkenzekelà bàyendè wa *Nganyi Udi Munangè Susie*? mwinè awu anyi? S’nuvwa bònsò bamòne cyòci aci kaaba aka mu cibèjibeji àbìdì àdi pànshì aa. Patùvwa bapàtùke bayè mu Casper, mu Wyoming apu, ki pàvwàci cipàtùke. Dìna dyèndè mene nganyi apa? Mulùmyànà awu uvwa . . . mu *Nganyi Udi Munangè Susie* awu, anyi nànsha twamba mwinè—nànsha twamba mwinè civwa ncinyi ciinè aci? Kùdì . . . Kaa, cinùtù nushàadila kumbèlu mu diisàtù dilòdò nupùmbisha disangisha dyà milòmbò bwà kubandila aci. Ncinyi ciinè aci apa’s? *Tudi Banangè* . . . Dìna dyaci ncinganyi’s? [Mwanèètù wa bakàji kampànda ùdi wamba ne: “*Ndi Munangè Lucy*.”—Muf.] *Ndi Munangè Lucy*, bàyendè awu’s ngudi mumanya ne . . . ùdyènzeja, mbamukwàte mu Reno, Nevada mwàmwa, ne nsongàakàji wa bafiike, mumubanjije kùkaadi bidimu. Nènku ciinè aci ki cinùdì nushàadila kumbèlù bwà kubandila, pamutù pàa kuya katèèleja Èvànjeeliyò. Mukàji ngudi mucitondè. Kaa, luse wè! Kakwènakù cintu cikezùke pambèlù pàa Yesù Kilistò nànsha!

⁸⁰¹ Bènèshiiwbwà, mwanèètù wa balùme, nè—nènkwabìlè wêwè—wêwè mwabilaayi ewu, bimwè byà ku . . . Wêwè udi wamba ne: “Kaa, ekèlekèle, tàngilàaku ne nkasumbù kaayi aku.” Bimwè byà ku—ku biminyi byà bitambe bubì bitùdì naabi’s, bidyà bibolè, s’bitu nnyuunyi milenga kumòna. Kwèna mwà kulumbulwishila nnyuunyi ku masàlà èndè to, nwàmònu’s. Pa nàнку ikàlaayi ànu bavùlùke nàнку. Kaa, ekèlekèle!

⁸⁰² Mpindyewu tàngilàayi:

Nànsha *bufùki bwinè mene kabwèna*... (awu mmvensà wa 14 awu)... *bùnùlongeshakù ne, bìdi bundù bwà muntu mulùme kwikalayè ne nsukù mile anyì? (Ayi mmikùmbànyìne muntu mukàjì.)*

Kàdi muntu mukàjì yèyè ne nsukù mile, mbutùmbi kùdìye...

⁸⁰³ Mpindyewu yèyè ùdi wàkula bwà cinyì? Ncifulu cinùdi nwènú beena Kàtòlikè nwasà mu èkèleeziyà aci anyì? Nànsha kakesè! Nkabwikilu kakesè lwà ku lusongo lwà mutù, ne citàmbalà anyì? Yèyè ùdi wàkula bwà nsukù yènú ayì!

⁸⁰⁴ Mpindyewu! Ne muntu mukàjì yèyè ùkòsa nsukù yèndè, ùdi ùkòsa butùmbi bwèndè, ne kì mmwanyishìibwekù bwà kulwa ku cyoshelu bwà kusambila nànsha. Nwamònu's, ànu menemene cìdì cyambiìbwe kaaba aka ne: "Mbikùmbàne bwà muntu mukàjì kuyayè kasambila ne mutù wèndè kawùyì mubwikila anyì?" Ùdi wàmba kaaba aka, wàmba ne: "Èè, bikèngela àkosè nsukù yèndè's." Pa nànkù àdikungwishè nsukù àshaalè mutù finufinu dìbà adi. "Ne yèyè mudikungwishè nsukù mushààle mutù finufinu," mmwambè ne, "aci mbundù, mbundù bwà muntu mukàjì kwenzayè nànkù." Pashìishe mmwambè ne: "Bìvwa bikèngela kwikalayè mubwikila." Mpindyewu, mèmè ndi ànu—ndi ànu mbala cyanààna mukàndà wà Pòlò. Nwènú bònsò, aci ncinùtàngìle, nwamònu's.

Kàdi muntu mukàjì yèyè ne nsukù mile, mbutùmbi kùdìye, bwalu nsukù yèndè ayi yàkamupèèbwa bu cibwikilu.

⁸⁰⁵ Mbambè ne yèyè ùvwa mwà kupèèshiibwa cifulu anyì? Nwènú beena Kàtòlikè anyì nwènú beena Mishòònyì, aba anyì aba, bàyaaya mu èkèleeziyà ne baswè kuvwàla cifulu abu, nwamba ne: "Èè, nyààya mu èkèleeziyà, bìvwa bikèngela ngàsè cifulu." To, bìvwa bikèngela bwà nwènú kulekela nsukù yènú yìlepa. Ki dishìilangana ndyòdì adi. Nwamònu anyì?

... bwalu nsukù yèndè yàkamupèèbwa bu cibwikilu. (Ne bìdi bundù kùdìye bwà kulwa mu èkèleeziyà kàyì mubwikila, bwà kuyayè ku cyoshelu bwà kusambila.)

Kàdi muntu mulùme yèyè ùmwèka bu udi—bu udi... (Ncyèna ngeela meeji ne ndi mwà kushìndumuna mwakù awu to, m-u-k-o-k-y-a-n-g-a-n-y-...)... Mukòkyanganyi—mukòkyanganyi (nudi bamanyè cìdì mukòkyanganyi), twètù katùtu ne cìlèlè cyà mùshìndù awu to, nànsha mene Èkèleeziyà wa Nzambì.

⁸⁰⁶ Mpindyewu wèwè muswè kukòkangana pa bwalu abu, kòkanganà ne Aci nànkù's. Èyo, wèwè muswè kwikala mukòkyanganyi pa bwalu abu ne: "Kaa, kabyèna ne cìdìbì bishintulula to. Tùbàlekèlè bàye kumpàla. Mòna's, mèmè ndi ngeela meeji ne kì mbwalu to. Ndi... Nsukù kì nyidì ne bwalu

to, twamb'eku twamb'eku, cìdi ne bwalu mmwoyi.” Aci ncilelèlà; mwoyi wówù mu wówù, nsuki neyìikalè mu yóyi (Uh-huh).

⁸⁰⁷ Ndà kumpàla, pawikalà muswè kwikala mukòkyanganyi, Pòlò mmwambè ne: “Katùtu ne cilèlè cyà mùshindù awu to, nànsha mene Èkèleeziyà wa Nzambi.” Yèyè ne: “Paùdì muswè kwikala wa ku luseke lwà Kaayinà, èè, tùngunukà ndàaku.” Kàdi eci ncìvwà Pòlò wàmba.

⁸⁰⁸ Kaa, kàdi ncyèna ne meeji a kuseka to, bwalu kî mbwalu bwà tuseku to. Kàdi ndi nkwambila nwènù balundà bàanyi ne, mbundù bwà kumòna mùdi bintu ebi byanyishilbwe bwà kubyènza's. Ndi . . .

⁸⁰⁹ Tèèlejàayi! Bwènù nwènù, bàna bèètù bàà bakàji bananga, ndi muswè bwà nwikalè ne mmwènekèlu wa mutàmbe bulenga ne nwikalè batàmbe bulenga, ki cìvwà cikèngela bwà nwènù kwikala. Ki cìvwà cikèngela bwà nwènù kwikala. Ne bìvwa bikèngela bwà wèwè kwikala wa kalolo ne wa mankendà ne bikwàbò byònsò byùdi mwà kwikala abi pàdì bàyeebè ùfika, ànu byà mwomùmwe mùvwàye munanga webè amu. Ne bìvwa bikèngela bwà wèwè katwilangana nendè ku ciibi ànu ne—ànu ne dimutwà dyà mishiku ne kalolo kùdiye bu ditùkù diwàkamutwàyi ku cyoshelu bwà kwikalayè bàyeebè adi amu. Ncyà bushùwà. Ncyèna nkudyula bwà dikèba kwikala ne mmwènekèlu wa mutàmbe bulenga ne kwikala mutàmbe bulenga to. Kàdi ndi muswè bwà wèwè kwikala mùshindù awu, Nzambi mmumanyè ne ki cìndi muswè.

⁸¹⁰ Mwaba ewu kwènji cikondo kampànda, mvwa nyiikilangana ne Jack Shuler. Mbanganyi bàkaadiku bumvwè bàmba bwà Jack Shuler? Muiishi wa mutàmbe kwenda luumu ukaadiku ba-Méthodistes bapetè. Kwambayè ne: “Muntu mukàji kampànda mmulwè mwambè . . . nsuki ne manyaanù yònsò, ne ùcyànkunya bàzòkà, ne muvwàle bilàmbà bu udi kàyi muvwàle, kwambayè ne: ‘Udi mumanyè's, bàyaanyi kî mmuswè nànsha bwà kuntwàla kàbidì to.’”

⁸¹¹ Yèyè ne: “Mémè ncyèna ndyula bàyeebè awu to.”

⁸¹² Ncyà bushùwà. Mpindyewu, kàdi cìdi cikèngela bwà wèwè kwenza, bìdì bikèngela bwà wikalè mu mùshindù mwímpè. Kwàngacidi citaleela cyèbè ne bulenga bwèbè ku Hollywood to, byàngacilè mu Bible, kumpàla kwà Nzambi. Ikàlà inàbànzà, enzà maalu bu inàbànzà, vwàla bilàmbà bu inàbànzà, ikàlà mukezùke. Enzà maalu bu inàbànzà, kùvwàdi bintu abi . . .

⁸¹³ Mulùme yònsò udi ulekela mukàjèndè ùpàtuka muvwàle tuntàkanyi atu kumpàlà kwà bantu balùme, ne tuntàkanyi twà kale atu . . . ùpàtuka mu mashinda ne ùkòsa mashinda, ne bikwàbò byà mùshindù awu, mukalenge, s'ndi nkwambila's, mwanèètù wa balùme! Ncyèna—ncyèna ne meeji a kwikala ne lwonji to, ndi . . . Nzambi mmumanyè ne ki mwoyi wùndi naawù. Kàdi nebikengelè bwà mémè ku- . . . Bikèngela nshintulukè

bikolè menemene kumpàlà kwà mèmè kulekela wanyì mèmè ùcyènza's. Nèngiikalè sheefù ku lusongo lwà kakùnà kwàka ntàntà yònsò ùndì mwà kwikalapù sheefù awu, nudi numòna's; ne pàndì ncyiyi mwà kwikala nàнку to, nèngùumukèpu. Ncyà bushùwà.

⁸¹⁴ Kaa, mwanèètù wa balùme, aci's mbundù ne dibùlà dyà ngàsà bwà bakàjì kwenza nàнку. Kàdi ncyèna—ncyèna ne awu meeji to, mwanèètù wa bakàjì. . . Ncyèna—ncyèna nkupwekesha milongo to, ndi nteeta ànu bwà kwamba. . . Èkèleeziyà wetù ewu kàtu ne byà buumambàlà abi to, bantu bàdi ànu bàlwa apa cyanàànà. Kàdi ewu nnzùbu wa Nzambì, ne kakùyì mpatà to tutu twambila bantu bwà kabiiyadi bàwàla bintu abi to. Bwà ne bìdi. . . newikalè mwà kulumbulula bwà bintu abi ku Ditùkù dyà Cilumbulwidi. Mpindyewu tàngilà kùneeku. Ne lekèlà nsukì yèbè yileepè, wamònu's, ne ikàlà inábànza.

⁸¹⁵ Mpindyewu:

Mpindyewu mu eci cidi. . . Ndi nnwàmbila ne ncyèna nnutùmbisha to, bwalu nudi nudisangisha bwà. . . kabìyi bwà kutàmba kulengela to, kàdi bwà kutàmba kubùpa.

Bwalu cyà kumpàlampala, panùdi nwènu nudisangisha mu èkèleeziyà, ndi ngumvwa bàmba ne kudi matàpuluka munkaci mwènu; ne bikwàbò, . . . (bìdi biya mpindyewu ku mèèsà a Mukalenge)

⁸¹⁶ Mpindyewu tèelejàayi Aci. Ki bwà cinyì banjèlo. . .

⁸¹⁷ Mpindyewu, Mwanèètù Palmer, ncyèna nkwambidila pa mukàbà wà mèyi ewu bwà wèwè kuyiisha cintu cìmwècìmwè kuntwaku cìndì mèmè nyiisha kaaba aka to. Kàdi wèwè's udi mumanyè ànu bìmpè menemene, ne wèwè bu muyiishi, s'udi mumanyè ne aci m'Bulelèlè, mwanèètù. Èyo.

⁸¹⁸ Pa nàнку *banjèlo* kaaba aka “mbantu.” Wèwè muswè kucimòna, Mwanèètù Palmer, cidi mu kàleeta kakesè ne: “banjèlo.” Kàdi Bible mmutungùnùke. . . Yèyè ùdi wàkula bwà mulùme ne mukàjèndè, nwamònu's, ki cidi cyena-bwalu ncyòci aci.

⁸¹⁹ Mùshindù awu ki wùdi bantu bapetè cibwejàkàjì mu Bible, bàmba ne: “Èè, Nzambì ùdi wàmba cintu *apa*, ne cikwàbò. . .” To, wèwè—wèwè ngudi upàtuka mu cyena-bwalu. Shààla wèwè ànu pa cyena-bwalu cìmwècìmwè aci, kwàjiki. Yèyè ùdi wàkula bwà mulùme ne mukàjèndè.

⁸²⁰ Mpindyewu cikwàbò cintu cìndì njinga kulenga kumpàlà kwà twètù kujikija, necìngangàtè tusunsa tutwè ku túbidi:

74. Bansantu nebiiikalè penyì paanyimà pàà bukòokeshi bwà bidimu cinunu? Ne mmubidi wà mùshindù kaayi wikalàbo naawù?

821 Ndi ngeela meeji ne alu ki lukonko lwà lutàmbe kwikala lwà kalolo, ndi mémè ànu munangè aci. Mpindyewu tütapàâyimù dísù buludi.

822 Ku cibangidilu, Nzambi...Netwàlukilè ku dilongesha dyètù dyà Ebèlù ànu bwà katanci kakesè cyanàànà. Nzambi ùvwa mpokolo munène, munène wa meekala mwandamutekète ewu. Mbanganyì bàdì bamanyè nànkù? Nwamònu anyi? Ne mbanganyì bàdiku bamanyè ne Nzambi ùdi ne Nyumà mwandamutekète? Kakùyì mpatà to, Nyumà mwandamutekète. Ne kùvwa mèsù mwandamutekète mu mwàna wa mùkòòkò, ne bikwàbò, byònsò abi biikàle bidísanga mpindyewu. Nwamònu anyi? Mpindyewu, ki civwà Nzambi ncyòci aci.

823 Mpindyewu Yéyè (Logos awu) pààkapàtukàYe mu Nzambi, civwà ciikàle Nzambi ùmuka ku mpokolo munène umwèpelè ewu ùbwela mu mubidi wà mu mmwènekèlu wa—wa muntu; ki kwenzacì Logos awu, citùdì tubiikila ne ntèòfàní aci.

824 Mpindyewu, wèwè wangata tèòfàní paùdì utàngila cyòci aci apu, cidi mmuntu. Mpindyewu utùdì...Mpindyewu, ki kutùvwà nkwòkù aku ku cibangidilu. Mpindyewu, kwèna ucyumvwa mpindyewu to, kàdì mùshindù awu ki wùvwà kwàka ku cibangidilu. Pààkenzà muntu...Pààkenzà Nzambi muntu mu cimfwànyì Cyèndè, Wàkamwenza mwikàle tèòfàní. Ne Wàkamutèeka ànu mu mubidi...Pààkenzà Nzambi muntu mu cimfwànyì Cyèndè, mu difwànangana Nèndè, bàvwa... Mu Genèsè 2, kùvwa...ànyì mu Genèsè 1.28, ngeela meeji ne mmwòmò amu: “Kakùvwa kwanji kwikala muntu bwà kudima buloba to,” kàdì Nzambi ùkaavwa mwenzè mulùme ne mukàji. Ncyà bushùwà : “Kakùvwa muntu bwà kudima buloba to.”

825 Pashiishe Nzambi kuvwijaYe muntu kwinshì ndambù ne kumutèekaYe mu mwoyi wà nyama, mbwena kwamba ne mu mubidi ewu, ànu menemene mùdì nyama amu bwà wàmòna mwà kudima buloba, wàmòna mwà kulenga. Tèòfàní awu kèna ùlenga, kèna ùmòna, ùlabula, ùnunkila, ùmvwa to; byumvwilu bitùdì naabi ebi. Pa nànkù Nzambi kutèekaYe muntu muntwamu bwà—bwà yéyè kulenga ne kuumvwa pàdìbo bàmulenga.

826 Nènkù—nènkù pàvwàye wèndakana mu myaba yònsò mu budimi bwà Edènà, dyàmbedi bu tèòfàní (mùdì Nyumà Mwímpè kaaba aka mpindyewu wèndakana kaaba aka emu), ùvwa ùlombola mwoyi wà bukwànyama. Ùvwa ùkòntonona bintu byònsò, kàdì kàyi mufwànyine kudima buloba to, nwamònu’s. Ki Nzambi kumutèekaYe mu mubidi bwà wàmòna mwà kudima buloba. KumupèeshaYe byumvwilu byèndè bitaanu abi, bwà kudimayè buloba ne kulongololayè madimi a—a mvinyò ne— ne bikwàbò, kàdì piinè apu muntu ùvwa ùmwèka ànu nkàâyèndè. Kaa, eci’s ncimfwànyì cilenga be.

827 Tàngilàayi, bwalu pààkenjiibwàye dyàmbedi, wàkenjiibwa bantu bàbidi pàmwè. Ùvwa mwenjiibwe mwikàle

mulùme ne mukàjì, muntu awu. Bible mmwambè ne ki mwàkenjiibwàye. Nzambi wàkenza muntu mwikàle mulùme ne mukàjì, “mwàkamuMùfùkàYe.” Mònaayi mpindyewu ne, pàakatàpuludiibwà muntu ne tèòfàní awu ne kutèekiibwayè mu musunya, kà—kàvwa ànu menemene mujimà mwaba awu to; citùpà cyà buumuntù bwèndè cìcìvwa anu tèòfàní, pa nàнку kabìvwa bìmwèka bijaalàme to.

828 Ki cilùme ne cikàji byà ngombe biyaaya byàbya, ki kabalù kàyaaya kàka, ne ki ngombe uyàaya wàwa, ne ki bintu byònsò biyaaya byàbya, bibìdi bibìdi. Kàdi Adàmà, yèyè... bivwa... Nwamònu’s, kùvwa kupangike cintu kampànda. Dijinga dikolè diinè adi dyàkaleeja ne kùvwa mwena-dyènde mumwindile. Nudi nucyùm vwa anyi? Ne ànu meeji miinè a ne tudi ne cyà kufwà pànwapa aa, a ne tudi ne lutàtù ne tupampakana, ne biikàle tujinga Mwoyi wùdi kawùyi ne lufù awu, ki cidì cileejà ne cyòcì aci ncitwìndile. Nwamònu anyi?

829 Nènku Adàmà wàkadimòna nkàayèndè. Nènku Nzambi, bwà kuleeja ne kabàvwa mwà kutàpuludiibwa to... Mpindyewu nêngàalukilè mbwelè mu cintu cìmwècìmwè eci, ànu bwà katanci kakesè cyanààna.

830 Mònaayi, Yèyè kàakayakù kwangata bulaba ne kwenza Evà to, kàdi Wàkenzela ku bulaba bwà ku cibangidilu abu, Adàmà. Wàkangata lubadi lwà mu luseke lwèndè ne kumwenzela mumukwàcishi, ne yèyè awu ùvwa ng’Evà. Wàkenjiibwa bwà mulùme, ne citùpà cyà mulùme. Ùvwa citùpà cyà ku yèyè ku cibangidilu, mu bufùki, mu tèòfàní. Ùvwa citùpà cyà ku yèyè pànwapa mu bufùki ebu. Mukàjì kàvwa mwà kutàpuludiibwa mu bukwàbò bufùki to, byàkakèngela bwà kuvwijiibwayè mu bufùki bùmwèbùmwè abu.

831 Ki bwà cinyi bivwa bikèngela bwà Kilistò ne Nzambi biikalè Mupèsonà ànu umwèpelè, kacìvwakù mwà kwikala cintu kampànda cishiilàngàne nànsha. Bu Yèyè mwikàle muntu mwìmpè anyi mupròfètà, Kàvwa mufwànyine kwikala Mupikudi to; bivwa bikèngela bwà kwikalaYè Mufùki Yèyè mwinè. Kàdi Yèyè ùcìdi ànu tèòfàní mpindyewu, nudi numòna’s, nènku mùshindù wùvwàYe musangu awu awu.

832 Mpindyewu muntu kulwayè pànwapa ne yèyè—yèyè ùvwa mulenga wa dikèma; ne Nzambi wàkananga cyòcì aci, kwambaYè ne: “Mbìlenga be, biikalè pa buloba ne biikalèpu ne mwoyi kashidi. Kwàjiki; bwà—bwà Cyèndèlèlèlè, ànu nàнку ànu nàнку ànu nàнку. Bitolokè ànu cyanààna, ne cikùnnyibwà cyònsò cìvulanganè, ne byònsò mùshindù awu. Nènku muntu ikalè ne mwoyi, ne nyàma yikalè ne mwoyi, ne bikwàbò byònsò, kashidi ne kashidi. Abi mbìmpè.” Nwamònu anyi?

833 Ki pashiishe mpèkaatù kubwelayè. Nènku ndi muswè kwamba díyi edi. Mu... Bantu bààbúngì bàtu bènza cilèmà cyà cibi be pa Mufundu wùmwe ewu, ne ciinè aci mmu Musambu

wà 23. Bātu bàWùbala nùnkù ewu ne: “Èyowà, nànsha mèmè mpìcila mu cibandabanda *cyà mîdimà* cyà mundidimbi wà lufù.” Mpindyewu, cintu bu nànkù kacitukù to. Bible kèna wàmba ne: “Mundidimbi wà mîdimà wà cibandabanda. . . cibandabanda cyà mîdimà cyà mindidimbi yà lufù” to.

⁸³⁴ Ùdi wàmba ne: “Nànsha mèmè mpìcila mu cibandabanda cyà mundidimbi wà lufù.” Mpindyewu, kumpàlà kwà kwikalaci mundidimbi, bikèngela cìkàlè ne bukènkè bwà kwenzaci mundidimbi. Nwamònu’s, bu mùvwà Davidi mupròfeta ne mu dilaabiibwa, kààkenza cilèma to, wàkamba yèyè ànu Bulelèlà ne: “Èyowà, nànsha mèmè. . .” kí nnè, kupicila mu cibandabanda *cyà mîdimà* to, kàdi, “kupicila mu cibandabanda *cyà mindidimbi* yà lufù.”

⁸³⁵ Dìbà adi bìdi bikèngela wikalè ne byà pa lukàmà búngi kampàndà byà bukènkè bwà kwenza mundidimbi. Nènkù mùshindù awu ki wùdibi pànwapa. Tudi eku bàà mu bufùki eku batàmbe-mfùkilu. Mubidi ewu wùdi ku bukòokeshi bwà lufù, ne wàkalediibwa kùdi mukàji; kakùyì ku cintu nànsha cimwè to ànu ku. . . Kí nkùdi Nzambi to, wèwè udi divulangana dyà kuumukila ku Adamà ne Evà. Wikalè mufiike, mutòoke, anyi cyònsò cyùdi aci, udi cintu cipàtula, mùtòlokù wà kùdi Adamà ne Evà. Aci cidi cyènta ne mubidi wèbè wikalè “mulela mu mpèkaatù, mufwimba mu bubì, mulwè pa buloba mwikàle wàmba mashimi.” Udi mwela mulawu ne mupiiishiiibwe ku cibangidilu cyà mwoyi wèbè, kùyì nànsha, kùyì ne mpùngà to.

⁸³⁶ Mpindyewu, bwalu nyumà ùdi nendè mmulwè kùdi ku bufùki, ne ku bufùki udi ufùmina ku disangila dyà mulùme ne mukàji, dijinga dyà balùme ne bakàji ndidi ditwàla mwànà wa pa buloba. Nènkù wèwè shiya mwànà awu nkààyendè, kùyì umulongesha kantu kajaalàme nànsha kàmwè to, yèyè’s neànyangukè. Wèwè kùyì umulongesha ní mbwimpè ní mbubi, yèyè neàngatè bubì. Bwalu ngiikàdilù wendè ngwa kwenza nànkù awu.

⁸³⁷ Tàngila mwànà mukesè, kàyì bule bupite *apa* to, ùlwa ànu ne ciiji cyà dikèma; neikalè ànu. . . ùdi—ùdi ùdinyènguvula byanza, ùkùnjjija kwìsù aku, ne ùkwàta mweyelu. Bushùwà’s. Ncinyi aci? Nngiikàdilù wendè awu. Mmumupetèle kùdi papa wendè anyi maman wendè, ewu anyi ewu; mamwèndè ùvwa ne ciiji cyà cidya micì, anyi tatwèndè. Kabàyi bóbò to, nkakwèndè mulùme anyi nkakwèndè mukàji uvwa naaci. Nwamònu’s, mmùtòlokò wàbò.

⁸³⁸ Pa nànkù aci cidi cyènta. . . Wèwè udi mulediibwe pa buloba. Udi mulwilè ku bufùki, ne buumùntù bwèbè bujimà mbuffiike ne bukooyike, ne bupiiishiiibwe, ne bwediibwe mulawu ne bwikàle bùyà mu ifernò. Ncyà bushùwà!

⁸³⁹ Kàdi paùdi ulediibwa cyàkàbìdì, dìbà adi Bukènkè bwà Nzambi bùdi bupwekesha nsèsà munda mwà musùukà awu (àlèluuyàh) dìbà adi kacicyèna kàbìdì cibandabanda cyà mîdimà

to, kàdi ncibandabanda ciikàle ne mundidimbù mu cyôci. Wêwê udi mwà kwikala mubwikila pànwapa ne mubidi, ne bintu kwisù kwètù kwònsò eku, kàdi kùdi Bukênkè búngì bukùmbàne munda amu. Ne dîngà ditùkù bikèngela bwà Bukênkè abu ne mîdimà bitapulukè! Ne pàdi bukênkè bùkenkesha, mîdimà yidi yinyeema. Kàdi patwàyà bwà kwikala ne Kilistò mu wòwò mubidi awu, mîdimà ne lufù bidi bijìmina, ne tudi túbwayika tubwela mu Bukênkè bupwàngàne. Butùmbì kùdi Nzambi's wè! Kì kwètù abu's; kakùciyi kàbìdi mabèèdi, kakùciyi kàbìdi mîdimà misambakajakù nànsha.

⁸⁴⁰ Mpindyewu mene tudi ne byònsò bìbìdi mabèèdi ne disànka, ne tudi ne bukòlè bwà mubidi ne dikàndà, ne tudi ne mvità *yà mu mikòlò* ne *yà pambèlu*, ne *mabika* ne *mala*, ne disànka ne tunyinganyinga, ne bikwàbò. Èè, s'bidì ànu mundidimbì cyanààna. Tudi ne bukênkè bukùmbàne bwà kumanya ne kùdikù Bukênkè mwaba awu; kàdi tucìdi ànu mu mubidi, mu musunya. Kàdi dîngà ditùkù Ditùkù adi bufùkù nebùcye. Kì piikalà mwanjèlo wa lufù ùkaadi musòmbe ku mikòlò *yà bulààlù*, kì pàmbà ngàngàbukà ne kwàjikì kwònsò; ne cyà mu bufùki eci necitapulukè ne cyà citàmbe-mfùkilu, ne bukênkè nebàlukilè ku Bukênkè, ne mîdimà neyàlukilè ku mîdimà. Pashiis cyà cifwàkà eci necivwalè dibènga-kufwà. Kì pàvwàlà dibola dibènga-kubola mpòpò apu. Kì pàvwàlà cyà cifwàkà eci dibènga-kufwà, ne tuumuka ku cifùkiibwà cyà cikondo tulwa ku cifùkiibwà cyà Cyendèlèlèlè. Kwèna mwà kupàtuka pambèlù pààpa piikàle mîdimà *yà menemene* to, bikèngela wikalè ne bukênkè mu mîdimà amu. Kì bwalu mbwòbù abu's. Kì mubidi wùdi upeta ngwòwò awu.

⁸⁴¹ Citùdi twenza ncinyi? Èè, mwanèètù wanyì wa balùme munsantu munanga, mwanèètù wanyì wa bakàjì munsantu munanga, kumpàlà kwà difùkà dyà dyulu ne buloba, pàakakufùkà Nzambi mu cimfwànyì Cyèndè, anyì pàakafùkàYe mu—mulùme mu cimfwànyì Cyèndè, ne kufùka mukàjì mu cimfwànyì cyà mulùme bwà butùmbì bwà mulùme apu, Yèyè wàkakenza tèofàni. Anù mufwànàngàne ne Yèyè mwinè, pàakambilàYe bifùkiibwà bìvwàYe mufùke abi ne “Twènzàayi” apu, “Twènzàayi muntu mu cimfwànyì Cyètù Twètù, mu difwànangana Nèetù, tèofàni.” Nzambi kàvwakù mwanjì kulwa mubidi to, Ùvwa mu tèofàni.

⁸⁴² Ne Mòsà wàkaMumòna. Mòsà kwelayè lubilà ne: “Mukalenge, enza nKumònèku.”

⁸⁴³ KwambaYe ne: “Ndà kwàka nàka ùsokomenè mu lubwebwe, mu mutanta.” Kì Mòsà kubwelayè mu mutanta awu; ne pàakapicilà Nzambi mwaba awu, mikenyi ne mikungulu. . . Ne pàvwà Nzambi munkaci mwà kupita apu, Ùvwa Yèyè mwelè nyimà *nunku* ewu.

Ki Mòsà kwambayè ne: “Civwa nnyimà wa Muntu.”
Àlèluuyàh!

⁸⁴⁴ Ûvwa Nganyi? Melekisedekè wàkatùùluka awu, Mfùmu wa Salèmà awu, kàyi ne taatù anyi ne maamù, anyi ní ntwàdijilu wa matùkù anyi ndekeelu wa mwoyi. S’ki Yèyè awu! Nènku Ûvwa mutùùlùke. S’ki Yèyè wàkaakula ne Abraham awu; uvwa muDibùngàkàjile kaamubidi kakesè kàà musunya nùnkù ewu ne, “Hyu!” kwelamù mupùuyà, kubwelamù, ne kulwa e kudyà munyìinyi wà kànà kàà ngombe, kunwà mabèèlè a ngombe, ne kudyà màntekà ne dyàmpà dyà bukula bwà nsèke. Ne Banjèlò bàbidì abu.

⁸⁴⁵ Ne pààkapàtukàbo kuntwaku, ne bintu byònsò abi kwenzabì ànu ne, “Hyu!” kujìminabì e kuyabì.

⁸⁴⁶ Kacya ncivwakù mukwélèlè meeji to. Kwènji cikondo kampànda, mvwa nsoma mutèlèngà wà mu cingoma, mvwa ne cingoma cyà .22, ncyà .220 Swift. Ne nwènù bàna bèètù batuuci bàà bingoma mwab’ewu nutu bamanyè. Kaadzajì kakesè aku, ndizajì dyà tundimbà makùmi ànaayi ne mwandamukùlù, dìipacila bule *ebu*, dizajì dyètù dyà cibiidilu dyà .22 edi. Bàtu bàdisoma diikàlè ne bukole bwà bwìpacila .30-06 mu cibambalu amu. Mpindyewu ndi . . . Cyapù citù cibyènza citù cilongòlòle bwà kuyadi too lubilu lwà lwìpacila mètres cinunu ne nkàmà yisàtù ne makùmi àtaanu ku kasùnsukilà kàà kasunsa. Èyo, kàdi udi mwà kwela bìngì bukùmbàne bwà . . . kudìsomenaci nkààyebè, ne mwikàlè mwà kucifikisha too ne ku mètres cinunu ne nkàmà yitaanu ku kasùnsukilà kàà kasunsa. Nènku—nènku mu ngaakwilù mukwàbò, wèwè ucituuta . . . Tuvwa tutuuta, ditùku adi, mu ntàntà wa mètres matwè ku lukàmà ne makùmi mwandamukùlù, dizajì òvwa dikadituuta mu lupwishi, òvwa mwà kuya kumpàlà kwà mwadi wà cingoma kuumvwikawù. Ki lubilu lùyaayadi ndwòlò alu.

⁸⁴⁷ Pashiishe angàtà kaci kàà ku mènù (nudi bamanyè, kaaba kàà kabèètèlèlè kàà kaci kàà kwela ku dìnù aku) ne ùkèlè mu kapyà kèèbè aku amu ne ùjè kantu aku tètè ne kapyà, ànu bu tundimbà tukesè tùnaayi ànyì tùtaanu nànkù awu, ne kàdi ùtùtèkè lwà kumutù aku, kàdi pashiishe wèlè dizajì dyèbè adi muntwamu. Imàna mwaba awu, ne udi ne dizajì mu cyanza amu mu kasùnsukilà kàà kasunsa. Kàdi ùcìtuutè kwàka wasa kankalankala kasòmbe mu ntàntà wa mètres makùmi àsambòbò neebè, kankalankala aku kakàakunyunga nanshà mene to. Dizajì adi didi dyàlukila ku ngiikàdìlù yadi yà ku cibangidilu, dyàlukila ku gaz. Ki dèzajì ndyòdì edi dyà cyamù cyà mikùba ne plomb bisambakaja, mu kasùnsukilà kàà kasunsa kàmwè, ndyalùkile mu mùshindù wà kùciyikù mwà kudipeta kàbidì to. Ndyalùkile mwàkadidi kùkaadi bidimu mìllyaalà lukàmà, dyalùkile ku gaz. Bikèngela gaz ayi yìdivùngè ne yàlukilè ku cyamù cyà mikùba ne ku plomb, ne bikwàbò, mùshindù awu. Bikèngela bwà gaz ayi yishimatè.

848 Mpindyewu, ki bwalu mbwôbù abu's. Ki mutùdi twétù aba pânwapa nânku, tudi bafùme ku kampànda wa mutàmbe kutùmbuka. Ku cibangidilu tuvwa mu cimfwànyì cyà Nzambì. Cibwikilu ne mîdimà bìdi bitùpangisha bwà kucìmanya mpindyewu. Kàdi Yesù wàkambila bayiidi Bèndè ne Yèyè “ùvwa naabò kumpàlà kwà difùkà dyà dyulu ne buloba.” Nwamònu anyi? Tuvwakù! Kanwèna mwà kucìmanya mpindyewu to, kàdi nuvwakù ku cibangidilu. “Nènku ntentà wa pa buloba ewu yèyè munyangùke, tukàadi ne mukwàbò mwindile!” Alèluuyàh! Nènku dîbà adi tudi tubwela mu tèòfànì ewu, mutùvwàku basòmbèle musangu kampànda, bwà twamònakù mwà kudya ne kulabulangana ku cyanza. Ne misùukà yidì mwinshì mwà cyoshelu yidì yèla lubilà ne: “Too ne dîbà kaayi's, Mukalenge?”

849 Kùdi bibàndilu mwandamutekètè bìdi bìfikisha kùdi Nzambì, bwà Nyumà mwandamutekètè pàdi—pàdiYe ùpweka apu. Eyo, paùdi uya mwinshì mwà cyoshelu cyà Nzambì, yivwa yidila myadi ne: “Mukalenge, too ne dîbà kaayi's? Tudikù mwà kwalukila anyi, kwinshì eku?”

850 Nzambì kwambaYè ne: “Indilaayi cikondo cikesè cyanààna, too ne piikalà bakwènù mwà kukènga cintu cimwècimwè cinùdi nwènù bakènge aci.” Nwamònu anyi?

851 Nènku dîbà adi misùukà yidì yàlukila, ne yishààla cyàkàbìdi balùme ne bakàjì, ne nebìikalè ne mwoyi kashidi piikalà mîdimà ne lufù ne mabèèdi ne tunynganyinga twà mifitù byònsò bijimìne; kakùciyi kàbìdi mundidimbì to, kakùyi mpatà to kwikàle ànu muunya pa muunya!

852 Tèelejàayi. Bwalu mbwôbù ebu. Kwikalè mîdimà ànu yètù yà mikolè eyi; kakwèna mwà kulwa mîdimà mipitèpìte bùngì dîbà kadiyi divingùtùle kàtùpà ne katùpà kònsò kàà mîdimà ayi nànsha. Mîdimà ne bukènkè kabyèna mwà kushààla pàmwè ntàntà mule to. Bwalu . . . Cidì citàmbe bukolè ncinyi? S'mbukènkè. Nènku pàdi bukènkè bùkenkesha, mîdimà yidì yiya mwamwamwa. Amen. Kanwènaayikù ne disànka anyi? Kanwènaayikù ne disànka bwà munùdi bamanyè anyi? Kakùyi mpatà to, kakwènakù kaamundidimbì mwaba nànsha wùmwè to. Kàdi Bukènkè bubènesha bùdi mu myoyi yètù mpindyewu mene ebu, cintu kampànda cyàndamuna cìfila bujaadiki ne: Mwànà wa Nzambì, bukolè bwà Nzambì.

853 Nènku tudi tubwela mwab'ewu, tutàngila bukolè bwà Nyumà Mwîmpè bütùuluka mu disangisha, bwàmbe ne: “Wèwè udi Mándàmù *Kampànda*, ne udi mwenzè cintu *kampànda*, mu mwaba *kampànda*. Udi musaamè cyôci eci kùkaadi ntàntà bule *kampànda*, kàdi EMU MMÛDÌ MUKALENGÈ WÀMBA: ‘Juukilà kuulu, wondòpiibù.’” Ne muntu mucibùkile panshi mwikàle mpofo ùjuuka wimana. Ne muntu mushààle ànu mundidimbì, muddyà kùdi kànsèrè, ùjuuka ùshààla cyàkàbìdi ne mwoyi ne mubidi tumatuma.

854 Kakùyi mpatà to, Yesù wàkamba ne: “Bintu bìndi Mémè ngenza ebi, nenùbyéñzè pèènu.” Ne Yéyè mmwambè ne: “Ncyèna ngenza cintu nànsha címwè pàdi Taatù kàyi muNdeejè to.”

855 Ncinyi aci? M’Bukènkè bùdi bulwè kubwelakanangana mu mîdimà eyi abu, nwamònu’s, bwà kutùpikula. Nuuvù cîndi muswè kwamba aci anyi?

856 Mpindyewu, dîngà ditùku nebyàlukilè kwôkù aku, ne pashîshe pàdi tèòfàní ùlwa cyàkàbìdi mubidi wùdi kawùyi mwà kufwà mùvwàwu ku cibangidilu amu, dîbà adi Yesù ùdi ùlwa, ne Nzambì. . . pààlwà Kilistò umwe. Kilistò neàsòmbè pa Nkwasa wa butùmbi, ne bantu bônso nebiikalè bantu. Kilistò neikalè pa nkwasà wa butùmbi wa Davìdi, Muntu, Mukalenge Yesù; kàyi mwà kufwàku to. Twètù katwàkufwàku to, katwàkusaamakù to, katwàkwikalakù kàbìdi ne tunynganyinga to, ne netwikalè ne mwoyi munda mwà bidimu byònsò cinunu abi.

857 Ne pààjikà bidimu cinunu abi pa buloba ebu, dîbà adi dyabùlù ùdi ùpàtuka; ne dibìika diibìdi dyà ku bafwè dîlwa, dibìika dyà ku bafwè dyà babi. Bàdi bàkùngwija cilwilu cinène cyenzè bu nsenga yà ku mbù, ne bàlwa bwà kunyungulukila citùdilu cyà bansantu, ne pàdi aci cyènzeka, Nzambì ùdi ùlòkesha kapyà ne soufre bìfùmina mu dyulu ne ùbàbùtula.

858 Ne Yone mmwambè ne: “Mémè kumòna dyulu dipyadipyà ne buloba bupyabùpyà, bwalu dyulu dyà kumpàlà ne buloba bwà kumpàlà byàkajìmina, ne kakùciwva kàbìdi mbù to. Nènku mémè, Yone, ngàkamòna Cimenga cyà Cijila, Yelusàlèma Mupyamùpyà, ùpweka ùfùmina kùdi Nzambì mu Dyulu, mulongolola mùdi mukàji-musèla mulengejila bàyendè.” Ki bwalu mbwòbù abu’s.

859 Mwaba awu yéyè kwamba ne: “Mukàji. . . Mwànà wa mùkòòkò ne Mukàji-musèla nebiikalèmu bwà kashidi.” Nekwikalè buloba bupyabùpyà, miliyò ne miliyò yà kilomètres carrés. Kaa, ekèlekèlè. Cimenga aci, Bible ùdi ùfila bule ne bucyàmà byà Cimenga aci ne cìdi ne cipaapu cyà kilomètres carrés binunu makùmi àbìdi ne binaayi. Cìdi ne bule bwà kilòmèetà binunu makùmi àbìdi ne binaayi, bucyàmà bwà kilòmèetà binunu makùmi àbìdi ne binaayi, ne kilòmèetà binunu makùmi àbìdi ne binaayi yà butùmbùke. Ki dyumvwija menemene didi Bible ùfila bwà Cimenga aci ndyòdi adi. Kabyèna bìkèmesha to bwà pàdiku kakùciyi kàbìdi mbù, kakùwva mwaba bwà mbù to.

860 Kaa, nekwikalè bulenga bwà èyo! Ne mwómò amu, mùdi mpokolo ànu ku Nkwasa wa butùmbi wa Nzambì aku mene, udi upweka kumpàlà kwà Nkwasa wa butùmbi aku. Kùdi mucì ku luseke ne ku luseke lwònsò lwà mucì. . . lwà musùlù wà Mwoyi. Ne ku mucì ewu kùdi mìshindù dikùmi ne yìbìdi yà bimuma, ne wùdi wùkwàma bimuma byàwù ku ngondo ne ku ngondo.

⁸⁶¹ Ki bakùlù makùmi àbìdì ne bànaayi mbòbò abu. Ki Mukàji-musèla nyawù. Ki binunu makùmi ànaayi ne binaayi mbyabi, batungu bàà ku ntempèlù. Kaa mwanèètù, twètù's tuyààya ku mwaba kampànda! Bintu's mbitwìndile kumpàla eku. Bànaayi. . . Bakùlù makùmi àbìdì ne bànaayi. Batungu binunu lukàmà nè makùmi ànaayi ne binaayi. Mukàji-musèla musòmbe ne Kilstò. Ekèlekèle, nwènù bàdì bàmba. . . Cisòmbedi cyànyì, Cisòmbedi cyà kalolo! Amen.

⁸⁶² Pàndì ngeela meeji ne ndikù ne dyèsè dyà kuyamù, ne wèwè pèèbè ne dyèsè dyà kuyamù. Kàdi bwà cinyì udi usungula bwà kwendela mu mîdimà eyi kùyi umònakù Bukènkè to, ne kufwà ne kuya mu cimvundù cinène kàdi kushààla cintu cyanààna? Bwalu pàdì Bukènkè bwàngata bukòokeshi bwàbù bwà kumutù, kakwèna mwaba bwà mîdimà nànsha. Ndàakubi ùkapetè kùdì mîdimà miyè, pàdì bukènkè bùlwa's. Ki mùdìbi, pàdì bintu byònsò byàlujiibwa kùdì Nzambi. Yìwwa, mîdimà yìwwa ne ntwàdijilu, mîdimà yìdì ne ndekeelu. Kacya Bukènkè kabùvwakù ne ntwàdijilu anyì kabwàdyàkwikalakù ne ndekeelu to. Kacya Nzambi kàvwakù ne ntwàdijilu anyì kàadyàkwikalakù ne ndekeelu to. Nènku, dîngà ditùku, buloba bujimà bwà masandi ebu ne mpèkaatù yàbù yònsò ne bulenga bwàbù abu, mùdìbo bàbyàmba's, ne bifidi byàbù byà masànka ne masansakata, ne dibàlakana dyàbù dyònsò ne byònsò abi nebìjiminè mu cyanààna, ne kabyàkwikalakù kàbìdì to. Kabyàkwikalakù kàbìdì to, kakùciyi kàbìdì meeji a dyelakù to! Mene, mbambè ne: "Kabyàkulwakù kàbìdì mu civùlukilu to."

⁸⁶³ Kàdi babènèshìibwè bàà Mukalenge nebìikalè ànu Nendè misangu yònsò. Netwìkalè ne mubidi mufwanàngàne ne mubidi Wèndè Yèyè wà butùmbi awu, ne netwìkalè ne mwoyi pàmwè Nendè, ne netùdye Nendè, ne netùsòmbè pàmwè Nendè, ne netùsombelè Nendè kashidi ne kashidi munda mwà mikùngùlù mileemile yà bikondò; ne bikondò byà Cyendèlèlè nebìikalè ànu byènda bìya pàmwè ne buloba kabìyi ne ndekeelu to.

⁸⁶⁴ Nènku wèwè udi ne disungula dilòlò edi. Wèwè kùyi mudìlongòlòle bwà kufika mu mwaba awu, nànsha wèwè uya mu èkèleeziyà bìshi, nànsha wèwè mwikàle cidimba cìmpè cyà bìshi, udi mujìmine pàdì Kilstò kàyi mukupèeshe Mwoyi mupyàmupya mu mîdimà mùdì wendela amu. Udi mwà kwikala mutèndeleeedi. Batèndeleeedi, tèèlejàayi, balundà bàànyì, ntèndeleeelu ngwa mamanya a mu mitù. Nwamònu anyì? Bàna bàà Kaayinà bònsò bàtu misangu yònsò ànu ne ntèndeleeelu. Beena Yudà abu's bàvwa ne ntèndeleeelu pàakalwà Yesù apu, kàdi's bàakabènga lupàndu.

⁸⁶⁵ Udi mwà kwikala mùtèndeleeedi wa mu ùmwè dilòlò edi. Udi mwà kwikala Presbytèrien, Méthodiste, mwena Mpenta, Nazaréen, Pèlerin de la Sainteté. Udi mwà kwikala ànu bu ntèndeleeelu; uya mu èkèleeziyà wenù ufila bujaadiki, udi mwà kwimba misambu ne kwela mbilà ne kutùmbisha Mukalenge,

udi mwà kutwàla byàdiikùmì byèbè ku èkèleeziyà, udi mwà kusòmbesha mwena mutumba neebè bilenga, aci kacýènakù ne cyà dyenza nànsha címwè ne kwèbè kuwayà kwà Cyendèlèèlè to. Kaayinà wàkenza kantu ne kantu kàà cyòci aci. Kakùyì mpatà to.

⁸⁶⁶ Bible mmwambè ne “blé ne lupèlà bìdi bikolela pàmwè.” Kààblé kakesè kàà kale aku nkasòmbe, kiikàlè kàfwa nyòòtà yà mvùla, ne—ne nyùnyaacisòngà pèndè. Pàdi mvùla ùlwa, nyùnyaacisòngà ùdi ne disànkà dyà kupeta mvùla ànu mùdi blé amu. “Kàdi, ku mamuma àbò, nkunwàbàmanyinà.”

Mpindyewu túsambilààyaaku panùcìdi nukenketa mamuma ènù apa:

⁸⁶⁷ Mpindyewu, Taatù Nzambi, kùvwa yimwè nkonko mikolè kaaba aka dilòlò edi. Ndi mwà kwikala ncìyi mwenzè cintu cìdi cikèngediibwà to, kàdi ku dyànyì pàànyì dimanya; Wèwè udi mumanyè mwoyi wànyì. Ndi ndòmba, Nzambi, bwà Wèwè ùcyàkidilèku. Nènku mpindyewu, pàmwàpa, mu yimwè yà ku nkonko eyi, mèmè ncìyi muyènzè bímpè to, díbà adi akùlà Wèwè ne myoyi yà bantu aba, ne Ùyìfikishè ànu menemene mu mùshindù wùvwa wùkèngela kwikalayì. Ndi ndyùmva ne Wèwè ngudi mungambile. Kàdi mèmè mufwànyine kwikala mutùpàkàne, díbà adi Wèwè ùmfwìlèku luse.

⁸⁶⁸ Nènku ndi ndòmba, Nzambi, bwà yònsò wa ku bòbò aba àngatèku bintu ebi mu mwoyi wèndè, ne swàku bwà èlanganèpu meeji ne èlèku meeji mùshindù ewu: “Èyowà, èkèleeziyà nyèyè ewu, bintu ebi mbyòbì abi. Ki cìdi Bible mwambè.”

⁸⁶⁹ Pàmwàpa bainàbànà, Mukalenge, Wèwè udi mumanyè ne ncìvwa ne meeji a kwamba cintu kampàndà cyà mu mèmè to pa kubyàmba. Kàdi, Nzambi, ndi—ndi munangè bânà bèètù bàà bakàji, ne Wèwè udi mumanyè nànkù, Taatù. Wèwè udi mumanyè meeji àndì mbèèlele. Kàdi bwà kwimana ne kubàmbila cintu kampàndà cyà mafi, s’ndi mufwànyine kwikala mu—museeswishi kùdìbo. Ncyèna njinga kwikala museeswishi kùdi bânà bèètù bàà bakàji to, ndi muswè kubàmbila Bulelèlè. Nènku, Taatù, ndi mBwàngata buludi mu Dìyì Dyèbè.

⁸⁷⁰ Ne mpindyewu ncyèna mpiìsha bânà bèètù bàà balùme to, kàdi, Mukalenge, ndi ngamba ne mbapiile pàdìbo bàànyishilangana bintu ebi apu. Kàdi byòbì ne inàbànà ùvwa mumanyè cìdi címpè kàdi ùya ùkenza nànkù, díbà adi mbwalu bwèndè, mpaasàtà kí ngudi mupiile nànsha.

⁸⁷¹ Abba Taatù awu, bintu abi n’Dìyì Dyèbè, ne bòbò m’Bèèbè Wèwè. Mpindyewu Wèwè akùlaaku ne myoyi yà bantu. Ndi mbàlambula bònsò k’Ùdi. Nèmmonè ciWénji, Taatù; Wèwè ngudi mumanyè. Akùlaku ne mwoyi wònsò. Tudi tulòmba mu Dìna dyà Kilistò.

Nènku ne mitù yètù miinyika:

872 Ndi ndikònkà muntu ní mmufwànyìnekù kwela cianza cyèndè muulu, kwamba ne: “Mwanèètù Branham, wamvùlukakù ànu cyanàànà bwà mèmè kwikala mucìmunyi mu byònsò, ne ku ditùkù dyà ndekeelu ngaavwàlakù civwàlù cyà dibanjì ne ngìkalakù pàmwè ne Kilistò.” Udikù mwà kwela cianza cyèbè muulu, wamba ne: “Nsambìdìlèku” anyì?

873 Bònsò lamàayi mitù yènù miinyika mpindyewu, miikàle ànu miinyika. Nzambì ànùbènèshè, abi’s mbimpè. Kwàka, Nzambì ànùbènèshè, nwènù bânà bèètù bàà bakàjì; ne bânà bèètù bàà balùme kàbìdì, bàdì beelè byanza muulu abu. Abi mbilenga be.

874 Mpindyewu, Taatù, Udi mumòne byanza byàbò. (Ndi mumanyè ne, misangu mikwàbò nudi nudyàmbedila ne: “Èè, ànu kaadisambila kakesè cyanàànà mùshindù awu?”) Nzambì, ndi mvùluka maamù awu, uwwa mwambè makèlèlè awu ne: “Ànu kaadisambila kakesè cyanàànà aku mu nzùbù mwèndè ditùkù adi pàvwà mwànà wa balùme awu ùpùnga ne lufù apu, mbingu yisàtù bwà kwikalayè ne mwoyi, cyùjà cyà kànsèrè cyà lufù aci mu bwongò, nènku mpindyewu bwà kushintulula maalu.”

875 Ndi mvùluka Hezèkiyà, mutwè mpàla ku cimanu, ùdila mwadi ne: “Mukalenge, ndi nKusèngeleela, ikàlakù naanyì luse. Ntwèku mushinga, bwalu ntu mwèndè kumpàlà Kwèbè ne mwoyi mupwàngàne.” Cyàkashintuluka ku lufù kulwaci mwoyi.

876 Lubilà lukolè lùmwèpelè lwà kùdì Mwànà wa Nzambì ne: “Lazàrò, pàtukà!” ne muntu mufwè kupàtukayè.

877 Éyi Nzambì wa yàaya, Wèwè utu mwambè ne: “Akùlaayi, lòmbaayi, ne necìfidìibwè. Paùdì wamba cintu nànsha cyà bìshì, itàbùuja ne cyùdì wamba aci cidì cyènzeka, neùpetè cyùdì wamba aci.”

878 Mpindyewu, Taatù, ndi ndòmba bwà muntu yònsò udi mwelè cianza muulu awu àpetè cidiye mwelèle cianza muulu aci. Ne swàku bàbeneshiibwè. Nènku Nzambì, ndi ndòmba bwà Ùkwacishèku bânà bèètù bàà bakàjì, bwà kwikalabò. . . bàaditwàlakù bilenga, bwà Sàtaanà ku télévision ne bikàndàkàndà byà *Bwalu-bulonda Bulelèlè* ne bikwàbò, bìdìbo bakwàte naabì mudimu ne mapeepelela abi, ne ndongamu kayiyi mikenketa, mùshindù wùdì manyaanù ne maalu a ciipanshi ku télévision ne bikwàbò awu, bivwàku bifwànyine. . . Civwàku cifwànyine kwikala cyamù cyà mudimu bwà kuKupetela miliyò yà misùùkà, kàdì mùshindù wùdìbì kabìyi bikenketa’s, kàdì kupàtula bintu byònsò byà bukooyà ebi bìdìbo. . . Kaa, byà luse be! Ne pa kumanya ne nyumà wa dyabùlù mmubwelè ne ùkaadi mu nyùngulukilu wa bânà bèètù bàà bakàjì, ne ùteeta kubàfikisha ku dilonda dyà myòdelè ne divwàlè dyà bilàmbà mùshindù awu.

879 Ne tudi tusangana ne mu. . . ne mu bânà bèètù bàà balùme pààbò, Mukalenge, mùdìbo bàdifwànyikijila ne bàdì mwà kunwà mfwankà ne kunwà maalà, ne kutùngunuka mùshindù awu,

kàdi kwikala ànu beena Kilistò ne bwalu bàdi bàmba ne bàdi “biitabuuja.” Bàmanyèku ne “dyabùlù ùtu pèndè wìtabuuja.” Kàdi kî mmusùngìdìibwe to, “ùdi wìtabuuja ne ùzakala.”

⁸⁸⁰ Nènku mpindyewu, Taatù, tudi tulòmba bwà Wikalèku neetù bônso luse, ne ùtùfwilè luse ku mpèkaatù yètù, ne pàmwàpa bàmwè kabàvwa beelè byanza muulu to, Éyi Nzambì, ikàlàku ne luse. Swàku bwà mpùngà udi ulonda udibò bàpeta, swàku bwà belè byanza byàbò muulu.

⁸⁸¹ Nyewù tukàadi tudìlongolola bwà kudya mèèsà a Mukalenge, Mukalenge. Tùfwilèku luse ku matomboka ètù ne byà kale byà dibènga kupetangana ku mèyi mu nsòmbelu abi. Nènku swàku bwà twàkidilè dibènesha Dyèbè, bwalu tudi tulòmba nùnkù mu Dinà dyà Kilistò. Amen.

⁸⁸² Mukalenge ànùbènèshè. Nwamfwilaayikù luse bwà dinùlama dyà mùshindù ewu. Ndi ànu ndikonka, kumpàla kwà mèèsà a Mukalenge, kwòkò muntu mulwè bwà bàmusambidilè, muswè bwà bàmusambidilè, èè, tudi bafwànyine kwikala ne disànkà dyà kwenza cyòci aci ànu pa dībà edi mene, kwòkò muntu wa kusambidila.

⁸⁸³ Èyo, mwanèètù, lwàku nendè buludì kùneeku, nebiikalè bìmpè. Kàdi indilà ànu kakesè cyanàànà, nènku pashìishe ne—netùtangalakè. Ne pashìishe patwàtangalajanganà, dībà adi aba bàdi baswè kushààla bwà mèèsà a Mukalenge abu, bàdi mwà kushààla. Kàdi bwà mpindyewu netwènzè disambila bwà babèèdi. Bible mmwambè cinyi?

⁸⁸⁴ Mwanèètù wa balùme awu yèyè kàyì mwà kujuuka kuulu to. . . Bidi ànu bìmpè, àshaalè ànu musòmbe mwab’awu, netùlwe kùdiye aku. Bidi ànu bìmpè, àshaalè ànu musòmbe mwab’awu. Nènku twètù netùlwe bwà kumusambidila. Abi mbìmpè. Èyo, mukalenge, àshaalè—àshaalè ànu musòmbe mwab’awu. Byòbì bimukolèlè bwà kwimana kaaba aka, mòna’s, twètù netwìkalè ne disànkà dyà kulwa buludì kùdiye aku.

⁸⁸⁵ Mpindyewu ndi muswè bwà ngàmbèku kaacintu kakesè kàmwèpelè aka, wèwè mulundà wanyi munanga. Nwamònu’s, ndi—ndi mumanyè ne Mukalenge ùkaadi mujaadike cyòci eci misangu ne misangu. Nwamònu anyi? Mèmè ncyèna ànu muiyishi mwinè to, ncitu ne dilonga dyà kàlaasà ne bikwàbò to. Ndi munangè Mukalenge Yesù, Nzambì mmumanyè ne ntu muMunangè. Kàdi cintu cimwèpelè cìntùku mubiikidìibwe bwà kwenza, nkusambidila babèèdi. Nudi nwìtabuuja nànkù anyi? Nànsha mene kumpàlà kwà mèmè kumanya bwà dipà adi, mwà ne ciibidilu cyà kuya ku lùpitaadi eku; ne ndi mvùluka mùvwà baamìngàngà bakàjì abu bàmba ne: “Mpindyewu neùmvwè bìmpè.” Nwamònu anyi? Nènku ànu cintu kampànda, ncyà ne Nzambì mmudìleejè wa ngàsà bwà kutwà masambila àanyi mushinga bwà bantu.

⁸⁸⁶ Ndi ncinka, dilòlò edi ne, bu dibùikila difwànyine kwenjiibwa, ànu bu dikùbàkùbà dituuta myaba yònsò buloba bujimà. Bamba ne, bantu bònsò bàtù Mwanèètù Branham musambidile, bàlwe kaaba aka, ndi muswè bwà nwènù nwafila dyandamuna kùdì bukalenge bwà États-Unis, mu mukànda mubàfùndila. Ne ciinè aci citwànyine kwikala díyì dyà ku tudyòmbà dyà buloba bujimà. Ngeela meeji ne, pàmwàpa bantu miliyò yinaayi anyì yitaanu mbafwànyine kwandamuna ku dibùikila adi dyòdì dimanyike. Nwamònu anyi?

⁸⁸⁷ Nènku bantu abu, anyì bàmwè bàà kùdìbo bàkaavwa bamanè kufwà, balekelela kwàka kùdì ngàngàbukà, ne—ne mulongolodi wa bitàlù. Bàmwè bàà kùdìbo bashipiibwe mu njiwù; bàmwè bàà kùdìbo bafwè lufwè lwètù lwà ciibidilu elu. Bàmwè bàà kùdìbo mbampofò, bilèmèndà, balèmà, bakònyangàle bidimba, beena ntàtù, beena katombòtombò. . . mu mpitàadi, kabàyi nànsha bamanyè ne tuvwa mu lùpitàadi bwà kubàsambidila to. Bàbwela naabò, bikèngela nùbàngàtè. Bàvwa bafwànyine kudikùma eku ne eku ne kuditàpa mbidi mujimà, kabàyi nànsha bàmanya ne bàdi penyi to. Mu tusunsa tùtaanu, bàshàala mwàbò ne kale, ne kalolo, bantu bàà dinanga, ne meeji mu òwò matùkù ònsò a mwoyi wàbò. Nwamònu anyi?

⁸⁸⁸ Cidi. . . Ncinyì aci? Kì m’Mwanèètù Branham to. N’Yesù Kilistò, Yèyè ngudi muntùme bwà kusambidila babèèdì. Mpindyewu bwalu bùdi nunku. Kacitukù citàmbe kutuuta dyàkalenga mu Jeffersonville to, bwalu, kabingilà nkòkò aka. Mpindyewu, ndi muswè bwà nwènù kumanya ne ndi ne bàmwè bàà ku balundà bàanyi bàà pa mwoyi bàà fyèfyèfyè bàdi kaaba aka mene mu cimenga emu. Nànsha mùdìbi ne cimenga cyòci ciinè, mùshindu wà cimenga, mèmè ncìtu mucìswè nànsha. Ncìtu munangè nsòmbelu ewu to, ne kacya ncìtukù mumunangè to; pàncìvwa mwànà mutekète, musòmbe, mbala mikàndà yànyì yà maalu-malonda, ngamba ne: “Dìngà ditùkù nèngwùmukè mùneemu emu.” Nwamònu anyi?

⁸⁸⁹ Mèmè ncìtu munangè Jeffersonville to, ncisènsè, ncibandabanda. Cidi anu cisènsè cyètù cyà bushùwà eci, ne—ne ncìbì be. Bàndabì kumutù kwà Spickert Knobs eku anyì mu mwaba kampànda, kàdi ùtangidile pa bule lwà mu New Albany ne mu Jeffersonville, pawikalà muswè kumòna. Tàngilàayi kùneeku, bangàngàbukà bàdi mene bamba mpindyewu, ne: “Bantu bàà mu cibandabanda eci bàdi bènda bàjimija mashi bwà nsòmbelu ewu.”

⁸⁹⁰ Inàbànza mutekète mwaba ewu, Mándàmù Morgan, wàkondopiibwa ku kànsèrè, kwangatayè mbwa wendè e kuyayè nendè ku lùpitàadi eku, wèla meeji ne mbwa awu ùvwa ne cikupi. Nudi bamanyè ne cìvwa ncinyì? Bishàadilà byà ku cyapù cyà Colgates ne bikwàbò pa bisoosà bibi mwàkapìcilàye. Mmwaba wà mutàmbe kwikala wà wùtácìsha mbidi wà dikèma.

891 Mwabilaayi kampàndà ùywa mu Cilwilu, kupwekayè muneemu emu ne kupetayè. . . Ùywa ne disaamà dyà mfwènke. Kupwekayè mu Floride emu ne mèsù èndè kulwawù mafìke fitùtù, ki kuyayè kùdì ngàngàbukà, e kwambayè ne: “Ngàngàbukà. . .”

892 Ngàngàbukà kwambayè ne: “Mpindyewu, wèwè ùvwakù mukalwè mvità, kí mmwômò anyì?”

893 Yèyè ne: “To, mukalenge, ncivwakù mukalwè mvità to.”

894 Nwènu baswè kumanya ne ùvwa nganyì, dyèndè ng’Herby. Mpindyewu, bu mèmè ànu mwà kuvùluka. . . Mmu—mmu Union National Bank, mu New Albany, yèyè mmuucyanganyì. Ndàayi ànu kuntwaku nùmonanganè ne udi ubiikidiibwa ne “Herby” awu, nùmukonkè.

895 Nènku kwambayè. . . Kuyayè, kwambayè ne: “Ngàngàbukà,” yèyè ne, “ndi nsàama mutù wà kapàla.”

896 Kumuteetayè, kwambayè ne: “Mmwômò.” Yèyè ne: “Mèmè mvwa ngeela meeji ne uvwakù mu mvità kampànda.” Yèyè ne: “Mulùmýàna, utu musòmbèle penyì?”

897 Yèyè ne: “Udi mufwànyine kwikala kùyi mumanyè mwaba awu to,” yèyè ne, “Ntu musòmbèle mu kaacimenga kakesè katàngilàngàne ne Louisville, mu Kentucky, kàbiikidiibwa ne New Albany, mu Indiana.”

898 Yèyè ne: “Udi uswa kungambila ne udi mupetèle disaamà dyà mutu wà kapàla edi nku màyi a mukèlè a mu Miami emu aa, mu dilwa dyèbè amu anyì?” Yèyè ne: “Wèwè mufwànyine kwikalaku musòmbèle mu Jeffersonville, mu Indiana, anyì mu New Albany, mu Indiana, udi mwà kusòmbela mwaba kanà wònsò pa buloba wùdì cilwilu cyà États-Unis cifwànyine kukutùma awu.” Ki cyònsò cìdiku. Nwamònu anyì?

899 Ki mwaba wùdì mutàmbe kwikala wà ùtácisha mubidi wùdiku pa buloba, wùndiku mumanyè, pa kuumusha cyòci cifwànyine kwikala cisensè cyà cìfila màlèyalèya. Nwamònu anyì? Nènku ndi—ndi—ndi—ndi ne balundà muneemu emu.

900 Tangilàayi kùneeku, ndi ànu mwà kubàtèèla mùshindù ewu. Tàngilàayi Ngàngàbukà Sam Adair, mulundà wanyì awu. Èyo, kùdì Mike Egan, udi musòmbèle pàapa wàwa. Kaa, ekelekele, búngi bwinè búndiku mufwànyine kutèèla mu mènà’s wè! Ànu nkàmà yà balundà balenga bàà dikèma, bannyaànaanyì bàà kale, bânkaadiku mwendènde naabò. . . Nànsha mèmè mupetè balundà bapyabàpyà búngi kaayi, kakwènakù cyàngatà kaaba kàà mulundà wa kale to. Aci kaayi nudi bamanyè.

901 Ki mààmù wanyì mukùlákàjì udi musòmbè paanyimà pàapa wàwa, kàciyi kàbìdì ne matùkù àbúngì pa buloba to, ùkaadi ne bidimu makùmi àsambòmbò ne byà mu njila patùdì twakulangana apa. Ki màmwènàànyì wàwa, ne bidimu makùmi mwandamutekètè, mutàngile ku makùmi mwandamutekètè

ne címwè; mmusòmbe paanyimà apa mu mwaba kampànda, ngeela meeji, dilòlòlò edi. Nènku mwaba awu, kumushiya. Papa wanyì mmujiikìibwe lwà kuntweku; mukàjàànyì mmujiikìibwe kuntweku mu nkità yà Walnut Ridge; mwanàànyì wa mu dibòko mmulaadika muntwamu. Nudi numòna cìndì njinga kwamba aci anyì?

902 Nci—nci—ncìtu muswè. . . Nci—nci—nci—ncìtu muswè kushààla muneemu to, ne ndi ngeela meeji ne àbidì àdì panshì aa, ncìyì nnènga to, nebikengelè bwà ngùumukè. Nwamònu's, bwalu bitu ànu bìmvwila mu meeji, ndi ngambidila cyòcì eci mu cyambilu, ne Bible wanyì, misangu ne misangu.

903 Pàngààkambilà mukàjàànyì, pààkatùpèèshàbo mfrangà yà kwibaka naayì nzùbu wa mpaasàta úndì mupèèshe èkéleeziyà ewu awu. . . Èkéleeziyà ewu ki mwena nzùbu wa mpaasàta awu; ndààyì mwab'awu, nùsanganèbi ní kí nnànkú awu. Nwamònu's, ncìvwa muswè kumwangata bu ne ngwanyì mèmè nànsha.

904 Mpindyewu, pámvwà ne cyà kwibaka mwaba awu, Meda kwambayè ne: “Ndi muswè kushààla apa bwà mààmù wanyì.”

905 Mèmè ne: “Munanga wanyì, mbulelèlè ne twètù ànu benzè nànkú, netùsunè tudyàmbikè bwà bwalu abu. Wamònu's, kabyàkukùmbanakù to. Nzambi mmwambè ne: ‘Tàpulukà,’ bìkèngela ncyènzè.”

906 Kì yèyè ne: “Èè, kàdì mààmù wanyì's!”

907 Mèmè ne: “Nànsha wanyì mààmù pèndè's. ‘Kàdì ewu wabènga kushiya bèndè sungasunga, bwà kuNdonda Mèmè awu, kí mmukùmbànyine kubiikidiibwa ne ng'Wanyì to.’ Ne aci's ncilelèlè.”

908 Dìngà ditùkù, àbidì aa, ndi ndyùmvwà ne nebikengelè bwà mèmè kumwangala, mbwena kwamba ne, kuumuka kuya. Kàdì mùshindù ngwòwù ewu, wikalà masangisha kaayì ènda bìmpè kaaba aka to. Kaàkwenda mudibi byènzeka myaba mikwàbò yònsò to, ne muntu kanà yònsò ukaatùku mudyatè mu disangisha mmumanyè ne aci ncilelèlè, bwalu apa mene mmu cimenga cyànyì sungasunga. Kì cyòcì.

909 Yesù wàkamba cintu címwècímwè aci pààkalwàYe.

910 Bààkamba ne: “Ewu mulùmnyànà ki nganyì's? Kì mmwànà wa mukoonyi wa mabaya wa kuntweku awu anyì? Mmu cìlongelu kaayì mukaadiyekù muyè? Nkwèpi kudiye mukapetèle edi dimanya? Mpindyewu ngǎnji nkumònèbi wenza. . . S'wambì mùdì mwenzè bishimà kuntweku, ngǎnji nkumònèbi wenza byà mwomùmwè muneemu emu. Byùdì mwenzè mu Kaapènumà abi, ngǎnji nkumònèbi ubyènza muneemu.”

911 Yesù wàkamba. . . “Wàkakèma bwà bupidyà bwàbò.” Yèyè wàkakùdimuka e kwamba ne: “Bulelèlè, bulelèlè, Ndi nnwàmbila ne: mupròfeta kàtu ùpànga difutu to ànu yèyè

munkaci mwà bàà kwàbò sungasunga mu ditùngà dyàbò sungasunga.” Mmwômò anyi?

912 Ne tudi bamanyè...tàngilàayi...Angàtaayi Finney, angàtaayi Sankey, Moody; angàtaayi John Wesley, kàvwakù mwà kwangula mpasu to, nwamònu’s, too ne mwàkuumukayè mwàbò. Tàngilàayi kùdì—tàngilàayi kùdì—kùdì—kùdì Moody. Moody, mulongolodi wa bisàbaatà wa mu Boston awu, pàvwàye kàyi mwà kwangulakù mpasu to nànsha kakesè, wàkalwa mu Chicago kumpàlà kwà kumanyikayè. Nwamònu anyi? Byàkakèngela bwà kushiyanganayè ne bàà kwàbò sungasunga. Nebikukèngèlè misangu yònsò bwà wêwè kucyènza.

913 Kàdi mpindyewu, mwab’ewu, Nzambi neàndamunè ku disambila bu nwènù mwà kupwà mwoyi ne ng’William Branham (Nwamònu anyi?), bu nwènù mwà kupwà mwoyi ne William Branham ùdi ne cyà dyenzamù, ùdi ànu kampànda wa wimana bwà kunusambidila cyanàana. Yesù Kilistò ngudi mumanè kwenza cyàdì mulòmbe bwà kwenza aci, bu wêwè ànu mwà kucitabuuja. Nwamònu anyi? Ki ncintu cyà dyenza nànsha cimwè...Mèmè ncyèna ne cyà dyenzamù to, ànu kufila bujaadiki. Kàdi mbimwènèke ànu bu ne mündi mukòlèle neenù muneemu, ne nwènù bamanyè butekètè bwònsò bündi naabù, ne cilèma cyònsò cìndi naaci...Ne nwènù bamanyè bìdì Nzambi mwenzè, mu cimenga eci mene.

914 Cimenga eci, ku ditùkù dyà cilumbulwidi, necyàmbulè bujitu bunène dīngà ditùkù, bwalu nkwenzèke nkàmà ne nkàmà yà dyondopa dyà pabwàdì mwab’ewu mene (Ncyà bushùwà.), mwab’ewu mene. Bimanyinu ne maalu a kukèma, ne dimwènèka dyà Mwanjèlo kuntu kwàka, ne bibèjibeji bìkòbola ne bikwàbò byònsò, kàdi bantu kabàyi ànu...Bwà cinyi nànkù?

915 Mpindyewu dīngà ditùkù, nēngūumukè mwab’ewu. Ndi ndikonka ne: “Ndekeelu wanyì neikalè cinyi? Kukaadi kujikè anyi? Kùkaadi pa kujika anyi? Nkàadi ne bidimu makùmi ànaayi ne mwandamukùlù. Kùkaadi pa kujika anyi?” Cyòci edi ki cìndi ndikònkà. Pìikalàbi nànkù... .

916 Tàngilàayi, bwà cinyi bàà pa buloba kabàvwakù bajingùlùle fòtò awu kuntu kwàka? Kabàakacyùmvwakù lùkàsà bwà cinyi? Bwà cinyi kabèèna bùmvwakù bikwàbò bintu ebi? Bwà cinyi kabèèna bùmvwakù bipròfetà ebi ne bikwàbò? Nudi bamanyè’s, kabèèna mwà kubyùmvwakù mpindyewu to, kàdi dīngà ditùkù nēngūumukè pa buloba, ne pāngiikalà muumùke, dībà adi nebàCijingùlùle. Bāmwe bàà kunùdì nwènù bansongàalùme nenùjingululè cyòci aci paanyimà pàà mēmè mumanè kuya. Nwamònu anyi? Kàdi Nzambi kī mmufwànyīne kwanyisha bwà cyènjiibwè mpindyewu to. Nudi bamòne cìdì...nudi bumvwè cìndi muswè kwamba aci anyi? [Katùpà kàà mukàbà wà mèyi munda mutupù—Muf.]

917 . . . Ànu kaacikànù kakesè kàà ku dibòkò kàà mwànà wa bakàjì. Muntu kanà yònsò ewu udi mwà kukànga ta. Ne ndi ngeela meeji ne Mwanèètù Sothmann wàmbi ne ùvwa mushiye Bible kaaba aka musangu mushààlè wùvwàyepù, ngeela meeji. Kùdikù muntu musangàne Bible, Bible mu—mushààle mu mpùkàpùukà kaaba aka anyi? Wèwè mumupetè, ngwa Mwanèètù Fred Sothmann wa ku Canada. Mpindyewu túsambilàayaaku.

918 Mukalenge, ikàlàku ne luse, pàdì mùjikì ne cyà kwikala wimba mu luvwengavwenga ne Mwanèètù Neville ne cyà kulaabangana maanyi apa, Mèmè ndi nya bwà katentekela babèèdi byanza mu Dìna dya Yesù. Enzàku nàнку, Mukalenge, bwà dyondopiibwa dyàbò. Amen.

919 Bantu bònsò sambilaayi, mpindyewu, muntu ne muntu. Èyo.

Mukalenge, mwànà mukesè ewu, pàdì kakwèndè mulùme mumwimànyine kaaba aka apa. Ùdi ne mubidi wùbèngangana ne mabèèle, dìnà mabèèle. Kàdi Wèwè ngudi ne Bukolè bwònsò ne mwànà mukesè awu kèna mwà kwikala ne diitabuuja bwèndè yèyè mwinè to. Nènku dìbà adi, Mukalenge, nyewu mèmè ne diitabuuja bwèndè yèyè, pàmwè ne baledi ne baakakwèndè tudi twamba, mu Dìna dya Yesù ne, mwànà awu neikalè mwà kunwà mabèèle ne kwikala ne mwoyi bwà butùmbi bwà Nzambi. Amen. Nebiikalè mùshindù awu.

Kaa, Nzambi, yèyè's udi ùsambidila tatwèndè. Ndi ndòmba pàmwè nendè bwà Wèwè kwondopa tatwèndè ne kumupèèsha cidiye naaci dijinga, mu Dìna dya Kilistò. Amen.

920 Mpindyewu, bipepèle kì mmwòmò anyi? Bantu munkaci mwà kusambila, kàdi aci ncìdi bantu. . . Badi bàkèba cintu cinène kàdi bàcikòdyakaja. Nzambi ùdi ùcìvwija cipepèle. Nwènù nudi nucikòdyakaja nènku nucìpangila. Nwamònu anyi? Kucìvwija ànu. . . Cilekèlaayi cipepèle mùdi Nzambi mwambè ne: “Bimanyinu ebi nebifilè bàdi biitabuuja; bôbò batentèkèle babèèdi byanza, babèèdi nebàsangalè,” mùdi Nzambi mwambè.

921 Nyewù tutentekela mukàjì ewu byanza, Mukalenge, mwanèètù wa bakàjì udi mwimàne apa ewu, nènku swàku bwà òndopiibwè patùdi tucilòmba apa, mu Dìna dya Yesù Kilistò. Amen.

922 Taatù, patùdi tutentekela mwanèètù wa bakàjì byanza apa, mu Dìna dya Yesù Kilistò, bu civùlukilu cyà Bible ne dilongesha dya Mukalenge, swàku bwà yèyè òndopiibwè.

Taatù, mu Dìna dya Kilistò, tudi tulòmba dyondopiibwa dya mwanèètù wa bakàjì, ne ndi ndòmba bwà Ùmwondòpèku patùdi tutùmikila Dìyi Dyèbè apa, ncìyi ne mpatà nànsha ya kànà mu meeji àanyi to ànu bwà ne mmufwànyìnekù kwikala. . . ? . . . Amen.

923 Taatù, nyewù tutentekela mwanèètù wa bakàjì byanza, ne tulòmba nùnkù, mu Dìná dyà Mukalenge Yesù, bwà wèwè kumwondopa ne kumusàngaja. Amen.

Mu Dìná dyà Mukalenge Yesù, tudi tutentekela mwanèètù wa balùme byanza ne tulòmba bwà Wèwè kumwondopakù bwà butùmbi bwà Nzambì.

Taatù, mu Dìná dyà Mukalenge Yesù, tudi tulaaba mwanèètù wa bakàjì maanyì, ne tumutentekela byanza ne tulòmba dyondopiibwa dyèndè mu Dìná dyà Yesù.

Taatù Nzambì, nyewu tutentekela mwanèètù wa balùme byanza, tulòmba ne, mu Dìná dyà Yesù Kìlistò, patùdì tumulaaba maanyì apa Wèwè ùmwondòpèku.

Taatù, mwab'ewu, mukàjèndè munanga...?...tumulaaba maanyì ne tumutentekela byanza, tucìlòmba, mu Dìná dyà Yesù Kìlistò.

924 Mukalenge Nzambì, nyewu tulaaba Edith mwànà maanyì, tumutentekela byanza, ne tulòmba mu Dìná dyà Mukalenge Yesù Kìlistò bwà Wèwè kumupèeshakù dilòmbà dyèndè.

Taatù, kùdì mamwèndè, tudi kàbìdì tumulaaba maanyì ne tumutentekela byanza ne tulòmba dyondopiibwa dyèndè, mu Dìná dyà Mukalenge Yesù Kìlistò, swàku bwà yèyè àsangalè.

925 Taatù, nyewu tulaaba maanyì kaacilengà kakesè kàà mushinga mukolè kàà dīkù edī aka, kàà pa mwoyi wàbò, mu Dìná dyà Mukalenge Yesù, dīngà dītūkù kalàmbùdīibwe kùdīYe, ne ndi ndòmba bwà Wèwè kukòndopa...?...

926 Kaa Nzambì, Wèwè udi mumanyè dilòmbà dyà mwanèètù wa bakàjì ne tudi tuKwela twasàkidila bwà diitabuuja dyèndè dyà bukītu adi. Mpindyewu, swàku bwà bintu bìdiye mulòmbè abi, bìdī...?...bìvwàye ùnàya naabì pàcìvwàye mwànà apu abi, nènku Nzambì, swàku bwà mulwìshì àlekelelèku mukàjì awu ne àpinganèku kumbèlu ne mubidì tumatuma, Mukalenge. Tudi kàbìdì tulòmba bwà muntu mulùme awu, udiyè mufidile dilòmba awu, Wèwè utu mulayè ne: “Nwènu balòmbè cintu kanà cyònsò mu Dìná Dyànyì, Mémè nèncyènzè.” Ndi ndòmba bwà Úfilèku dilòmba edī, mu Dìná dyà Yesù. Amen. Nzambì àkubènèshè.

927 Mukalenge, pàdì kajilujilu aka kènda kàfwa mu mpàla wa mwanèètù wa balùme apa, tudi tulòmba bwà mwoyi wùbwayikè, patùdì tumutentekela byanza ne tucìlòmba apa, mu Dìná dyà Yesù, bwà kajilujilu aku kàlongolokè.

Taatù Nzambì, nyewù tutentekela mwanèètù wa bakàjì byanza paanyimà pàà bamanè kumulaaba maanyì, mu Dìná dyà Mukalenge Yesù Kìlistò, tudi tulòmba dyondopiibwa dyèndè. Amen.

928 Taatù wa mu Dyulu, bu mùdì mwanèètù wa bakàjì mwimàne bwà dicìmunà dinène misangu ne misangu d'Údì

mumupèeshe, mmwimàne bwà umwe wa ku basadidi Bèèbè, mwambi kampànda, mubindùlùke bikolè; mwoyi wètù wà dyabanyangana nèndè makènga wùdi wùzànyika mashì bwèndè yéyè bu mutùdi bamanyè bìdiye ùpicila. Ndi ndòmba, Nzambi, bwà Ùlaabèku mwanèètù wa bakàjì maanyì bwà diimana dyèndè kaaba aka bwà mwambi awu ne ùmulaabèku bwà dyondopiibwa dyèndè. Ndi ndòmba, mu Dìna dya Kilistò. Amen...?... Mukalenge mmumanyè...?...

⁹²⁹ Bìmpè. Ndi ne disànkà dyàbùngì be. Adi ndilaabiibwa dya menemene dya Mukalenge. Mukalenge Nzambi, paanyimà pàa mukàjì ewu mufwànyine kwikala musùlùdiibwe kùdi démon ùvwayè mulwangànelwàngane nèndè munda mwà bidimu, dīngà ditùkù Wèwè wàkamuvwija kumbèlù kwàka ne dībà adi Nyumà kutùluka ne: “EMU MMÙDÌ MUKALENGE WÀMBA,” paanyimà pàa yéyè mwelè mbilà, mulàale panshì ku cyoshelu, mwenzè byònsò bìvwàyekù pèndè mwà kwenza abi, kadi byàkakèngela EMU MMÙDÌ MUKALENGE WÀMBA. Mpindyewu, nyewù ùlwa bwà mwànà wa mu dibòkò wa mwanàabò wa bakàjì udi ulùka; kàyi mwà kwenda to, ùkaadi mpucìshe ne cidimu cijimà. Ndi ndòmba, Mukalenge, bwà Ùmupèeshèku mabènesha a Nzambi mu Dìna dya Yesù Kilistò. Ndi ne disànkà dyàbùngì bwà bwalu abu, mwanèètù wa bakàjì, mwikàle kàbìdi ne mmwènekèlu mushiilàngane. Ne wèwè udi kule menemene ne difwà patùdi twakulangana apa, kí mmwòmò anyì?

Taatù Nzambi, tudi tulòmba bwà Ùbeneshèku mwanèètù wa bakàjì patùdi tumulaaba maanyì ne tumutentekela byanza ne tulòmba cintu ciWakambà eci ne: “Bimanyinu ebi nebifilè aba bàdi bìtabuuja. Nebàtentekelè babèedi byanza, babèedi nebàsangalè.” Tudi tujìkula ne tudi beena kwitabuuja, Mukalenge, pa nàнку tudi tulòmba bwà Wènzèku cintu kampànda, mu Dìna dya Yesù...?...

⁹³⁰ Taatù Nzambi, mumanyè mwoyi wà mukàjì mutekète ewu, bu mùdiye muwùpòngòlòle, tudi tulòmba bwà Wikalèku nèndè luse ne ùfilèku dilòmba didiye mulòmbe adi. Éyi Taatù Nzambi, bwà fàmiyè wèndè, bwà bânà bèndè, mwanèndè wa balùme, nangànangà, Nzambi, ndi ndòmba mpindyewu ne, Wènzèku bintu ebi...?... ne mwoyi wànyì wònsò, ndi ncilòmba, mu Dìna dya Yesù. Amen.

Taatù Nzambi, patùdi tulaaba mukàjì ewu maanyì, ne tumusambidila mu Dìna dya Mukalenge Yesù apa, bwà Wèwè kumwondopa ne kumusàngaja bwà butumbi bwà Nzambi.

⁹³¹ Dìna dyèbè kí ndifwànyine kwikala West to, mmwòmò anyì?

Taatù, tudi tulòmba bwà inàbànza mutekète ewu. Ùdi ùlomba bwà tatwèndè. Mpindyewu, ndi ndòmba bwà Ùmupèeshèku tatwèndè awu, ùbiikidilè pa mwoyi wèndè, Mukalenge. Mmuswè bwà tatwèndè àsungidiibwè. Kí mmuswè

bwà kwikalayè mu maalu a pa buloba mùdiye amu to, yêyè ewu, mwanèndè sungasunga, mùtòlokù wèndè. Ndi ndòmba, Taatù, bwà Wìkalèku nendè luse, mu Dîna dyà Kilistò.

⁹³² Àkubènèshèku, mwanàanyi wa bakàji, Nzambi àkupèèshèku, cintu cyûdi mulòmbe aci.

Nzambi munanga, tudi tulòmba luse bwèndè yêyè, ne tudi tulòmba bwà Wìkalèku nendè luse, patùdi tumulaaba maanyi apa...?...



NKONKO NÈ MANDAMUNA PA EBÈLÙ CITÙPÀ III LUA57-1006
(Questions and Answers on Hebrews Part III)

DILONDANGANA DYÀ BULOMBODI, BULONGÀME NÈ DILONGESHA BYÀ ÈKÈLEEZIYÀ

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyàlumingu dilòlò, mu matùkù a6 a ngondo wa dikùmi, cidimu cyà 1957, mu Branham Tabernacle mu Jeffersonville, Indiana, U.S.A. Ndyumusha pa mukaba wa méyì ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2022 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org